



G
ds: 42.

~~HHf2~~

G.d. 42

S. FRANCISCI
. ASISINATIS
V I T A





Angelo. Bassi. min. e del.

Gio. Geronimo Frezza Sculp. Romae 17



S. FRANCISCI

ASISINATIS

ORDINIS. FRATRUM. MINORUM
INSTITUTORIS

V I T A

Per S. **BONAVENTURAM**

S. R. E. CARDINALEM . ET . DOCTOREM

Editio novissima

aeneis figuris exornata cura , & expensis


JO. MARIAE . SALVIONI



R O M A E

Apud **ROCCHUM . BARNABEJUM .** MDCCX.

Approbatione et permisso .



D.N. CHRISTO. IESV

VNIGENITO . DEI . FILIO . DEO . ET
HOMINI . PRO . TOTIVS . HVMANI . GE
NERIS . REDEMPTIONE . EX . VIRGINE
NATO . QVI . DILECTVM . FAMVLVM
SVVM . FRANCISCVM . IN . SVMMITATE
MONTIS . ALVERNIAE . SACRATISSIMAE
SVAE . PASSIONIS . STIGMATIS . PRAE
SIGNAVIT . HAEC . IPSIVS . VIRI . SAN
CTI . GESTA . PER . SANCTVM . ITIDEM
VIRVM . BONAVENTVRAM . S . R . E . CAR
DINALEM . ET . DOCTOREM . CONSCRI
PTA . IOANNES . MARIA . SALVIONVS
ROMANVS . AD . PECCATORVM . SVO
RVM . EXPIATIONEM . MELIORI . QVA
POTVIT . FORMA . SVIS . EXPENSIS
ITERVM . IMPRESSA . HVMILI . CORDE

D D.

Reimprimatur.

Si videbitur Reverendissimo Patri Sac. Apostolici Palatii
Magistro.

D. de Zaulis Archiepiscopus Theodosia Vicesgerens.



Reimprimatur.

Fr. Jo. Baptista Carus Magister, & Reverendiss. Patris
Sac. Apost. Pal. Mag. Socius Ordinis Prædicatorum.



ELOGIA IN SANCTUM PATREM FRANCISCUM.

S. Joannes Apostolus & Evangelista.

E T vidi alterum Angelum, ascendentem ab ortu solis ;
habentem signum Dei vivi . Apocal. 7. 2.

S. Bonaventura S. R. E. Cardinalis, Seraphicus
Ecclesiæ Doctor.

*Beatus Franciscus, sancti Apostoli & Evangeliste
vaticinatione veridicâ, sub similitudine Angeli ascenden-
tis ab ortu solis, signumque Dei vivi habentis, adstruitur
non immeritò designatus. Prolog. in vitam sancti Francif.
§. 2. & cap. 13. §. 11.*

Bartholomæus Pisanus Ordinis Minorum .
S. Theologiæ Doctor.

*Sanctus Bonaventura, dum esset Ordinis Seraphici
Minister Generalis, & in Conventu S. Mariæ de Portiun-
culi*

culâ concionaturus de S. Francisco, locum illum *Apocalypsis*, *Vidi alterum Angelum ascendentem ab ortu solis, habentem signum Dei viti*; animo attento considerans, Deum supplex rogabat, ut indicaret sibi, de quo intelligendus esset? Mox è celo oraculum audiuit hujusmodi: FRATER BONAVENTURA, FIGURA ILLA LITTERALITER DICTA EST DE BEATO FRANCISCO. (Conformit. fruc. 1. & 3 1.)

S. Bernardinus à Senis Ordinis Minorum.

Meritò ergò Apocalypsis septimo, in aperitione sexti sigilli, à Joanne Evangelistâ, beatus Franciscus habere sic sacra stigmata descriptus est, cum ait: Vidi alterum Angelum ascendentem ab ortu solis, habentem signum Dei viti. De Evangl. aeterno, Serm. 60. de Stigmatib. S. Franc.

Indidem.

Huic sententiæ attestatur assertio, quam fecit dominus Bonaventura in Capitulo Generali Parisiis celebrato, cum esset nostri Ordinis Generalis Minister. Nam prædicans in ipso Capitulo, cum maximo fervore asseruit, se certissimè scire per revelationes indubitabiles, & solennes factas talibus personis, quæ de hoc non poterant dubitare, quòd beatus Franciscus erat singulariter Angelus sexti signaculi: & quòd ad literam de ipso, atque illius statu, & Ordine intellexit Evangelista Joannes, atque in spiritu eum vidit, quando protulit dicta verba; nec non & filiorum suorum perfectè imitantium Christum, collegium, in omnibus senariis libri Apocalypsis, clariùs intellexit. De Evang. aetern. Ser. 60. c. 1. § 7.

Bernar-

Bernardinus à Buftis Ordinis Minorum .

Est autem sciendum , quòd B. Franciscus fuit à Deo directus in mundum, ad instituendum tres Ordines, in aperitione sexti sigilli, ut ait S. Bonaventura in prologo majoris legendæ ipsius B. Francisci; quod demonstravit Joannes Evangelista Apocalypsis sexto, & septimo, ubi ait, quòd in aperitione sexti sigilli, fuit à Deo missus Angelus, id est, angelicus vir Franciscus, habens signum Dei viri, id est, stigmata Jesu Christi. Et ipse Dominus Jesus revelavit sancto Bonaventuræ, quòd B. Joannes intellexit in prædictâ prophetiâ de Sancto Francisco, & hoc affirmavit ipse Sanctus Bonaventura legens Parisiis, & juravit sic esse veritatem . Rosarii par.2. Serm.27. par.2. §. h.

Leo Papa X.

Ad vineam suam excolendam, primo mane oriente jam sole, misit ipse Pater familias Angelum illum ascendentem ab ortu solis, habentem signum Dei viri, beatum Franciscum: qui comitantibus miræ sanctitatis viris, prima vitis bujus jecere fundamenta . Apud Gonzagam. par.1. de Origine Seraph.relig. in Bullâ unionis. cujus initium: Ite & vos in vineam meam .

Jacobus à Voragine, Ordinis Sancti Dominici
Episcopus Januensis.

Christus ante primum adventum, qui erat misericordia, præmisit Angelum, scilicet beatum Joannem Baptistam: ante verò secundum adventum suæ justitiæ, præmisit alterum Angelum, scilicet B. Franciscum . Serm.2. de S. Franc.

S. Bernardinus à Senis, Ordinis Minorum .

Præcesserat ante S. Franciscum angelicus vir , gloriosus Dominicus , in angelicâ vitâ pariter & doctrinâ : beatus enim Franciscus est alter angelus in regulâ & in personâ , sed idem in caritate , & fide , atque vitâ ; qui propter facta angelus nuncupatur : tum propter ejus angelicam vitam ; tum quia Dei nuncius fuit , ad renovandum in mundo Evangelium Christi . De Evangel. æterno , Serm. 60. in initio .

Ibidem .

Ascendit ab ortu solis : quia sui ascensus initium ; & fundamentum incipit à Romanâ sede , quæ inter quinque Patriarchales Ecclesias principalis est , Sedes & civitas veri Solis , scilicet Christi , & fidei ejus . Vel sic ; Ab ortu solis ascendit : quoniam per divinæ sapientiæ exemplum , prædicationem , & sensum , cum suo Ordine , mundum irradiavit . Sicut enim Apocalypsis sexto , obscuratio solis , divinæ sapientiæ subtractionem in mundo significat , per quam generalis ruina statuum , & personarum , & Ecclesiarum , surgit : sic etiam ortus solis , divinæ sapientiæ illustrationem significat , quæ in sexto Ecclesiæ statu in Mendicantibus ortum sumpsit , & crevit . Proinde Bonaventura in Illuminationibus suis , vocat prædictum tempus , Tempus illuminationis Scripturarum : quòd hoc tempore mirabiliter declarata sunt à Doctoribus Ordinum prædictorum .

Jacobus à Voragine , Ordinis S. Dominici .
Episcopus Januensis .

Venit enim S. Franciscus portans secum tres radios ; scilicet , radium doctrinarum , per quem illuminavit obscu-

obscuros ; radium exemplorum , per quem inflammavit tepidos ; & radium miraculorum , per quem convertit obstinatos . Ipse enim excussit ignorantiam in erroneis , radio doctrinarum ; negligentiam in tepidis , radio exemplorum ; & duritiam in obstinatis , radio miraculorum . Serm.2. de S. Francisco .

Henricus ab Urimariâ , Ordinis Eremitarum
S. Augustini .

Ipse enim habuit tres radios , quibus totum mundum illuminavit : quia radio doctrine illuminavit obscuros ; radio beatorum exemplorum excitavit tepidos ; & radio miraculorum illustravit & convertit obstinatos . Et ideò de ipso verificatur quod scribitur in Ecclesiastico : Triplaciter Sol exurens montes , radios igneos exsufflans , & refulgens . Nam radio doctrine fugavit ignorantiam ; radio exemplorum in tepidis fugavit negligentiam ; & radio miraculorum fugavit obstinationem & duritiem . Ser.3. de S. Francisco .

Jacobus à Voragine , Ordinis S. Dominici ,
Episcopus Januensis .

Habentem signum Dei vivi . Istud signum portavit in corde , per amoris vulnerationem ; in corpore , per mactationem ; in parte , per stigmatum impressionem . Serm.2. de S. Francisco .

Henricus ab Urimariâ , Ordinis Eremitarum
S. Augustini .

Per hoc enim conformabatur Deo vivo , quòd stigmata Jesu Christi per biennium in corpore proprio portavit ; quæ bene erant signum Dei vivi : quia per hæc Christus ostendit

ostendit discipulis, se verè vivere post passionem suam, cum diceret: Videte manus meas, & pedes meos, quia ego ipse sum, quod quidem signum Dei, in hoc evidenter apparuit, quod beatus Franciscus fuit sigillatus bullâ Summi Pontificis, & consignatus vexillo, & charactere Summi Regis, per impressionem deifici stigmatis. Serm.3. de S. Franc.

S. Bernardinus à Senis, Ordinis Minorum.

Nec tantum in specie Seraphicâ [Christus] illi apparere debuit, sed veluti cruci affixus: ut apertè innueretur, quod non cælestis spiritus illa stigmata imprimebat, sed ille, qui pro nostrâ salute crucifixus est, atque ex Seraphico ardore cordis ejus, Christum in crucifixi similitudinem transformabat. De Evan. æter. Ser.60. art.1. cap.1.

Indidem.

Nec recolo me legisse, nec reperisse aliquid aliud immediate fabricatum à manibus Jesu Christi, quod ab Ecclesiâ fuerit approbatum, nisi hos clavos, & stigmata hæc sacra. Art.2. cap.3.

Pelbartus à Themessvar, Ordinis Minorum.

Signum magnum & singulare, omni veneratione dignum: utpotè digito Dei viri descripta imago crucifixi, non in tabulis lapideis, sed carneis, hoc est, in corpore beati Francisci. Si enim Judei venerabantur Moysen, & tabulas ejus lapideas, in quibus digito Dei, vel ministerio angelico descripta erant præcepta Decalogi; quanto magis debemus nos venerari beatum Franciscum, in cujus carne ipse Christus tam mirabiliter descripsit suorum vulnere imaginem, ad salutarem utilitatem totius Ecclesiæ? Serm.2. de S. Francis.

Ale-

Alexander Papa IIII.

Hæc igitur mira et decora novæ demonstrationis indicia, magnæ debent esse devotioni; divitiæ Christianis; et inestimabiles Religionis deliciæ, in spiritualibus convivii Ecclesiæ Orthodoxæ. In Bullâ de Stigmatib. S. Franc. cui initium: Benigna divinæ operatio voluntatis. in firmam trium Ordin. par.2.

Dionysius à Riikel, Ordinis Carthusiani.

Ego stigmata Domini Jesu in corpore meo porto. Hæc verba S. Paulus in propriâ dixit personâ ad literam, quæ excellentissimo Confessori, beatissimo Patri Francisco valdè sublimiter competunt: quoniam quinque vulnerum Christi impressuras, seu stigmata, quæ erant realiter vera vulnera, in suo corpore accepit ac tulit. Serm. de S. Francisco.

Robertus à Licio, Ordinis Minorum,
Episcopus Aquinatenfis.

Stigmata S. Francisci fuerunt miraculosa, ratione vitæ. Non enim potuisset per naturam vivere duobus annis, plagatus in quinque locis spasmosis, ex quibus continuo fluebat sanguis, cum dolore vehementissimo, non solum corporis, sed et cordis, ex memoriâ passionis Dominicæ. Neque usus est pro toto tempore illo, aliquo unguento vel medicinâ: sed tantum pannis restringebat sanguinem emanantem, quem sextâ feriâ liberè prodire sinebat. Et, quod miraculum auget, erant illæ plagæ odore fragrantissime: ex quibus nulla unquam putredo, aut immunditia profluxit. Serm. de stigmatib. S. Franc. cap.2.

Joa-

Joachim Abbas Florensis, Ordinis S. Benedicti

Prænuñciavit beatum Franciscum venturum, verbo non solum, sed etiam opere: quia eum depingi fecit in Ecclesia S. Marci Veneriis super ostium sacristiæ, cum stigmatibus, sicut cernentibus hodiernâ die apparet, & hoc, opere musaico. Testatur Bartholom. Pisan. Conform. fruct. 1. Robert. à Licio Serm. de tribus excellentiis B. Fran. cap. 1. Gulielmus Pepin Ordinis S. Dominici attestatur, unâ cum S. Francisco, etiam S. Dominicum depictum ab eo esse. Et subiungit, Nota quòd prædictus Abbas præcesserit prædictos duos Sanctos, per annos centum, aut paulò plus. Serm. de S. Francisco.

Jacobus à Voragine, Ordinis S. Dominici,
Episcopus Januensis.

Christus dedit beato Francisco stigmata, tanquam arma sua, vexilla sua, & testimonia sua: ipse namque erat miles Christi, signifer Christi, legatus Christi, & præco Christi. Serm. 1. de stigmatibus S. Francif. sive 3. de S. Francif.

Alexander Papa IIII.

Extremo jam instante sæculi senectutis interitu, ostendit excessus regis, militem, regis militaribus insignitum: ut regis aciem jam labentem, jamque ab hostibus fugientem defenderet, & certamen victoriosum triumphatoris superni, verbis & actibus hostibus aggredientibus prædicaret. Apud S. Bernardinum à Senis, de Evang. æter. Serm. 60. cap. 3. art. 1.

Henri-

Henricus ab Urimariâ , Ordinis Eremitarum
S. Augustini .

Fuit enim miles, & vexillifer ipse Christi : & ideo præcessit aciem expeditorum militum , fratrum scilicet , suam vitam & Regulam sequentium , portans vexillum summi Regis , quo potestates aëreæ fugantur , & Christi milites in actibus bellicis confirmantur . Serm. 3. de S. Francisco .

S. Bernardinus à Senis , Ordinis Minorum :

Tanto amore , tanto fervore , tantoque ardore transformatus in crucifixum Jesum , ut miraculo omnibus inaudito sæculis , benignitas Salvatoris in carne illius imprimeret similitudinem suæ sanctissimæ passionis : constituens eum vexilliferum in novâ remuneratione crucifixionis ejus . De Evang. æter. Serm. 60. initio .

Indidem .

Sicut beatus Franciscus fuit vexillifer Jesu Christi in Ecclesiâ militante , sic post resurrectionem (secundum Doctores) remanentibus in corpore suo prædictis signis , vexillifer erit in Ecclesiâ triumphante . Art. 2. cap. 3.

Robertus à Licio , Ordinis Minorum ;
Episcopus Aquinatenfis .

Nam sicut de martyribus refert B. Augustinus , quod resurgent cum cicatricibus , quæ ad ornatum facient , & decorem corporum , non ad aliquam deformitatem : ita pîe tenere possumus , quod S. Franciscus cum illis signis , cum quibus ex hac vitâ discessit , ad vitam immortalem resurget . Scr. de Stigmatib. S. Franc. cap. 2.

c

Grego-

Gregorius Papa I X.

*Caput draconis ultimum
Ultorem ferens gladium ,
Adversus Dei populum ,
Excitat bellum septimum .
Contra calum erigitur ,
Et nititur attrabere
Maximam partem fiderum ,
Ad damnatorum numerum .
Verum de Christi latere
Novus legatus mittitur :
In cujus sacro corpore
Vexillum crucis cernitur .
Franciscus princeps inclytus
Signum regale bajulat .
Et celebrat concilium
Per cuncta mundi climata .
Contra draconis schismata ,
Acies trinas ordinat
Expeditorum militum :
Ad fugandum exercitum ,
Et tres catervas demonum ,
Quas draco semper roborat .*

Apud Bartholom. Pisanum Conformitate fructus secundi.

Jacobus à Voragine , Ordinis S. Dominici ,
Episcopus Januensis .

*Quia erat praeo Dei , dedit ei stigmata , tamquam
signa , vel testimonia sua : ut ab omnibus praeo Dei cogno-
sceretur ; & verba illius , quasi ex ore Dei reciperentur .*
Serm. 3. de S. Francisco , qui primus est de Stigmatib. ejus.
Philip-

Philippus Diez , Ordinis Minorum .

O si Deus nobis plurimos viros sanctos, spiritualisque ac celestis sapientia gnaros concederet : quantam in animabus nostris operationem facerent ! Unus olim concionator universum mundum convertibat : nunc autem vix tot Concionatorum proventum experimur . Seraphicus Pater noster Franciscus tantâ spiritus efficacîa dicitur prædicasse ; ut aliquando contigerit , finitâ concione , ad eum , triginta viros habitum ejus petituros sese contulisse : quibus omnibus ipse concessit . Et in quodam Capitulo , quod in Sanctâ Mariâ de Portiunculâ celebravit , tanto , tamque ferventi spiritu , de mundi contemptu concionatus est ; ut illo sermone innumeri ad hujus sanctæ religionis habitum suscipiendum fuerint conversi : peractâque concione , ex illis , quingentos novitios recepit . Conc.4. de S. Francisco .

S. Antoninus , Ordinis S. Dominici , Archiepiscopus
Florentinus .

Quia videbatur extincta memoria passionis Christi in mentibus hominum , præ tepiditate : eorum voluit Dominus excitare , & incallescere hanc recordationem , per impressionem manifestam cicatricum in corpore Beati Francisci . Histor. par. 3. tit. 24. cap. 1. §. 3. Gulielmus Pepin. Serm. S. Franc.

Alexander Papa III.

Grande ac singulare miraculum , quo beatum Franciscum , omnium Sanctorum splendor & gloria , Dominus Jesus Christus mirabiliter decoravit . In Bullâ , cui hoc idem initium . In firmam trium Ordin. trac. 1. par. 2.

Baptista Fulgosijs.

Quàm ingentem perfectæ virtutis prerogativam, atque minimè dubium argumentum, Franciscus Assisio urbe natus, à Deo tulit! Nec verò id dico, quia in Sanctorum numerum relatus fuerit; id enim etiam ad alios pertinere videmus: sed quòd præcipuo Dei munere dignus, & factus, & judicatus est, qui vivens in corpore suo veram, certamque vulnerum prætulit formam, unde humani generis abstersâ labe, vita prodiit mortalibus, quos primi parentis error in æternum peremerat. Ita autem fuisse, præterquam quòd res ipsa inspiciebatur Alexander quoque Quartus Gregorius Nonus, Nicolaus Tertius, Apostolicâ auctoritate testati sunt. O singulare munus, gratiaque divinitus infusa! O unica rerum excellentissimarum excellentia! Ferre Franciscum in corpore suo, ita ut inspicere, tangique possent, signa illa; quibus pretium conferri nullum potest: in quibus juncta Divinitati humanitas, dum per ea mortem accepit, salutem, vitamque terrarum orbi peperit. Lib.8. Factorum, dictorumque memorabil. c.100.

Robertus Bellarminus, Societatis Jesu . S. R. E.
Cardinalis .

Hoc signum omnium maximum, ac singulare, & quasi prodigium omnium prodigiorum, sacra illa Stigmata fuerunt. Con. Lovanii habitâ, Dominica Sexagesima.

Marcus Marulus Spalatenfis.

Sed quid nunc de te Pater Franciscè dicam? Quantum tibi quoque adhuc in terra degenti tua contulit contemplatio? Vidisti fulgentem Salvatoris nostri crucem; vidisti sanctum Seraph, à quo Seraphicus dici meruisti. Inde tibi singulari quodam privilegio, Dominicæ crucifixionis

xionis cicatrices corporaliter vindicasti : ut tuus paupertatem , mansuetudinem , humilitatem fueras imitatus , ejus etiam beatissime passionis signa in manibus , in latere , in pedibus referres ; & cum Paulo gloriari posses , dicens : Christo confixus sum cruci . Vivo autem jam non ego , vivit vero in me Christus . Mibi autem absit gloriari nisi in cruce Domini nostri Iesu Christi , per quem mihi mundus crucifixus est , & ego mundo : ego enim stigmata Domini Iesu in corpore meo porto . O felicem servum , cui Dominus tradidit quinque talenta ! ut quibus ille perditum reparavit mundum , hic labentem repararet Ecclesiam ! Lib.2. Dictorum factor. memorabilium cap.4.

Henricus ab Urimariâ, Ordinis Eremitarum S. Augustini .

Et ideo benè congruit B. Francisco , quod scribitur de Abraham : Non est inventus similis illi in gloria : quia inter omnes Sanctos nullus invenitur , cui sit pia evidenter impressa Bulla Summi Pontificis , & qui in corpore suo sic ferret vexillum Summi Regis , sicut fecit beatus Franciscus . Serm.2. de S. Franc.

S. Antoninus Ordinis S. Dominici , Archiepiscopus
Florentinus .

Quoddam singulare concessum fuit beato Francisco ; quod nulli inter natos mulierum legitur fuisse donatum ; & hoc est impressio stigmatum sacrorum . Quamvis enim Paulus dicat de se ad Galatas : Ego stigmata Domini Iesu in corpore meo porto ; tamen nullus dicit , quod habuerit corporaliter signa passionum in manibus , & pedibus , & latere : sed dicuntur stigmata passiones multe & afflictiones . Paulo post hæc addit : Dicitur etiam de aliquibus devotis hominibus , quod senserint magnum dolorem in manibus ,

bus ; & pedibus , & latere , ac si habuissent ibi vulnera : sed tamen non ita impressa corporaliter , ut in B. Francisco. Hist. trit. par. tit. 24. cap. 1. §. 3.

Gulielmus Pepin , Ordinis S. Dominici , Theologus
Parisiensis .

Dicitur de aliquibus devotis personis , quod senserunt interdum maximum dolorem in manibus , pedibus , & latere , tamquam ibi habuissent vulnera , & stigmata Christi : sed tamen non ita impressa corporaliter , seu visibiliter , sicut factum est in corpore beati Francisci ; & hujus generis fuit Beata Catharina de Senis : quæ legitur rogasse Dominum , ut non apparerent exteriùs stigmata . Serm. de S. Francisco .

Robertus à Licio , Ordinis Minorum , Episcopus
Aquinatensis .

Sancta Catharina Senensis , cùm esset in civitate Pisanâ , & quodam mane in Ecclesiâ S. Christinæ communicasset ; ac juxta altare raptâ maneret in spiritu : postquam diu sic stetisset , vidit Christum cruci adfixum , magno super se cum lumine descendente , radiosque sanguineos ex suis quinque sacratissimis cicatricibus emittentem . Cumque tunc , videntibus pluribus utriusque sexus ipsam expectantibus , virgo se erigeret , & super genua sua stans , facie rutilante brachia elevarisset , ac manus ; oraretque ne cicatrices in corpore apparerent exteriùs : tunc ex radiis sanguineis in solares immutatis , à cicatricibus crucifixi procedentibus , & ad manus , pedes , & cor illius pervenientibus , valde extrinsecus dolor sensibilis in dictis partibus corporis est relictus . Ex quo cùm corpus ejus diu sic staret rigidum , & oculis clausis ; tandem cecidit , ac si fuisset lethaliter vulneratum .

ratum . Post modicum ad se reduſta , tanto dolore concutiebatur , ut à cunctis putaretur in brevi moritura . Dominicà verò ſequentē ibi communicans , à dolore extitit liberata . Ex viſione prætacta , in plerisque locis nonnulli S. Catharinam ſuſcipientem ſtigmata à Chriſto depingi fecerunt : qui ſi eā intentione id egerint , ut per viſibilia , inviſibilia cognoscantur ; & per picturam illam viſibilem , dolor ejus inviſibilis , licet ſenſibilis deſignetur : permitti poſſunt . Sed ſi hæc facta ſunt , ut ſic equiparetur S. Franciſco , cui ſoli uſque in præſens , ſingulari modo ſtigmatæ divinitus ſunt impreſſa : utique reprehenſibile eſt . Nam ut dixi in Sermone de ſacris ſigmatibus B. Franciſci , inter miracula grandia noſtræ fidei , Franciſci conſignatio inſignem obtinet gradum . Fuerunt quippe ſtigmata & viſibilitèr , & ſenſibilitèr à Chriſto illi impreſſa : tulit illa duobus annis continuis ; & in vitâ , & in morte , etiam à viris ſanctis , & graviffimis viſa , & tacta . Summi Pontifices , Gregorius Nonus , Alexander Quartus , Benediſtus , Nicolaus , & alii illa approbantes , fatentur ſingulari miraculo in Franciſci pedibus , manibus , & latere fuiſſe depicta ab eo artiſce ſapientiſſimo , qui creavit cælum & terram . Quid verò de cætero ſit facturus , cujus arcana perſcrutari nequimus , ipſe novit . Unum ſcio , & quidem abſque ullo errore , quòd Beatus Franciſcus electus fuit à Domino Ieſu Chriſto ; ut in proprio corpore vexillum crucis , biennio antequam ſpiritum redderet Deo , deſerret . &c. Serm. de S. Catharina à Senis cap. 3.

Sibylla Erythræa .

Erit autem beſtia horribilis ab Oriente veniens , Stellæ quoque duæ ſurgent contra ipſam : & non obtinebunt , donec veniat abominatio , & voluntas Altiffimi conſumetur .
Apud

Apud Barthol. Pisan. Confor. fruc. 1. Robert. à Licio, Ser. 2.
de S. Franc. Gulielm. Pepin Serm. de S. Franc. & interpre-
tantur bestiam, Mahumetem : Stellas duas, Sanctos, Domi-
nicum, & Franciscum.

Humbertus, Generalis Ordinis Prædicatorum,
&
S. Bonaventura, Generalis Ordinis Minorum.

*Hi sunt (ut ad Gloriam Dei loquamur, non nostram)
duo magna luminaria, quæ lumine cælesti, sedentes in
tenebris & umbrâ mortis, ubique terrarum illuminant,
& ministrant. Hi sunt duæ tubæ veri Moysi Christi Dei
nostri: quorum ministerio multitudinem populorum jam
ad suum principium convocavit. Hi sunt duo Cherubim,
pleni scientiâ mutuo se respicientes, dum idem sentiunt, &
alas suas extendentes ad populum, dum ipsum verbis, &
exemplis protegunt, & discurrunt secundum obedientiæ
volatum, super omnem populum disseminare scientiam
salutarem. Hi sunt ubera sponse, ex quibus parvuli in Chri-
sto lac sugunt, quo nutriantur, & augmenta recipiant in
salutem. Hi sunt duo filii olei splendoris, qui assistunt Do-
minatori universæ terræ: prompti ad ejus imperium, quo-
cunque voluntas ejus eos duxerit suam legationem implere.
Hi sunt duo testes Christi, qui saccis amicti jam prædicant,
& testimonium perhibent veritati. Hi sunt illæ duæ stellæ
lucidæ, quæ secundum Sibyllinum vaticinium, habent spe-
cies quatuor animalium, in diebus novissimis nomine Agni
vociferantes, in directionem humilitatis, & voluntariæ pau-
pertatis. Epistolâ ad omnes Prædicatores, & Minores apud
Reverendissimum dominum Petrum Radulphum, lib. 2.
historiar. Seraph. Religion.*

Thomas

Thomas Bozius, Congregationis Oratorii
Presbyterorum.

Duo, bi Dominicus & Franciscus, Ordinum religionum inter suos primi auctores & institutores, merito vocari possunt duæ olive, & duo candelabra in conspectu Domini terræ stantia, de quibus in Apocalypsi: ab his enim verè dicta est Ecclesia Dei, domus ruinam quodammodo minans, institutis suis, & cælestis vitæ innocentia sustentari. Lib.7. de signis Ecclesiæ Dei cap.1.

Joannes Garzon, Bononiensis Orator.

Romæ cum Dominicus noctu sanctis orationibus indulgeret, Christum intuitus est in peccatores irâ commotum: quod eos de medio tollere instituisset: præter Mariam calî reginam illi posse resistere neminem. Hæc precibus obsecrabat, ne quos suo sanguine redemerat, eos iret perditum: unum esse Dominicum, cujus virtute & sanctimoniâ, plerique se ab erratis revocarent. Hæc, quamquam ita sint, nequaquam tamen, inquit Christus, sejungendus est Franciscus: cum omnium sit virtutum simulacrum; hic eam provinciam minimè recusabit. Jam nox in diem inclinabat; cum Dominicus, quæ conspexerat cum animo suo considerans, ad templum iter suscipiebat; fortè illi obvius fuit Franciscus; confestim illum amplexus est, & deosculatus: atque ita verba fecisse fertur: Nos Christi optimi maximi munere societatem invenimus: illud oneris pro religione Christianâ suscipiamus oportet; nec ullum defugiamus laborem, ut qui à Christo deficient, hos prosternamus, deleamusque. Reprimenda erit eorum, qui præter rationem appetitui obtemperabunt, iniquitas atque insolentia. Accessit Franciscus Dominici sententiæ. &c. Apud Aloysium

d

Lipo-

Lipomanum, de Vitis Sanctorum par.2. in vitâ sancti Domini.

Theodoricus ab Apoldiâ , Ordinis S. Dominici :

Beatus Dominicus socium suum in hac visione diligenter contemplans, ad id usque tempus ignotum sibi, postea die in ecclesia inventum agnovit: ruensque in sancta oscula; & sinceris amplexus, ait: Tu es socius meus: tu mecum pariter cures.

STEMUS SIMUL;

& nullus adversariorum vincet nos. Visionem quoque, quam jam diximus, enarravit ei; atque ab illo die fuit illis cor unum, & anima una in Domino; quod etiam à successoribus suis jusserunt perpetuò observari. Apud Sur.to. 4. ad diem quintam Augusti lib.2. de S. Dominico cap.1. S. Antonin. hist. par.3. tit.23. cap.3. Hieron. Plat. lib.1. de bono status relig. cap.34.

S. Antoninus, Ordinis S. Dominici, Archiepiscopus Florentinus.

Hi utique sunt duæ Olive, pinguedine dilectionis & devotionis; & duo candelabra lucentia ante Dominum, orbem doctrinâ illustrantia. Hi duo Cherubim sapientiâ plena, obumbrantia Propitiatorium; nec non & duo Seraphim, caritate ardentia, clamantia Sanctus, Sanctus, Sanctus, Dominus, Deus Sabaoth; implentia omnem terram gloriâ ejus documentis & exemplis. Hi status Mendicantium, utrumque statum videntur comprehendere, Prælatorum Ecclesiæ, Episcoporum, & aliorum, quo ad actum doctrinæ, & prædicationis, spectantis ad vitam Activam, & statum Religiosorum, seu Monachorum,

rum, defervientium Contemplativæ; quo ad Cæremonias regulares, & officia; unde dici potest vita mixta, quam ut perfectissimam tenuit Christus. Hist. par. 3. tit. 23. cap. 1.

Item.

Primi patres institutores status Mendicantium, fuerunt beatissimi Dominicus & Franciscus, contemporanei: se fratres ad hoc simul deputatos, in Ecclesiâ S. Petri in urbe primò recognoscentes, & in osculo sancto mutuò amplectentes. Et Dominicus Patriarcha Prædicatorum, prior quidem tempore, quoad mundi ingressum, & ex eo egressum, ac etiam ad conversationem Religionis, & actum prædicationis; nam per decem annos, antequam confirmationem Ordinis procuraret, in Hispaniâ, & Tolozanâ regione, jam religiosus & pauper discurrebat. Patriarcha autem Minorum Franciscus, prius confirmationem sui Ordinis procuravit, non solemnem tamen, sed ut permissionem pro tunc talis status, utpote vicinior Curie, ab Innocentio Tertio. Dominicus verò, ab eodem promissionem confirmationis habuit: sed executionem à successore ejus Honorio, ad Curiam reversus accepit. Hist. par. 3. ubi suprà.

Rursus.

Ex prædictis patet, quòd quantum ad quandam concessionem simplicem habitus, & modi illius vivendi, & quasi permissionem, fuit priùs institutus Ordo Minorum: quia per Innocentium Tertium, ut dictum est. Quantum verò ad solemnem approbationem per Bullas Apostolicas authenticè, fuit priùs Ordo Prædicatorum confirmatus: quia in principio Pontificatus Honorii; & post aliquod tempus

Ordo Minorum solemniter approbatus per litteras Apostolicas, & Regula approbata. S. Antonin. histor. par. 3. tit. 24. cap. 7.

Hieronymus Platus Societatis Jesu.

Et quidem quod litteris exstet, Franciscus primùm & Dominicus, separatim uterque, suâ magis sponte, quàm legis cujuspiam coactû, Innocentio Tertio, instituti quod meditabantur, rationem, Pontificia potestate sancientiam obtulerunt; quod cum in Lateranensis Concilii tempus incidisset; in eodem Concilio cautum ac scitum est, ut id in posterum sollemne esset ac perpetuum. Idemque non multis post annis à Gregorio Decimo in Synodo Lugdunensi renovatum, & deinde in universales Ecclesiæ mores receptum est. Lib. 1. De bono status relig. cap. 2.

M. Antonius Coccius Sabellicus.

Duo Christianæ pietatis lumina terris affulsere, quibus multo maximâ parte orthodoxa crevit fides. Auctores incrementi hujus, Dominicus Calaguritanus Hispani generis, & Franciscus Assisias, in Umbriâ Italiæ regione ortus; æquales hi: uterque enim alterum vidit; & hic quidem sanctitate clarus, & ille: sed numerosâ familiâ clarior Italus, quæ ex eo orta est. Ennead. 9. lib. 6.

S. Bernardinus à Senis, Ordinis Minorum.

*Species quarti similis Filio Dei. Fuit quippe quartus inter principales Levitas, Stephanum, Laurentium, Vincen-
tium, beatus Franciscus. Fuit etiam quartus inter Ordinum Patriarchas, videlicet Basilium, Augustinum, Benedictum.
De Evangel. æter. Ser. 60. art. 1. cap. 1.*

Jaco-

*Tribus Eremitarum; Monachorum; & Canonico-
rum religionibus, ut regulariter viventium quadraturæ
fundamenti in soliditate suâ firma subsisteret addidit Do-
minus in diebus istis quartam religionis institutionem, or-
dinis decorem, & regulæ sanctitatem. Si tamen Ecclesiæ
primitivæ statum & ordinem diligenter attendamus: non
tam novam addidit regulam, quam veterem renovavit:
relevavit jacentem, & penè mortuam suscitavit religio-
nem, in vespere mundi tendentis ad occasum, imminente
tempore filii perditionis: ut contra Antichristi periculosa
tempora novos athletas præpararet, & Ecclesiam premu-
niendo fulciret. Hæc est religio verè pauperum crucifixi;
& Ordo prædicatorum, quos Fratres Minores appellamus.
Verè minores, & omnibus hujus temporis regularibus in
habitu & nuditate, & mundi contemptu, humiliores.
Habent autem unum summum Priorem, cujus mandatis
& regularibus institutis reverenter obediunt minores
Priores, ceterique ejusdem Ordinis Fratres; quos per di-
versas mundi provincias causâ prædicationis, & salutis
animarum ipse transmittit. Adeo autem primitivæ Eccle-
siæ religionem, paupertatem, & humilitatem in se refor-
mare diligenter procurant, puras Evangelici fontis aquas
cum siti & ardore spiritus haurientes; quod non solum
Evangelica præcepta, sed & consilia, vitam Apostolicam
expressius imitantes, modis omnibus adimplere laborant,
omnibus quæ possident renunciantes: seipso abnegantes;
crucem sibi tollendo nudi nudum sequentes; relinquentes
pallium cum Joseph, & hydriam cum Samaritanâ, expe-
diti currunt, ambulant ante faciem suam & non rever-
tuntur, &c. Historiæ Occidentalis, cap. 32.*

S. Bir-

S. Birgitta, vidua.

Christus inquit: Franciscus amicus meus fuit, quasi lapis ignitus, et igneus: quia habuit me in se, qui sum ignis.
Revelationum extravagantium, cap. 90.

Alibi eadem.

Ipsius Francisci regula, quam ipse incepit; non fuit dictata, et composita ab ipsius humano intellectu et prudentiâ, sed à me, secundum voluntatem meam: quodlibet enim verbum, quod in eâ scriptum est, à Spiritu meo sibi fuit inspiratum; et postea ipse aliis regulam illam protulit et porrexit. Ita etiam omnes alie regule, quas amici mei inceperunt, non fuerunt dictatae et compositae ab ipsorum intellectu et humanâ sapientiâ, sed aspiratione ejusdem Spiritus sancti. Lib. 7. Revelat. cap. 20.

Jacobus Bergomensis, Ordinis Eremitarum
S. Augustini.

Franciscus ex Assisio ortus, novum mox Ordinem instituit; et velut sol in orbe radians, Christianam religionem plurimum illuminavit. Supplement. Chronicor. lib. 13.

Raphael Volaterranus.

Actus exinde paulatim Ordo, et ut cunctis postea multitudine virorum praestiterit, et Sacerdotio, et doctrinâ; et sanctitate praecellentium. Lib. 21. Anthropolog.

M. Antonius Coccius Sabellicus.

*Rarò, ac nescio an unquam verius dixerim; ullum humanæ pietatis institutum majora sensit incrementa;
totum*

totum orbem terrarum una hæc implevit familia . Ennea:
9. lib.6.

Ludovicus Granatenſis, Ordinis S. Dominici :

Tantum abſuit ut à beato Franciſco inſtitutus Ordo; inopiâ cogente , defecerit; ut ob hoc ipſum ſupra omnes alios Ordines auctus, ac dilatatus fuerit. Exiguïs namque expenſis monaſterium humile exſtruitur : quo exſtructo, facile monachi ſine ullis redditibus , quæ ſunt ad pauperem ac tenuem vitam neceſſaria ſibi comparant . Hinc factum eſt, ut unicuſque beatiffimi Patris Franciſci Ordo , plura fortæſſe intra ſe cœnobîa , quàm reliqui omnes omnium aliorum Ordinum , contineat . Con. de S. Franc. 2.

Hieronymus Platus Societatis Jeſu :

Atque hæc , quamquam ita ſunt glorioſa & honorifica Religioſis , nihil tamen præclarius aut glorioſius , quàm totius novi orbis converſio : quæ quantacunque eſt, tota eſt Religioſorum. Ipſi enim primi Evangelium in oras illas intulerunt; ipſi fidem plantarunt, ipſi deinde rigarunt, iidemque adhuc excolere , & propagare non deſiſtunt . Primos omnium, qui tantam banc provinciam aggreſſi ſunt, Franciſcanos fuiſſe legimus; atque eoſdem etiam in iis regionibus inveniendis, cùm antea ne de nomine quidem auditæ eſſent, magnopere contuliſſe . Cùm enim Chriſtophorus Columbus de eâ navigatione inſtituendâ apud Ferdinandum Hiſpaniæ regem ageret; nec ei, ut in re tam novâ atque incertâ, multum fidei haberetur : Patres duo Franciſcani valde eum juviſſe dicuntur ; tum ipſum animando, tum etiam Regem impellendo , ut eam occaſionem omnino tentaret . Itaque cùm impetratâ claſſe Columbus Mexicana regna feliciter aperuiſſet , atque in Hiſpaniam tam lætæ rei nunciuſque
rever-

revertisset: statim aliquot familiae ejus patres in ea loca navigarunt, annum circiter à Christo nato millesimum quadringentesimum, nonagesimum tertium. Atque eodem pene tempore, ad Occidentalem Indiam, Emanuelis Lusitani regis auspiciis à Vasco Gama patefactam, anno videlicet millesimo quingentesimo, missi sunt Evangelii causâ, ex eâdem familiâ viri octo, tum doctrinâ tum pietate præstantes. Ab his initiis, hic Ordo per eas regiones diffusus, multiplicatis brevi tempore domiciliis, tresdecim (ut ipsi vocant) Provincias instituere, in quibus magnam Christianæ rei operam navarunt, et adhuc navant. Lib.2. De bono stat. relig. cap.30.

Franciscus Gonzaga, Ordinis Minorum,
Episcopus Mantuanus.

Anno à Christi nativitate millesimo quingentesimo, religiosissimos octo Fratres Minister [Portugalliæ Provinciæ] cum secundâ invictissimi Lusitanorum regis Emanuelis classe, ad Orientales Indos transmisit: quatenus eos, postposito quocunque vitæ discrimine, suis prædicationibus, atque exhortationibus Christo lucrifacerent. Quorum antesignanus atque Pater, F. Henricus à Conimbriâ, cum solus, aliis septem sociis diversimodè ab illis barbaris, oppressis, atque glorioso martyrio coronatis, ex tam famoso certamine supersuisset: plurimis exantlatis laboribus, S. Thomæ Custodiam erigere, atque plantare cœpit; quæ adèò excrevit, ut plurimis provinciis equiparari, imò potius præferri optimo jure possit; quâ etiam de causâ, in Generali Toletanâ Congregatione anno Domini 1483. celebrata, à patribus decretum fuit, ut Provinciæ dignitate honestaretur: De orig. Seraph. Relig. part.3. initio descriptionis provinciæ Portugalliæ. Item par.4. initio descri-

descriptionis provinciæ S. Thomæ apud Indos Orientales.

Christophorus à Capite Fontium, Ordinis Minorum,
Archiepiscopus Cæsariensis.

In Indias etiam Orientales, quæ hodie regi Portugallie parent, primi et ipsi Franciscani prædicandæ fidei causâ, longissimâ et periculossimâ navigatione trajecere: ubi multis ad finem conversis populis, edificatisque Ecclesiis, et monasteriis quamplurimis, multa regna, oppida, provincias, et urbes Christi imperio subjugarunt; idque antequam Sodalium nominis Jesu instituta religio foret; quibus si primam illarum gentium conversionem quisquam attribuere vellet, summâ nostros, aliosque Mendicantes religiosos injuriâ, debitam illis suffurando laudem, afficeret: jam enim per quadraginta ad minus annos, antequam quispiam illuc pervenisset Jesuita, gentes illas Christo nostri verbi Dei falce metebant; qui, si quanta per eos Deus ad illarum gentium conversionem fecit, non scripserunt; non minùs tamen vera sunt quæ dico. Epist. ante Compendium privilegiorum Fratrum Minorum.

Franciscus Gonzaga, Ordinis Minorum,
Episcopus Mantuanus.

Ut paucis multa perstringam, Quicquid in Indiâ Orientali, per quadraginta continuos annos, laboris fuit, sive in infirmis curandis, sive infidelibus convertendis, sive in Cathecumenis instruendis, sive in conversis in officio continendis, sive in Sacramentis administrandis, sive etiam in aliis operibus caritatis exercendis: id totum ex Franciscanorum humeris pependit. De orig. Seraph. Relig. part. 4. in descriptione provinciæ S. Thomæ apud Indos Orientales.

c

Ra-

Raphael Volaterranus .

Franciscus Aſiſinas , tamquam novum ſidus in terris apparuit , teſte Bonaventurâ , qui ejus vitam exſequitur : Conſervatoris noſtri ſerè per omnia typum geſſit . Lib.21. Anthropol.

Joannes Oſorius . Societatis Jeſu . .

Solet pictoris ars in multis oſtendi , præcipuè verò in depingendo corpore nudo . Facile enim eſt pictori hominem veſtitum depingere : at difficillimè admodum nudum pingit . Tanta enim in corpore humano ſunt , & adeò diverſa , ut perfectè effigiari non poſſint , niſi à ſupremo artifice . Ad hunc modû , gratiæ quidem munus eſt , depingere in hominum animis Chriſtum Dominum . Hinc Paulus : Filioli quos iterum parturio , donec formetur Chriſtus in vobis : quia conformes nos fieri vult imagini Filii ſui . Sed in quibuſdam gratia divina pingit Chriſtum indumentis ornatum ; & id facile gratia præſtat ; in aliis verò depingit Chriſtum nudum , ut in Francisco ; & id quidem difficile admodum eſt , & niſi eximia gratia id non præſtat ; ut enim homo omnibus ſe expoliet , maximâ indiget gratiâ . Concion. de S. Francisco .

Bartholomæus Piſanus Ordinis Minorum . .

Sanctus Franciſcus paupertatem diligenter , & ſummo affectu quaſivit per vicos & plateas : id eſt , inter homines qui tunc vivebant . Et quia obliterated erat paupertatis ſemita & memoria , non invenit : Per nobiles quaſivit & potentes , nec invenit : quia omnes à majore uſque ad minimum divitiis inhiabant & avaritiæ . Hæc ſiquidem paupertas , etſi primo homini adheſit cum eſſet conditus , quia

quia nudus : tamen peccando, & tunicâ pelliceâ induto, ac labori manuum tradito, ab ipso recessit. A Patribus veteris testamenti abiit : quia terram fluentem lac & mel in promissione acceperunt. Sed Domino Iesu Christo descendente de monte sue majestatis, per carnis assumptionem, hanc secum de cœlo ad terram devexit : & cum ipso, nascendo, vivendo, & moriendo est commorata fideliter & indissolubiliter. Hanc commendavit suis discipulis, & grata illis fuit, & multis aliis fidelibus. Beatus Franciscus montem Domini ascendit, Patrem cœlestem exorando, ut eam sibi in sponsam, sociam, & dominam mittere dignaretur. &c. Confor. fruc. 16.

Iustus Lipsius.

Quot viri boni beatique paupertatem appetiere vult!
Litteræ ipsæ divinæ eam nobis conciliant, ut rectam ad
cœlos viam. Centu. 1. epist. 19.

Gulielmus Pepin Ordinis S. Dominici.

Ut vitis in luxurioso solo degenerat, fit verò in arente
nobilior : sic instituta monastica & Ordines proficiunt, &
firmantur ab illa rerum virtutumque servatrice inopia.
contra, copia & opes pleraque talia everterunt & evertent
tarde aut citò, ut occasio aut ingenia se dabunt. Ex Ser. de
S. Francisco.

Ioannes Trithemius Ordinis S. Benedicti;
Abbas Spanhemius.

Franciscus Ordinis Minorum institutor & princeps,
natione Italus, ex Asisio civitate Italia oriundus fuit; vir
sanctissima conversationis, & Evangelicæ paupertatis ar-
dentissimus sectator : qui verbo & exemplo multos ab ini-

quitate convertit; & in viam iustitiæ Catholicæ direxit. Tantus amator Christi existit, ut in contemptu mundi, & consolationis transitoriæ parem vix habuerit. In cuius Ordine multi jam deinceps doctissimi viri claruerunt, qui ad utilitatem fidelium, innumera penè composuerunt opuscula. Ipse autem Franciscus scripsit brevem.

Regulam Minorum. Lib. 1. *Regula & vita.*

Testamentum breve. Lib. 1. *Dominus dedit mihi: Claruit sub Frederico Imperatore Secundo. Anno Dom. M. CCXX.*

Præter ista alia quoque exstant S. Francisci monumenta, quæ apud nos habentur: ut sunt.

Admonitiones ejus. Lib. 1. *Franciscus in admonitionibus.* *Orationes piæ ad diversos.*

† *Epistolæ variorum argumentorum.* quibus tum fratres sui instituti, tum omnes Christianos ad caritatem, virtutes, & summum honorem Sacrosanctæ Eucharistiæ habendum, efficacissimè adhortatur. Hæc in manibus nostrorum, & opportunè citamus in nostro ad vitam S. Francisci Commentario. Forsitan audebunt aliquando videre lucem.

Elogia in S. Franciscum.

hæc quæ habui; exemplum tibi erit, latiora cum inveneris, qui nostra augeas, & magis ornes. Nunc etiam encomiis aliquot magnorum virorum illustrabo

Historiam vitæ S. Francisci.

à Sancto Bonaventurâ S. R. E. Cardinale Episcopo piè & graviter, tum etiam magnâ cum laude conscriptam.

S. Anto-

S. Antoninus Ordinis S. Dominici, Archiepiscopus
Florentinus.

S. Bonaventura stilo mirabili vitam Beati Francisci compilavit : ipsamque diffusam ad compendiosorem formam reduxit ; in qua nihil posuit nisi certum , & probatum testibus fide dignis . Histor. par. tertiâ . tit. 24. cap. 8. .

Joannes Clichtovæus .

Vitam beati Francisci sanctus Bonaventura cum magnâ pietate, & sinceritate conscripsit. Conc. de S. Franc.

Ludovicus Granatensis Ordinis S. Dominici .-

Quisquis beati Francisci vitam , quam sanctissimus Bonaventura conscripsit , diligenter attenderit : inveniet planè pulcherrimum quoddam certamen inter Deum ipsumque Franciscum intercessisse . Vir enim sanctus , Dei voluntatem in omnibus exsequi nitebatur : Deus contrâ ; sancti viri voluntati omnibus in rebus obsequabatur . Ille abjectione sui , Dei gloriam fidelissimè querebat : Deus contrâ , servi honorem modis omnibus amplificabat . Ille totus divinæ voluntatis obedientiæ traditus erat : contrâ verò Deus creaturas omnes , atque ad eò semetipsum , obedientem illi exhibebat . Ille omnia propter Deum reliquerat : at Deus omnia illi rursus centuplum aucta rependebat ; hoc ita esse deprehender , quisquis (ut modò dixi) ejus vitam , & res ab eo gestas perlegerit . Nihil enim in eâ non summum , nihil non novum , & mirabile inveniet. Conc. 4. de S. Francisco .

Aloisius Lypomanus Episcopus Veronensis :

Hanc divi Francisci vitam , beatus ille Bonaventura
S. R. E.

S. R. E. Cardinalis ; & Episcopus Albanensis, Franciscani instituti non solum sectator, verum & instaurator & rector ; vir in divinis Scripturis eruditissimus, de quo preceptor ejus Alexander ab Hales dicere solebat, In Bonaventurâ Adam peccasse non videtur ; puro ac simplici stilo descripsit, tantâ rerum copiâ, & sententiarum gravitate refertam, ut totus mundus ejus lectione instrui possit, & ad amorem Dei, per beati Francisci exemplum instaurari. Ego (ut verum fatear) cum S. Francisci vitam lego, non solum accendor, sed in ejus meditatione totus exardeo : utpote in quo tanta divini amoris claritas effulserit, ut Angelus potius, atque ex supremo ordine, qui ardor & incendium dicitur, magis quam homo dici posse videatur. Semper enim beatissimus iste, cogitatione in cœlo versabatur ; semper felix ejus anima summo Auctori purissimè & intentissimè inhaerebat : adèd, ut præ amoris magnitudine (quod hominibus plerumque ardentissimè amantibus contingere solet) alienatus à sensibus, atque extra se esse videretur.

Accede & tu benigne lector, accede ad sanctum istum ignem : certò scio calestes plus satis.



Illu-

Illustrium vel sanctitate , vel doctrina Virorum de hoc Opere judicium.

Legendam banc compilavit Seraphicus Ecclesiæ Doctor S. Bonaventura anno 1261. Parisiis , nihil sacræ admiscens historiæ , nisi probatum , & certum candidis testimoniis assertum . Mirabili stylo banc scripsisse legendam testatur Antoninus tit. 24. c. 8. sed & eam mirificè plerique commendant , præcipue Aloisius Lyppomanus Episcopus Veronensis in prol. Vitæ S. Francisci , qui puro ac simplici stylo descriptam , ait , tantâ rerum copiâ , & sententiarum gravitate refertam , ut totus mundus ejus lectione instrui possit , & ad amorem Dei per Beati Francisci exemplum instaurari . Et de se ipso fatetur , quod quoties hanc vitam legerit , toties non solum accensus sit ; sed in ejus meditatione totus exarserit . Leonardus Arretinus vetustus author , eruditionis , & eloquentiæ laudè clarus , cum legendam banc studiòse legisset , sententiam rogatus , dixit : in illo scribendi genere à nemine illum superari posse . Neque id mirum planè scriptam , quam inter divinas meditationes , & raptus cœlestes potius dictatam , quam humanâ industriâ elaboratam indicet sequens eventus : D. Thomas Aquinas , qui eadem tempestate pari virtute claruit , & doctrinâ , cum Bonaventuram summâ sibi charitate conjunctum , tunc summo affectû studentem in contemplando , & concinnando quam diximus , vitam inviseret ; per rimulas ostii prospiciens ; vidit illum in contemplatione raptum , & à terrâ mirificè sublevatum : tum retrocedens ad suos : sinamus,

mus, inquit, sanctum, quia laborat pro Sancto : Magni viri magnum profectò testimonium, quo viventem amicum Sanctum appellavit, & rectè scribentem commendavit. Locus, ubi hoc contigit, adhuc Parisiis in æde Minorum extat instar sacelli, tamquam rei mirabiliter gestæ monumentum. Legendam banc obtulit triennio post in Comitiiis Pisanis Patribus Ordinis, quam reverenter cum gratiarum actione, suppressis aliis quibusque legendis, admiserunt.

Ex Wading. tom. 2. Annal. Minorum ad ann. 1260.
n. 18.



I N D E X

Capitum cum Prologo Operis.

<i>Prologus.</i>	pag. 3
C A P U T I.	
<i>De conversatione ejus in habitu seculari.</i>	9
C A P U T II.	
<i>De perfecta conversione ejus ad Deum, & de reparatione trium Ecclesiarum.</i>	15
C A P U T III.	
<i>De Institutione Religionis, & approbatione Regule.</i>	22
C A P U T IV.	
<i>De profectu Ordinis sub manu ipsius: & confirmatione Regule prius adprobata.</i>	31
C A P U T V.	
<i>De austeritate vite ejus; & quomodo Creatura præbebant ei solatium.</i>	41
C A P U T VI.	
<i>De humilitate ejus, & obedientiâ; & de condescensionibus ei factis ad nutum.</i>	51
C A P U T VII.	
<i>De amore paupertatis, & mirâ suppletionem defectuum.</i>	61
C A P U T VIII.	
<i>De pietatis affectu, & quomodo ratione carentia adfici videbantur ad ipsum.</i>	71
C A P U T IX.	
<i>De fervore caritatis ejus; & desiderio Martyrii.</i>	82

CAPUT X.	
<i>De studio, & virtute orationis.</i>	91
CAPUT XI.	
<i>De intelligentiâ Scripturarum, & spiritu Prophetiæ.</i>	98
CAPUT XII.	
<i>De efficaciâ prædicandi, & gratiâ sanitatum.</i>	108
CAPUT XIII.	
<i>De Stigmatibus Sacris.</i>	118
CAPUT XIV.	
<i>De patientiâ ipsius, & transitu mortis.</i>	128
CAPUT XV.	
<i>De canonigatione ipsius, & translatione corporis sacri.</i>	134
CAPUT XVI.	
<i>Miracula aliquot à S. Francisco post ejus obitum edita.</i>	140
§. 1.	
<i>De virtute Sacrorum Stigmatum. ibidem.</i>	
§. 2.	
<i>De Mortuis suscitatis.</i>	147
§. 3.	
<i>De his, quos à mortis periculo liberavit.</i>	151
§. 4.	
<i>De liberatis à naufragio.</i>	158
§. 5.	
<i>De liberatis à vinculis, & carceribus.</i>	161
§. 6.	
<i>De liberatis à periculo partus.</i>	164
§. 7.	
<i>De Cæcis illuminatis.</i>	168
§. 8.	

§. 8.	
<i>De liberatis à variis infirmitatibus .</i>	172
§. 9.	
<i>De non observantibus festum , & non honorantibus San- ctum .</i>	176
§. 10.	
<i>De quibusdam aliis miraculis diversorum generum .</i>	178





Effigie di S. Francesco d'Assisi



PROLOGUS.

*Incipit Legenda major composita
per S. Bonaventuram de Vitâ
Beati Patris Nostri
FRANCISCI.*



APARUIT gratia Dei Salvatoris nostri;
diebus istis novissimis in Servo suo
Francisco; omnibus verè humilibus;
& sanctæ paupertatis amicis: qui su-
peraffluentem in eo Dei misericor-
diam venerantes, ipsius erudiuntur
exemplo, impietatem & sæcularia
desideria funditus abnegare, Christo conformiter vivere,
& ad beatam spem desiderio indefesso sitire. In ipsum
namque ut verè pauperculum & contritum, tantâ Deus
excellens benignitatis condescensione respexit; quod non
solum de mundialis conversationis pulvere suscitavit ege-
num;

num; verum etiam Evangelicæ perfectionis professorem, ducem, atque præconem effectum, in lucem dedit credentium: ut testimonium perhibendo de lumine, viam lucis & pacis ad corda fidelium Domino præpararet. Hic etenim *quasi stella matutina in medio nebula*, claris vitæ micans & doctrinæ fulgoribus, sedentes in tenebris & umbrâ mortis, irradiatione præfulgidâ direxit in lucem. Et tanquam *arcus refulgens inter nebulas gloriæ*, signum in se Dominici fœderis repræsentans, pacem & salutem evangelizavit hominibus, existens & ipse Angelus veræ pacis. Secundum imitatoriam quoque similitudinem præcursoris destinatus à Deo, ut viam parans in deserto altissimæ paupertatis, tam exemplo quam verbo penitentiam prædicaret: primum supernæ gratiæ præventus donis, dehinc virtutis invictæ adauctus meritis; prophetalique repletus spiritu, necnon & Angelico deputatus officio, incendioque Seraphico totus ignitus, & ut vir Hierarchicus curru igneo sursum vectus, sicut ex ipsius vitæ decursu luculenter apparet: rationabiliter comprobatur venisse in spiritu & virtute Eliæ. Ideoque alterius amici sponsi, Apostoli & Evangelistæ Joannis vaticinatione veridicâ, sub similitudine Angeli ascendentis ab ortu solis, signumque Dei vivi habentis, astruitur non immerito designatus. Sub apertione namque sexti sigilli, *Vidi*, ait Joan. in Apocalipsi, *alterum Angelum ascendentem ab ortu solis, habentem signum Dei vivi*. Hunc Dei nuncium amabilem Christo, imitabilem nobis, & admirabilem mundo; servum Dei fuisse Franciscum indubitabili fide colligimus, si culmen in eo eximæ sanctitatis advertimus: quâ inter homines vivens, imitator fuit puritatis Angelicæ; quâ & positus est perfectis Christi sectatoribus in exemplum.

Ad

PROLOGUS.

5

Ad quod quidem fideliter sentiendum & piè, non solum inducit officium, quod habuit vocandi ad fletum, & planctum, calvitium, & cingulum sacci; signandique *Thau super frontes virorum gementium, & dolentium*, signo poenitentialis crucis, & habitus cruci conformis: verum etiam irrefragabili veritatis testificatione, confirmat signaculum similitudinis Dei viventis, Christi videlicet Crucifixi, quod in corpore ipsius fuit impressum, non per naturæ virtutem, vel ingenium artis, sed potius per admirandam potentiam spiritus Dei vivi. Ad hujus tam venerabilis Viri vitam, omni imitatione dignissimam describendam, indignum & insufficientem me sentiens, id nullatenus attentassem; nisi me fratrum fervens incitasset affectus: generalis quoque Capituli concors induxisset instantia. Et ea, quam ad Sanctum Patrem habere teneor, devotio compulisset: utpote qui per ipsius invocationem & meritum, in puerili ætate (sicut recenti memoriâ teneo) à mortis faucibus erutus; si præconia laudis ejus tacuero, sceleris timeo argui ut ingratus. Est & hæc penes me causa præcipua hunc assumendi laborem: ut ego, qui vitam corporis & animæ à Deo mihi conservatam recognosco per ipsum, & virtutem ejus in me ipso expertus agnovi; vitæ illius virtutes, actus, & verba, quasi fragmenta quædam partim neglecta, partimque dispersa, quamquam plene non possem, utcumque colligerem: ne morientibus iis, qui cum famulo Dei convixerant, deperirent. Ut igitur Vitæ ipsius veritas ad posteros transmittenda, certius mihi constaret & clarius: adiens locum originis, conversationis, & transitus viri sancti; cum familiaribus ejus adhuc super-viventibus, collationem de iis habui frequentem ac diligentem. Et maximè cum quibusdam qui sanctitatis ejus,

& con-

& conficii fuerunt, & ſectatores præcipui: quibus propter agnitam veritatem, probatamque virtutem, fides eſt indubitabilis adhibenda. In deſcriptione autem eorum, quæ per ſervum ſuum Deus dignanter effecit, curioſum ſtyli ornatum negligendum eſſe putavi: cùm legentis devotio plus ſimplici ſermone, quàm phalerato proficiat. Nec ſemper hiftoriam ſecundùm ordinem temporis texui, propter confuſionem vitandam: ſed potiùs ordinem ſervare ſtudi magis aptæ juncturæ, ſecundùm quod eodem peracta tempore, diverſis materiis, vel diverſis patratis temporibus, eidem materiæ congruere videbantur. Initium autem vitæ ipſius, progreſſus, & conſumatio, quindecim diſtincta Capitulis deſcribuntur inferiùs adnotatis.

Agitur enim primo, de Converſatione ipſius in habitu ſæculari.

Secundo, de perfectâ Converſione ejus ad Deum. & de Reparatione trium Eccleſiarum.

Tertio, de Inſtitutione Religionis. & Approbatione Regulæ.

Quarto, de Proſectu Ordinis ſub manu ipſius. & Confirmatione Regulæ priùs approbatæ.

Quinto, de Aulteritate vitæ. & quomodo creaturæ præbebant ei ſolatium.

Sexto, de Humilitate, & Obedientiâ. & de Condeſcenſionibus divinis ſibi factis ad nutum.

Septimo, de amore Paupertatis. & mirâ Suppletionem defectuum.

Oſtavo, de Pietatis affectu. & quomodo ratione carentia affici videbantur ad ipſum.

Nono, de fervore Charitatis. & deſiderio Martyrii.

Decimo, de ſtudio & virtute Orationis.

Unde.

PROLOGUS.

7

Undecimo, de Intelligentiâ Scripturarum. & spiritu Prophetiæ.

Duodecimo, de Efficaciâ prædicandi. & Gratia sanitatum.

Decimotertio, de Stigmatibus sacris.

Decimoquarto, de Patientia ipsius. & Transitu mortis.

Decimoquinto, de Canonizatione. & Translatione ipsius. Postremo, de Miraculis post transitum ejus felicem ostensis aliqua subnectuntur.



L. P. Pinx.

De



De Conversatione ejus in habitu seculari .

C A P U T I.



Vix erat in Civitate Assisii Franciscus nomine , cujus memoria in benedictione est : pro eo quòd Deus ipsum in benedictionibus dulcedinis benignè præveniens , & de præsentis vitæ periculis clementer eripuit , & cælestis gratiæ donis affluenter implevit . Etenim cùm inter vanos fuerit hominum filios , juvenili ætate nutritus in vanis ; & post aliqualem litterarum notitiam , lucrativis mercationum deputatus

B

nego-

negotiis : superno tamen sibi assistente præsidio , nec inter lascivos juvenes , quamvis effusus ad gaudia , post carnis petulantiam abiit ; nec inter cupidos mercatores , quam intentus ad lucra , speravit in pecuniâ & thesauris . Inerat namque juvenis Francisci præcordiis , divinitus indita quædam ad pauperes miseratio liberalis : quæ secum ab infantia crescens , tantâ cor ipsius benignitate repleverat , ut jam Evangelii non surdus auditor , omni proponeret se petenti tribuere , maximè si divinum allegaret amorem .

Cùm autem semel negotiationis intentus tumultibus , pauperem quendam , pro amore Dei petentem eleemosynam , præter morem solitum , vacuum repulisset : statim ad cor reversus , cucurrit post ipsum ; & eleemosynâ illi clementer impensâ , promissit Domino Deo , quòd nunquam ex tunc , dum adesset possibilitas , perentibus pro amore Domini se negaret : quod usque ad mortem indefessâ pietate observans , copiosa in Deum dilectionis & gratiæ incrementa promeruit . Aiebat enim post , cùm jam perfectè Christum induerat , quòd etiam existens in habitu sæculari , vocem divini expressivam amoris audire vix unquam sine cordis immutatione valebat . Porro mansuetudinis lenitas , cum elegantia morum , patientia , & tractabilitas supra humanum modum , munificentie largitas ultra suppetentiam facultatum ; quibus bonæ indolis adolescens certis florere conspiciebatur indiciis ; quædam videbantur esse præludia , quòd copiosior super eum foret in posterum divinæ benedictionis abundantia diffundenda .

Quidam sanè vir de Assisio valde simplex (ut creditur , eruditus à Deo) cùm aliquando per civitatem eunti obviaret

obviaret Francisco ; deponebat pallium , sternebat ipsius pedibus vestimentum ; asserens omni fore Franciscum reverentiâ dignum : utpote qui esset in proximo magna facturus ; & ob hoc ab universitate fidelium magnificè honorandus. Ignorabat autem adhuc Franciscus circa se consilium Dei : pro eo quòd tam jussione patris , ad exteriora distractus , quàm corruptione naturalis originis ad inferiora depressus , nondum didicerat contemplari cœlestia , nec assueverat degustare divina . Et quia spiritali auditui dat intellectum inflicta vexatio : facta est super eum manus Domini , & immutatio dexteræ excelsi ; diutinis languoribus ipsius corpus affligens , ut coaptaret animam ad sancti spiritus unctionem . Cumque resumptis corporis viribus , sibi vestimenta decentia more solito præparasset : obvium habuit militem quendam generosum quidem , sed pauperem , & malè vestitum ; cujus pauperiem pio miseratus affectu , illum protinus , se exuto , vestivit ; ut simul in uno geminum implemet pietatis officium , quò & nobilis militis verecundiam tegeret , & pauperis hominis penuriam relevaret .

Nocte verò sequenti , cùm se sopori dedisset ; palatium speciosum & magnum , cum militaribus armis crucis Christi signaculo insignitum , clementia sibi divina monstravit : ut misericordiam pro summi Regis amore , pauperi exhibitam militi , præstenderet incomparabili compensandam esse mercede . Unde & cùm quæreretur , cujus essent illa omnia : sua fore , militumque suorum , supernâ fuit assertione responsum . Evigilans itaque manè , cùm nondum haberet exercitatum animum ad divina perscrutanda mysteria : nesciretque per visibilibus species transire ad contuendam invisibilium veritatem : magnæ fore pro-

speritatis indicium æstimabat insolitam visionem. Disposuit itaque, divinæ adhuc dispositionis ignarus, in Apuliam ad quendam liberalem Comitem se conferre: in ipso sperans obsequio decus adipisci militiæ; ut ostensa sibi visio prætendebat. Cumque paulò post iter aggressus, ivisset usque ad proximam civitatem; audivit in nocte Dominum familiari sibi allocutione dicentem: Franciscè, quis potest melius facere tibi? Dominus, an servus? dives, an pauper? Cui cum Franciscus respondisset, quòd tam Dominus quàm dives facere melius potest: intulit statim: Cur ergo relinquis pro servo Dominum, & pro paupere homine divitem Deum? Et Franciscus, Quid me vis, Domine facere? Et Dominus ad eum: Revertere in terram tuam: quia visio quam vidisti, spiritualem præfigurat effectum; non humanâ, sed divinâ in te dispositione complendum. Mane itaque factò, cum festinatione revertitur Assisium, securus & gaudens: & jam exemplar obedientiæ factus, expectebat Domini voluntatem. Ex tunc, à publicæ negotiationis tumultu se subtrahens, supernam devotè precabatur clementiam: ut quid sibi foret agendum, ostendere dignaretur. Cum autem ex frequenti orationis usu, flamma desiderii cælestis in eo vehementer succresceret; & jam pro amore supernæ patriæ, terrena omnia despiceret quasi nihil; thesaurum sentiebat se reperisse absconditum; ac, velut prudens negotiator, margaritam inventam excogitabat, venditis omnibus, comparare. Adhuc tamen qualiter id ageret, ignorabat: nisi quia ipse suggerebatur spiritui, quòd spiritualis mercatio à mundi contemptu sumat initium; *Christique militia sit à sui ipsius victoriâ inchoanda.*

Quâdam itaque die, dum equitaret per planitiem, quæ

quæ subjacet civitati Assisii; leprosum quendam habuit obvium: cujus inopinatus occurfus, ei non parvum incussit horrorem. Recurrens autem ad perfectionis mentem jam conceptæ propositum; & recolens quòd seipsum oporteret primùm devincere, si vellet effici Christi miles: ad deosculandum eum, equo lapsus adcurrit. Cui cum manum, quasi aliquid accepturus, leprosus protenderet; pecuniam cum osculo reportavit. Statim autem equum, ascendens, & se circumquaque convertens; cum campus pateret undique liber; leprosum illum minimè vidit. Admiratione itaque repletus & gaudio, laudes cœpit Domino decantare devotè; proponens ex hoc semper ad majora conscendere.

Solitaria proinde loca quærebat, amica mororibus: in quibus dum gemitibus inenarrabilibus incessanter intenderet, post longam precum instantiam, à Domino meruit exaudiri. Dum enim unâ dierum sic sequestratus oraret; & præ nimietate fervoris, totus esset absorptus in Deum; apparuit ei Christus Jesus, veluti cruci confixus: ad cujus conspectum liquefacta est anima ejus: & memoria passionis Christi, visceribus cordis ipsius adeò impressa medullitus, ut ab illâ horâ, cum Christi crucifixio veniret in mentem, vix posset à lacrymis & gemitibus exteriùs contineri: sicut ipse postmodum familiariter retulit, cum appropinquaret ad finem. Intellexit per hoc nempe vir Dei, illud Evangelicum sibi dici: *Si vis venire post me, abnega te ipsum, & tolle crucem tuam, & sequere me.* Induit ex tunc spiritum paupertatis, humilitatis sensum, & affectum intimæ pietatis. Nam cum priùs, leproforum non solum consortium, verùm etiam longinquum contuitum vehementer horreret: jam propter Christum crucifixum,

fixum ; qui juxta verbum Propheticum ; contemptibilis ut leprosus apparuit ; ut semetipsum plenè contemneret , humilitatis & humanitatis obsequia leprosis beneficâ pietate præstabat . Visitabat enim frequenter domos ipsorum : liberaliter eis eleemosynas erogabat : & cum multo compassionis affectu , manus eorum osculabatur & ora . Pauperibus etiam mendicantibus non solum sua , verum etiam seipsum cupiebat impendere : aliquando vestimenta exuens , aliquando dissuens , aliquando seindens , ad largiendum eis , cum præmanibus alia non haberet . Sacerdotibus etiam pauperibus reverenter subveniebat & piè , præcipuè in ornamentis altaris : quò & cultus divini particeps fieret , & cultorum inopix supplementa præberet .

Cum autem religiosâ devotione , tunc temporis , limina visitaret Apostoli Petri : conspectâ multitudine pauperum ante fores Ecclesiæ ; partim pietatis ductus dulcedine , partim paupertatis affectus amore ; uni ex eis magis egenti proprias largitus est vestes , & semicinctiis contactus illius , diem illum in medio pauperum cum insolitâ spiritus jucunditate transiegit : ut & sæcularem gloriam sperneret , & ad perfectionem Evangelicam gradatim conscendendo perveniret . Mortificationi carnis invigilabat attentius : ut Christi crucem , quam interius ferebat in corde , exterius etiam circumferret in corpore . Agebat autem hæc omnia Vir Dei Franciscus , nondum habitu , vel convictu sequestratus à mundo .



De



*De perfectâ Conversione ejus ad Deum ;
& de Reparatione trium
Ecclesiarum.*

C A P U T II.



QUONIAM autem Servus Altissimi, doctorem non habebat aliquem in hujusmodi, nisi Christum : addidit adhuc ipsius clementia cum in gratiæ visitare dulcedine. Dum enim die quâdam egressus ad meditandum in agro, decambulare juxta Ecclesiam S. Damiani, quæ minabatur præ nimia vetustate ruinam ; & in eam, instigante se spiritu, causâ orationis intrasset : prostratus ante Imaginem Crucifixi, non modicâ fuit in orando spiritus consolatione repletus. Cumque lacrymosis oculis intenderet in dominicam Crucem ; vocem de ipsâ Cruce dilapsam ad eum, corporeis auditur auribus ter dicentem ; *Francisce, vade, & repara domum meam, quæ ut cernis, tota destruitur.* Tremefactus Franciscus, cum esset in Ecclesiâ solus, stupet ad tam mirandæ vocis auditum ;

tum; cordeque percipiens Divini virtutem eloquii, mentis alienatur excessu. In se tandem reversus, ad obediendum se parat; & totum se recolligit ad perficiendum mandatum, de materiali Ecclesiâ reparandâ: licet principalior intentio verbi ad eam ferretur, quam Christus suo sanguine acquisivit: sicut eum Spiritus Sanctus edocuit, & ipse postmodum fratribus revelavit. Surrexit proinde, signo Crucis se muniens; & assumptis pannis venalibus, ad civitatem, quæ Fulgineum dicitur, festinus accessit: ibique venditis quæ portaverat, equum cui tunc infederat, felix mercator, assumpto pretio, dereliquit. Rediensque Assisum, Ecclesiam, de cujus reparatione mandatum acceperat, reverenter intravit: & invento illic Sacerdoti pauperculo reverentiam decentem exhibuit; & ad reparationem Ecclesiæ, & pauperum usum pecuniam obtulit: & ut secum se morari pateretur ad tempus, humiliter requisivit. Acquievit Sacerdos de morâ ipsius: sed timore parentum pecuniam non recepit, quam verus pecuniarum contemptor in quandam fenestram projiciens, abjectam velut pulverem vilipendit.

Moram autem faciente servo Dei cum Sacerdote prædicto; cum hoc intellexisset pater ipsius; perturbatus animo cucurrit ad locum. At ipse, quia novus Christi erat athleta; cum audiret persequentium minas, & eorum præsentiret adventum: dare locum iræ volens, in quâdam occultâ foveâ se abscondit: in quâ diebus aliquibus latitando, rogabat Dominum incessanter, lacrymarum imbre perfusus, ut liberaret de manibus persequentium animam suam: & pia, quæ inspiraverat, vota benigno favore compleret. Igitur excessivâ quadam completus lætitiâ, cœpit de pusillanimitatis ignaviâ semetipsum arguere: reli-
ctâque

etâque foveâ, & abjecto pavore, versus Civitatem Assisii iter aggressus est. Quem cum cives cernerent facie squallidum, & mente mutatum; ac per hoc alienatum putarent à sensu: luto platearum, & lapidibus impetebant; & tanquam infano & dementi, clamoris vocibus insultabant. Famulus autem Domini nullâ fractus aut mutatus injuriâ, ut surdus in omnibus pertransibat. Cumque clamorem hujusmodi pater audisset, statim accurrens, non ad liberandum eum, sed potius ad perdendum: omni miseratione subtractâ, pertractum domi primò verbis, deinde verberibus & vinculis angit. Ipse autem ad exsequendum quod cæperat, promptior ex hoc & validior reddebatur: recolens illud Evangelii verbum: *Beati qui persecutionem patiuntur propter justitiam: quoniam ipsorum est regnum celorum.*

Post modicum verò tempus, patre à patriâ discedente, mater ejus factum mariti non approbans; & inflexibilem filii constantiam emolliri posse non sperans: à vinculis absolutum abire permisit. At ipse gratias omnipotenti Deo referens, ad locum in quo prius fuerat, est reversus. Rediens autem pater, & eum non inveniens domi, convitiis illatis uxori, fremens cucurrit ad locum: ut si eum revocare non posset, saltem de provinciâ effugaret. Franciscus verò confortatus à Deo, obvium ultrò se obtulit patri furenti, liberâ voce clamans, se pro nihilo ducere vincula & verbera ejus: insuper & contestans, se pro Christi nomine gaudenter mala omnia subiturum. Videns itaque pater quòd eum revocare non posset, ad extorquendam pecuniam se convertit: quâ tandem inventâ in fenestrenulâ quadam, aliquantulum ipsius mitigatus est furor, avaritiæ sibi utcumque per hauritum pecuniæ temperatâ.

C

Ten-

Tentabat deinde pater carnis, filium gratiæ, pecuniâ jam nudatum ducere coram Episcopo civitatis: ut in ipsius manibus, facultatibus renunciaret paternis, & omnia redderet quæ habebat. Ad quod faciendum, se promtum exhibuit verus paupertatis amator. Perveniensque coram Episcopo, nec moras patitur, nec cunctatur de aliquo, nec verba expectat, nec facit: sed continuo depositis omnibus vestimentis, restituit ea patri. Inventus est autem tunc vir Dei cilicium habere ad carnem, sub vestibus delicatis. Insuper ex admirando fervore, spiritu ebrius, rejectis etiam femoralibus, totus coram omnibus denudatur, dicens ad patrem: *Usque nunc vocavi te patrem in terris, amodo autem securè dicere possum, Pater noster qui es in celis: apud quem omnem thesaurum reposui, & omnem spei fiduciam collocaui.* Hoc cernens Episcopus, & admirans tam excedentem in viro Dei fervorem, protinus exsurrexit: & inter brachia sua illum cum fletu recolligens, uti erat vir pius & bonus; pallio quo erat amictus operuit; præcipiens suis, ut aliquid sibi darent ad membra corporis contegenda. Oblatus est autem ei mantellus pauper & vilis, cujusdam agricolæ servientis Episcopo: quem ipse gratanter suscipiens, cum cæmento quod sibi occurrit, ad modum crucis manu propriâ consignavit; operimentum formans ex eo crucifixi hominis, & pauperis seminudi. Sic igitur servus Regis altissimi nudus relictus est, ut nudum sequeretur crucifixum Dominum, quem amabat: sic utique cruce munitus, ut animam suam ligno salutis committeret; per quod de mundi naufragio salvus exiret.

Solutus exinde mundi contemtor à vinculis mundarum cupidinum; civitate relictâ, securus & liber secretum

tum solitudinis petiit : ut solus & silens , supernæ audiret allocutionis arcanum . Dumque per silvam quandam iter faciens , laudes Domino linguâ Francorum , vir Dei Franciscus decantaret cum jubilo : latrones super eum ex abditis irruerunt . Quibus ferali animo , quis esset interrogantibus ; vir Dei confidentiâ plenus , Propheticâ voce respondit : Præco sum magni Regis . At illi percutientes eum , in defossum locum plenum nivibus projecerunt ; dicentes : Jace rustice , præco Dei . Ipse verò , recedentibus illis , exsilivit de foveâ : magnoque exhilaratus gaudio , altiori cœpit voce per nemora laudes Creatori omnium personare : & veniens ad quoddam vicinum cœnobium , eleemosynam petiit ut mendicus : & recepit ut incognitus & despectus . Inde verò progrediens , devenit Eugubium : ubi à quodam amico pristino agnitus & susceptus , paupere tuniculâ , ut Christi pauperculus , est contactus . Exinde , totius humilitatis amator se transtulit ad leprosos : eratque cum eis , diligentissimè serviens omnibus propter Deum . lavabat ipsorum pedes , ligabat ulcera , educebat plagarum putredinem , & saniem abstergebat . Osculabatur etiam ex mirandâ devotione ulcerosas plagas ipsorum , Evangelicus medicus mox futurus . Propter quod tantam est à Domino consequutus virtutem , ut in spiritualibus & corporalibus morbis mirabiliter expurgandis , mirabilem efficaciam obtineret .

Referam unum de multis , quod accidit , viri Dei famâ postmodum latiùs clarescente . Cùm enim cujusdam de comitatu Spoletano , os pariter & maxillam , morbus quidam horribili depascendo corroderet ; nec subveniri posset eidem aliquo medicinæ remedio : contigit ut propter sanctorum exposcenda merita , Apostolorum visitatis

luminibus; de peregrinatione rediens, Servo Dei occurreret. Cumque præ devotione vellet ipsius osculari vestigia: vir humilis hoc non ferens, osculari volenti pedes, osculum oris dedit. Dum autem leproforum servus Franciscus, mirabili pietate, illam plagam horribilem ore sacro contingeret: omni fugato morbo, subito æger ille sanitatem recuperavit optatam. Nescio quod horum magis sit meritò, admirandum: an humilitatis profunditas in osculo tam benigno; an virtutis præclaritas, in miraculo tam stupendo.

Fundatus jam in Christi humilitate Franciscus, ad memoriam reducit obedientiam sibi è Cruce injunctam, de S. Damiani Ecclesiâ reparandâ; & tanquam verus obediens Assisium rediit: ut saltem mendicando, voci divinæ pareretur. Depositaque omni verecundia, propter amorem pauperis Crucifixi, mendicabat apud eos, inter quos abundare solebat; debile corpus, attritum jejuniis, oneribus lapidum supponendo. Prædictâ igitur Ecclesiâ, juvante se Domino, & devotione civium assistente, refectâ: ne post laborem corpus torperet ignaviâ, transtulit se ad reparandam Ecclesiam quandam B. Petri, longius à Civitate distantem: ob devotionem specialem, quam ad Apostolorum principem, synceræ fidei puritate, gerebat, Hac tandem Ecclesiâ consummatâ, pervenit ad locum qui Portiuncula dicitur: in quo Ecclesiâ Beatissimæ Virginis Genitricis Dei antiquitus fabricata extiterat, sed deserta tunc à nemine curabatur. Quam cum Vir Dei sic derelictam conspiceret, ob devotionem ferventem, quam habebat ad Dominam mundi; cœpit illic assidue, pro ipsius reparatione morari. Sentiens autem, juxta nomen ipsius Ecclesiæ, quo ab antiquo, S. Maria de Angelis vocabatur-

cabatur, Angelicarum ibi visitationum frequentiam: pedem fixit ibidem, propter reverentiam Angelorum, amoremque præcipuum Matris Christi.

Hunc locum Vir sanctus amavit præ ceteris mundi locis. Hic etenim humiliter cœpit: hic virtuosè profecit: hic feliciter consummavit: hunc in morte fratribus, tanquam Virgini charissimum, commendavit. De hoc, frater quidam Deo devotus, ante conversionem suam, visionem viderat relatione condignam. Innumeros cernebat homines cæcitæ percussos, facie in cælum directâ, & genibus flexis, in hujus Ecclesiæ stare circuitu: qui omnes protensis manibus in altum, lacrymabiliter clamabant ad Deum, misericordiam postulantes, & lumen. Et ecce ingens de cælo splendor advenit, se per omnes diffundens: qui lumen unicuique tribuit, & salutem desideratam concessit. Hic est locus, in quo Fratrum Minorum Ordo à S. Francisco, per divinæ revelationis instinctum inchoatus est. Divinæ namque providentiæ nutu, quâ Christi Servus dirigebatur in omnibus, tres materiales erexit Ecclesias, antequam Ordinem inchoans, Evangelium prædicaret: ut non solum à sensibilibus ad intelligibilia, à minoribus ad majora, ordinato progressu conscenderet; verum etiam, ut quid esset facturus in posterum, sensibili foris opere, mysterialiter præsignaret. Nam instar reparatæ triplicis fabricæ, ipsius sancti Viri ducatu; secundum datam ab eo formam, regulam, & doctrinam, Christi triformiter renovanda erat Ecclesia, trinaque triumphatura militia salvandorum; sicut & nunc cernimus esse completum.



De Institutione Religionis; & Approbatione Regulæ.

CAPUT III.



IN Ecclesiâ igitur Virginis matris Dei, moram faciente servo ipsius Francisco : & apud eam, quæ concepit Verbum plenum gratiæ & veritatis, continuis insistente gemitibus, ut fieri dignaretur Advocata ipsius : meritis Matris misericordiæ concepit ac peperit spiritum Evangelicæ Veritatis . Dum enim die quodam Missam de Apostolis devotus audiret : perfectum est Evangelium illud, in quo Christus Discipulis ad prædicandum mittendis, formam tribuit Evangelicam in vivendo; *ne videlicet possideant aurum, vel argentum, nec in xonis pecuniam, nec peram in via, nec duas tunicas habeant, nec calceamenta deferant, neque virgam* : Quod audiens & intelligens, ac memoriæ commendans Apostolicæ paupertatis amicus, indicibili mox perfusus lætitiâ; Hoc est, inquit, quod cupio : hoc quod totis præcor-

cordiis concupisco. Solvit proinde calceamenta de pedibus, deponit baculum, peram rejicit, & pecuniam execratur, unaq; contentus tuniculâ, rejectâ corrigiâ, pro cingulo funem sumit, omnem sollicitudinem cordis apponens, qualiter audita perficiat, & Apostolicæ rectitudinis regulæ per omnia se coaptet. Cœpit ex hoc vir Dei, divino instinctu, Evangelicæ perfectionis æmulator existere, & ad pœnitentiam ceteros invitare. Erant autem ipsius eloquia non inania, nec risu digna, sed virtute Spiritus Sancti plena, medullas cordis penetrantia: ut in vehementem stuporem audientes converterent. In omni prædicatione suâ, pacem annuncians, dicendo: *Dominus det vobis pacem*; populum in sermonis exordio salutabat. Hanc quippe salutationem, Domino revelante, dixerat: sicut ipse postmodum testabatur. Unde factum est, ut juxta sermonem Propheticum, & ipse Prophetarum spiritu afflatus, annuntiaret pacem, prædicaret salutem; ac salutaribus monitis fœderaret plurimos veræ paci, qui discordes à Christo prius, exstiterant à salute longinqui.

Innotescente itaque apud multos viri Dei tam doctrinæ simplicis veritate, quàm vitæ: cœperunt ipsius exemplo viri quidam ad pœnitentiam animari, & eidem, rejectis omnibus, habitu vitæque conjungi. Quorum primus extitit vir venerabilis Bernardus; qui vocationis Divinæ particeps factus, Patris beati primogenitus esse promeruit, tam prioritate temporis quàm privilegio sanctitatis. Hic enim Servi Christi sanctitate compertâ: ipsius exemplo disponens perfectè contemnere mundum, ab eodem qualiter id perficeret, consilium requisivit. Quo audito, Dei famulus, pro primæ prolis conceptu, Sancti Spi-

Spiritus consolatione repletus : à Deo est , inquit , hoc consilium requirendum . Intraverunt proinde Ecclesiam Sancti Nicolai , manè jam factò : & oratione præmissa , cultor Trinitatis Franciscus , ter Evangeliorum librum aperuit , trino exposcens à Deo testimonio , sanctum Bernardi propositum confirmari . In primâ libri aperitione illud occurrit , *Si vis perfectus esse , vade , & vende omnia quæ habes , & da pauperibus* . In secundâ : *Nihil tuleris in via* . In tertiâ verò : *Qui vult venire post me , abneget semetipsum , & tollat crucem suam , & sequatur me* . Hæc est , ait Vir sanctus , vita & Regula nostra , omniumque , qui nostræ voluerint societati conjungi . Vade igitur , si vis perfectus esse , & perface quæ audisti .

Non multò post , vocatis eodem spiritu quinque viris , filiorum Francisci senarius numerus completus est , inter quos tertium fortitus est locum sanctus Pater Ægidius , vir utique Deo plenus , & celebri memoriâ dignus . Hic etenim postmodum , virtutum sublimium exercitatione præclarus , (sicut famulus Domini de ipso prædixit) quanquam esset idiota , & simplex , ad excelsæ contemplationis sublimatus est verticem . Nam per multa curricula temporum , sursum actionibus incessanter intentus , adeò crebris in Deum rapiebatur excessibus : (quemadmodum & ego ipse oculatâ fide conspexi) ut magis censeretur inter homines vitam Angelicam agere , quàm humanam .

Illo quoque tempore , cuidam Sacerdoti Civitatis Assisii , nomine Silvestro , honestæ conversationis viro , quædam à Domino fuit ostensa visio non tacenda . Cùm enim modum , & vitam Francisci , fratrumque suorum humano spiritu abhorreret : ne periclitaretur pro temeritate

tate iudicii, respectu fuit supernæ gratiæ visitatus. Videbat namque in somnis, totam Allisii civitatem à dracone magno circumdari: præ cuius magnitudine nimiam, tota regio videbatur exterminio subiacere. Contuebatur post hæc, crucem quandam auream ex ore procedentem Francisci, cuius summitas cælos tangebatur, cuiusque brachia protensa in latum, usque ad mundi fines videbantur extendi; ad cuius etiam aspectum præfulgidum, draco ille teter & horridus, penitus fugabatur. Hoc dum sibi tertio monstraretur, divinum æstimans esse oraculum, viro Dei & fratribus suis per ordinem enarravit: ac non multo post tempore, mundum relinquens, vestigiis Christi sic perfecte adhæsit, quod vita ipsius in ordine, authenticam reddidit eam, quam in sæculo habuerat visionem. Ex hujus visionis auditu, vir Dei non in gloriam est elatus humanam: sed bonitatem Dei in suis beneficiis recognoscens, fortius animatus est ad hostis antiqui fugandam versutiam, & Crucis Christi gloriam prædicandam.

Quædam autem die, dum in quodam solitario loco annos suos in amaritudine recogitans deploraret: sancti Spiritus in eum superveniente latitiâ, certificatus est de remissione plenariâ omnium delictorum. Raptus deinde supra se, ac in quoddam mirandum lumen totus absorptus: dilatato mentis sinu, quæ circa se, & filios suos futura erant, luculenter aspexit. Post hoc reverfus ad fratres, Confortamini, ait, carissimi, & gaudete in Domino; nec quia pauci estis, efficiamini tristes, neque vos terreat mea vel vestra simplicitas: quoniam sicut mihi à Domino in veritate ostensum est, in magnam multitudinem faciet nos Deus crescere, suæque benedictionis gratiâ multipliciter dilatabit.

D

Eo-

Eodem quoque tempore, quodam alio bono viro religionem intrante, ad septenarium numerum, viri Dei soboles benedicta pervenit. Tunc pius pater omnes ad se filios convocavit: & plura eis de regno Dei, de contemptu mundi, de abnegatione propriæ voluntatis, corporisque castigatione pronuncians; propositum suum, de mittendo illos in quatuor partes orbis, aperuit. Jam enim sterilis, & paupercula simplicitas Sancti Patris, pepere-
rat septem filios: & desiderabat universitatem fidelium ad pœnitentiæ lamenta vocatam, Christo Domino parturire. Ite, inquit, dulcis pater ad filios, annuncian-
tes hominibus pacem: prædicate pœnitentiam in remis-
sionem peccatorum. Estote in tribulationibus patientes, in orationibus vigiles, in laboribus strenui, in sermo-
nibus modesti, in moribus graves, & in beneficiis grati:
quia pro his omnibus regnum vobis præparatur æternum.
At illi coram servo Dei humiliter se prosternentes in ter-
ram, cum gaudio spiritus suspiciebant obedientiæ sanctæ
mandatum. Ipse verò dicebat unicuique sigillatim, *Ja-*
Et cogitatum tuum in Domino, & ipse te enutriet. Hoc
verbum dicere solitus erat, quotiescunque fratrem ali-
quem ad obedientiam dirigebat. Tunc & ipse sciens se
datum aliis in exemplum, ut prius faceret, quam doce-
ret: cum uno sociorum versus unam orbis partem perre-
xit, reliquis sex ad modum Crucis, tribus aliis mundi
partibus deputatis. Modico autem elapso post tempore,
benignus pater caræ prolis exoptans præsentiam, cum in
unum eos per se convocare non posset: per eum orabat
hoc fieri, qui dispersiones congregat Israelis. Sicque fa-
ctum est, ut absque humanâ vocatione, omnes ex inspe-
rato, post modicum temporis, juxta ejus desiderium, divi-

divinâ operante clementiâ, non sine ipsorum admiratione, pariter convenirent. Illis quoque diebus, quatuor sibi adhærentibus viris honestis, ad duodenarium numerum excreverunt.

Cernens autem famulus Christi, paulatim accrescere numerum fratrum, scripsit sibi & fratribus suis, simplicibus verbis formulam vitæ: in quâ Sancti Evangelii observantiâ pro fundamento indissolubili collocatâ; pauca quædam alia inseruit, quæ ad uniformem vivendi modum necessaria videbantur. Desiderans autem per summum Pontificem approbari quæ scripserat: disposuit cum illo simplicium cœtu, Apostolicæ Sedis adire præsentiam, de solâ confusus directione divinâ. Cujus desiderium Deus ex alto respiciens, sociorum animos simplicitatis suæ consideratione perterritos, ostensâ viro Dei visione hujusmodi, confortavit. Videbatur siquidem ei, quòd per quandam viam incederet, juxta quam stabat arbor celsitudinis magnæ: ad quam cum appropinquasset, & sub eâ stans ipsius altitudinem miraretur; subito tantùm divinâ virtute levabatur in altum, ut cacumen contingeret arboris, ejusque summa facillimè curvaret ad ima. Hujus visionis prælagium, vir Deo plenus, intelligens referri ad condescensionem Apostolicæ dignitatis, exhilaratus est spiritu: fratribusque suis in Domino confortatis, iter cum eis aggressus est. Cùm autem ad Romanam Curiam pervenisset, & adduceretur ante conspectum Summi Pontificis; essetque Christi Vicarius in Palatio Lateranensi, in loco qui dicitur Speculum, deambulans, altissimis occupatus meditationibus; Christi famulum tanquam ignotum repulit indignanter. Quo humiliter foras egresso, sequenti nocte, hujusmodi revela-

tio facta est à Deo , ipsi Summo Pontifici . Videbat namque inter pedes suos palmam paulatim succrescere , & in arborem pulcherrimam elevari . Et eo mirante , quid hæc visio vellet ostendere : divina lux impressit menti ipsius Christi Vicarii , quòd hæc palma illum pauperem , quem in præcedenti die repulerat , designabat . Et mane sequenti mandavit per suos famulos , per urbem , dictum pauperem quæri . Quem inventum juxta Lateranum , in hospitali Sancti Antonii , ante conspectum suum celeriter jussit adduci . Cumque introductus esset ante conspectum Summi Pontificis , exposuit suum propositum : petens humiliter & instanter, supradictam sibi vivendi Regulam approbari . Videns autem Christi Vicarius , Dominus Innocentius Tertius , vir utique sapientiâ clarus , admirandam in viro Dei, simplicis animi puritatem , propositi constantiam , ignitumque voluntatis sanctæ fervorem : Christi pauperem mentis amore complectens , inclinatus est animo , ut pium supplicanti præberet assensum . Distulit tamen perficere , quod Christi postulabat pauperculus : pro eo quòd aliquibus de Cardinalibus novum aliquid , & supra vires humanas arduum videretur .

Aderat autem inter Cardinales vir venerandus ; Dominus Joannes de Sancto Paulo , Episcopus Sabinensis , omnis sanctitatis amator , & adjutor pauperum Christi : qui divino spiritu inflammatus , Summo Pontifici dixit , & fratribus suis : Si petitionem pauperis hujus , tanquam nimis arduam novamq. refellimus , cùm petat confirmari sibi formam Evangelicæ vitæ ; cavendum est nobis , ne in Christi Evangelium offendamus . Nam si quis intra Evangelicæ perfectionis observantiam , & votum ipsius , dicat contineri aliquid novum , aut ir-
ratio-

rationabile, vel impossibile ad servandum : contra Christum Evangelii auctorem blasphemare convincitur. Quibus propositis, successor Apostoli Petri conversus ad pauperem Christi, dixit; Ora fili ad Christum, ut suam nobis per te voluntatem ostendat: quâ certius cognitâ, tuis piis desideriis securiùs annuamus. Omnipotentis autem Dei famulus, totum se conferens ad orandum; precibus devoris obtinuit, & quod exteriùs ipse proferret, & quid interiùs Papa sentiret. Nam cum parabolam de divite Rege, cum muliere formosâ & paupere contrahente grante; & de prole susceptâ præferente generantis Regis imaginem; ac per hoc educandâ de mensâ ipsius, sicut à Deo acceperat, retulisset: ex illius interpretatione subjunxit: Non est formidandum, quòd fame pereant æterni Regis filii, & hæredes, qui ad imaginem Regis Christi, per Spiritus Sancti virtutem de paupere matre nati, & ipsi per spiritum paupertatis sunt in Religione pauperculâ generandi. Si enim Rex cælorum imitatoribus suis regnum promittit æternum: quantum magis illa subministrabit, quæ communiter largitur bonis, & malis? Hanc ergo parabolam, & intellectum ipsius, Christi Vicarius cum diligenter audisset, miratus est valde: & indubitanter Christum loquutum in homine recognovit. Sed & visionem, quam tunc temporis è cælo perceperat, in hoc viro fore complendam; Spiritu divino suggerente firmavit. Videbat namque in fumis (ut retulit) Lateranensem Basilicam fore proximam jam ruinæ: quam quidam homo pauperculus, modicus & despectus, proprio dorso submisso, ne caderet, sustentabat: *Verè, inquit, hic est ille, qui opere & doctrinâ, Christi sustentabit Ecclesiam.* Inde præcipuâ devo-

devotione repletus; petitioni ejus se per omnia inclinavit: ac Christi famulum, speciali semper amore dilexit. Proinde postulata concessit, & adhuc concedere plura promisit. Approbavit Regulam: dedit de pœnitentiâ prædicandâ mandatum, & laicis fratribus omnibus, qui Servum Dei fuerant comitati, fecit coronas parvulas fieri, ut verbum Dei liberè prædicarent.



De



*De profectu Ordinis sub manu ipsius: &
confirmatione Regulæ prius
adprobatæ.*

C A P U T IV.



RETUS exinde Franciscus supernâ gratiâ, & auctoritate Papali; cum fiducia multâ versus vallem Spoletanam iter arripuit: ut Evangelium Christi faceret & doceret. Dum autem in viâ conferret cum sociis, qualiter Regulam quam susceperant, sincerè servarent; qualiter in omni sanctitate, & iustitiâ coram Deo incederent; qualiter in seipsis proficerent, & essent aliis in exemplum: diutiùs collatione protractâ, hora pertransiit. Et cùm jam lassati essent ex diuturnitate laboris, esurientes in quodam loco solitudinis subliterunt. Sanè cùm omnis via deesset, quâ possent sibi de victu necessario providere: statim affuit providentia Dei. Nam subito apparuit homo, afferens panem in manu, quem pauperulis Christi dedit: subitoque disparuit,

paruit, incognitus unde venerit, aut quò iret. Cognoscentes autem per hoc pauperes fratres, supernum sibi in comitatu viri Dei adesse præsidium: magis dono liberalitatis divinæ, quàm cibo carnis propriæ sunt refectioni. Insuper divinâ consolatione repleti, statuerunt firmiter, & irrevocabiliter confirmaverunt, nullius inediae aut tribulationis impulsu, à sanctæ paupertatis refilire promisso.

Exinde in vallem Spoletanam cum sancto proposito redeuntes, tractare cœperunt; utrum inter homines conversari deberent, an ad loca solitaria se conferre. Sed Christi servus Franciscus, non de suâ vel suorum confidens industriâ: per orationis instantiam, divinæ super hoc voluntatis beneplacitum requisivit. Supernæ igitur revelationis illustratus oraculo: intellexit se ad hoc missum à Domino, ut Christo lucraretur animas, quas diabolus conabatur auferre. Ideoq. magis omnibus, quàm sibi soli vivere prælegit: illius provocatus exemplo, qui unus pro omnibus mori dignatus est. Recollegit itaque se vir Dei cum ceteris sociis, in quodam tugurio derelicto juxta civitatem Assisii; in quo secundum sanctæ paupertatis formam, in labore multo, & inopiâ victitabant: magis lacrymarum, quàm deliciarum panibus refici satagentes. Vacabant enim ibidem divinis precibus incessanter, mentaliter potiùs quàm vocaliter, studio intendentes orationis devotæ: pro eo quòd nondum Ecclesiasticos libros habebant, in quibus possent horas Canonicas decantare. Loco tamen illorum, librum Crucis Christi continuatis aspectibus, diebus ac noctibus revolvebant, exemplo Patris & eloquio eruditi, qui jugiter faciebat eis de Cruce Christi sermonem.

Ro-

Rogantibus autem fratribus, ut eos doceret orare, dixit; cum orabitis, dicite, Pater noster: & Adoramus te Christe, ad omnes Ecclesias tuas, quæ sunt in toto mundo, & benedicimus tibi: quia per Crucem tuam sanctam redemisti mundum. Docuit insuper eos, Dominum laudare in omnibus, & ex omnibus creaturis: honorare præcipuâ reverentiâ sacerdotes: fidei quoque veritatem, secundum quod Sancta Romana tenet & docet Ecclesia, & firmiter credere, & simpliciter confiteri. Servabant illi Patris Sancti documenta per omnia: & ad omnes Ecclesias & Cruces, quas è longinquo videre poterant, juxta datam sibi formam orantes, se humiliter prosternebant.

Contrahentibus autem fratribus moram in loco præfato: vir sanctus, die quadam Sabbathi civitatem Assisii intravit, prædicaturus manè diei Dominicæ, ut moris erat, in Ecclesia cathedrali. Cumque in quodam tugurio, sito in horto Canonicorum, vir Deo devotus, in oratione Dei, more solito pernoctaret, corporaliter absentatus à filiis: ecce ferè mediâ noctis horâ, quibusdam ex fratribus quiescentibus, quibusdam perseverantibus in orando; currus igneus mirandi splendoris per ostium domus intrans, huc atque illuc per domicilium tertio se convertit: super quem globus lucidus residebat, qui Solis habens aspectum, noctem clarere fecit. Obstupefacti sunt vigilantes, excitati simul & exterriti dormientes: & non minùs senserunt cordis claritatem, quàm corporis; dum ex virtute mirandi luminis, alterius alteri conscientia nuda fuit. Intellexerunt namque concorditer omnes, videntibus invicem universis in cordibus singulorum, Sanctum Patrem absentem corpore, præsentem

E

spiri-

spiritu , tali transfiguratum effigie , supernis irradiatum fulgoribus , & ardoribus inflammatum , supernaturali virtute , in curru splendente simul , & igneo , sibi demonstrari à Domino , ut tanquam veri Israëlitarum post illum incederent ; qui virorum spiritualium , ut alter Elias , factus fuerat à Deo currus & auriga . Credendum sanè , quòd ille horum simplicium aperuit oculos , ad preces Francisci , ut viderent magnalia Dei : qui oculos quondam aperuerat pueri , ad videndum montem plenum equorum , & igneorum curruum in circuitu Elisæi . Regressus autem vir sanctus ad fratres , cœpit conscientiarum ipsorum secreta rimari , confortare ipsos de visione illâ mirabili , & de profectu Ordinis multa futura prædicere . Cumque patefaceret plurima , quæ sensum transcendebant humanum : verè cognoverunt fratres , super servum suum Franciscum , Spiritum Domini in tantâ plenitudine quievisse , quòd post ipsius doctrinam & vitam , erat eis proficisci tutissimum .

Post hæc pusilli gregis pastor Franciscus , ad sanctam Mariam de Portiunculâ , duodenarium illum fratrum numerum , supernâ gratiâ præcunte , deduxit : ut ubi meritis matris Dei Minorum sumpserat Ordo initium , ipsius illic susciperet auxiliis incrementum . Ibi quoque factus Evangelicus præco , civitates circuibat & castra : *non in doctis humanæ sapientiæ verbis* , sed in virtute spiritus annuncians regnum Dei . Videbatur intuitibus homo alterius sæculi : quippe qui mente ac facie in cælum semper intentus , omnes sursum trahere conaretur . Cœpit ex hoc , Christi vinea germinare germen odoris Domini , & productis ex se floribus suavitatis , honoris , & honestatis , uberes fructus asferre . Nam prædica-

dicationis ipsius fervore succensi quamplurimi utriusque sexus, in conjugali pudicitia Domino famulantes, secundum formam à Dei viro acceptam, novis se poenitentiae legibus vinciebant: quorum vivendi modum idem Christi famulus, Ordinem fratrum de poenitentia nominari decrevit. Nimirum, sicut in caelum tendentibus, poenitentiae viam omnibus constat esse communem: sic & hic Status, Clericos & laicos, virgines & conjugatos in utroque sexu admittens, quanti sit apud Deum meriti; ex pluribus per aliquos ipsorum patratis miraculis, innote-
fecit.

Convertebantur etiam virgines ad perpetuum caelebatum: inter quas virgo Deo carissima Clara, ipsarum plantula prima, tanquam flos vernans & candidus, odorem dedit, & tanquam stella praefulgida radiavit. Haec nunc glorificata in caelis, ab Ecclesia dignè veneratur in terris: quae filia fuit in Christo Sancti Patris Francisci pauperuli, & mater pauperum dominarum. Multi etiam, non solum devotione compuncti, sed & perfectionis Christi desiderio inflammati: omni mundanorum vanitate contempta, Francisci vestigia sequebantur. Qui quotidianis succrescentes profectibus, usque ad fines orbis terrae celeriter pervenerunt. Faciebat namque sancta paupertas, quam solam deferebant pro sumtibus, ipsos ad omnem obedientiam promptos, robustos ad labores; & ad itinera expeditos. Et quia nihil terrenum habebant, nihil amabant, nihilque timebant amittere: securi erant ubique, nullo pavore suspensi, nullâ curâ distraeti; tanquam qui absque mentis turbatione vivebant, & sine sollicitudine diem crastinum, & serotinum hospitium expectabant.

• Multa quidem eis in diversis partibus orbis, inferebantur convitia, tanquam personis despicabilibus & ignotis : verùm amor Evangelii Christi, aded ipsos patientes effecerat, ut quærent potius ibi esse, ubi persecutionem paterentur in corpore, quàm ubi, cognitâ sanctitate ipsorum, mundano possent gloriari favore. Ipsa quoque rerum penuria superabundans eis videbatur ubertas : dum juxta consilium Sapientis, *pro magno ipsis minimum complacebat*. Sanè cùm ad infidelium partes, aliqui ex fratribus pervenissent, contigit, ut quidam Saracenus pietate commotus, pecuniam eis offerret pro necessario victu : illis autem recusantibus accipere, admiratus est homo, cernens quòd inopes essent. Intellecto tandem, quòd pauperes effecti amore Dei, pecuniam possidere nolabant : tantâ est eis affectione conjunctus, ut offerret se ad ministrandum omnia necessaria, quamdiu facultatum sibi aliquid superesset. O inæstimabilis pretiositas paupertatis ! cujus mirandâ virtute mens feritatis barbaricæ, in tantam miserationis est immutata dulcedinem ! Horrendum est proinde ac nefarium scelus, ut hanc margaritam nobilem vir Christianus conculcet, quam tantâ veneratione extulit Saracenus.

Eo tempore religiosus quidam de ordine Cruciferorum, Morieus nomine, in hospitali quodam prope Afisium, languore tam gravi, tamque prolixo laborans, ut jam morti foret adjudicatus à medicis ; viro Dei simplex factus, per nuncium postulabat instanter, ut pro se ad Dominum intercedere dignaretur. Cui beatus pater benignè assentiens, oratione præmissâ, panis micas accepit : & cum oleo accepto de lampade, quæ coram Virginis ardebat altari, commiscens, quasi quoddam ele-
ctua-

ctuarium, per manus fratrum infirmanti transmissit, dicens; Medicinam hanc fratri nostro deferte Morico: quia ipsum Christi virtus, non solum plenè sanitati restituet, verum etiam robustum bellatorem effectum, aciei nostræ perseveranter adjunget. Statim autem ut antidotum illud, Sancti Spiritus adinventione confectum, æger homo gustavit; sanus exsurgens tantum mentis & corporis à Deo vigorem obtinuit, ut paulo post, viri Sancti Religionem ingressus, & unicâ tantum operiretur tuniculâ, sub quâ longo tempore lorica portabat ad carnem; & crudis duntaxat cibariis, herbis videlicet, leguminibus, fructibusque contentus, per plura temporum lustra, nec panem gustaret, nec vinum, fortis tamen & incolumis perseverans.

Crescentibus quoque virtutum meritis, in parvulis Christi: odor opinionis bonæ circumquaque diffusus, ad præsentiam Sancti Patris videndam, plurimos è diversis mundi partibus attrahebat. Inter quos quidam sæcularium cantionum curiosus inventor, qui ab Imperatore, propter hoc fuerat coronatus, & exinde Rex versuum dictus; virum Dei contemptorem mundalium adire proposuit. Cumque apud castrum Sancti Severini, eum prædicantem reperisset in monasterio quodam: factâ manu Domini super se, vidit eundem Crucis Christi prædicatorem Franciscum, duobus transversis ensibus valde fulgentibus, in modum Crucis signatum: quorum unus à capite ad pedes, alius à manu in manum per petus transversaliter tendebatur. Non noverat faciem servum Christi: sed tanto monstratum miraculo mox agnovit. Subito stupefactus ad visum, incipit meliora proponere: tandemque verborum ipsius compunctus virtute,

tan-

tanquam si esset gladio spiritus ex ejus ore procedente transfixus, sæcularibus pompis omnino contemtis, beato Patri professione cohæsit. Propter quod, videns ipsum vir sanctus ab inquietudine sæculi, ad Christi pacem perfectè conversum, fratrem Pacificum appellavit. Hic postmodum in omni sanctitate proficiens; antequam fieret minister in Franciâ: (siquidem primus ibidem Ministerii gessit officium) meruit iteratò magnum Thau in fronte Francisci videre. quod colorum varietate distinctum, faciem ipsius miro venustabat ornatu. Hoc quippe signum vir sanctus magno venerabatur affectu, frequenti commendabat eloquio: & in eis quas dirigebat litterulis, manu propriâ subscribebat: tanquam si omne ipsius studium foret signare Thau, juxta dictum propheticum, super frontes virorum gementium & dolentium, ad Christum Jesum veraciter converforum.

Processu quoque temporis, multiplicatis jam fratribus, cœpit eos pastor sollicitus in loco Sanctæ Mariæ de Portiunculâ, ad Generale Capitulum convocare: ut in funiculo distributionis divinæ, in terrâ paupertatis eorum, unicuique tribueret obedientiæ portionem. Vbi licet omnium necessariorum esset penuria, fratrumque multitudo ultra quinque millia conveniret aliquando: divinâ tamen opitulante clementiâ, & victus sufficientia suberat, & salus comitabatur corporea, & spiritualis jucunditas affluebat. Capitulis verò Provincialibus, quia corporalem præsentiam exhibere non poterat, per sollicitam curam regiminis, instantiam precis, & efficaciam benedictionis, spiritu præfens erat; quamvis aliquando, mirâ Dei faciente virtute, visibiliter appareret. Dum enim egregius Prædicator qui & nunc Christi præclarus con-

confessor Antonius , de titulo crucis Jesus Nazarenus Rex Judæorum, in Arelatenſi Capitulo fratribus prædicaret: quidam frater probatæ virtutis Monaldus nomine, ad oftium Capituli divinâ commonitione respiciens; vidit corporeis oculis beatum Franciscum: in aëre sublevatum, extensis velut in Cruce manibus benedicentem fratres. Tantâ verò, & tam insolitâ fratres omnes consolatione spiritus repletos se fuisse senserunt; ut de verâ Sancti Patris præſentiâ, certum eis intra se spiritus testimonium perhiberet. Licet postmodum id non solum per evidentia signa, verum etiam per ejusdem Sancti Patris verba, exteriori fuerit attestazione compertum. Credendum sanè, quòd omnipotentis Dei virtus, quæ Ambrosium pium & sacrum Antistitem, tumulationi gloriosi concessit interesse Martini, ut pium Pontificem pio veneraretur officio; etiam servum suum Franciscum, prædicationi præſentavit veracis sui præconis Antonii: ut approbaret veritatis eloquia, præcipuè crucis Christi, cuius erat bajulus & minister.

Cùm autem dilatato jam Ordine, vivendi formam per Dominum Innocentium approbatam, disponeret per successorem ipsius Honorium, in perpetuum facere roborari: hujusmodi fuit à Deo revelatione commonitus. Videbatur quidem sibi, de terrâ micas panum subtilissimas collegisse, multisque famelicis fratribus ipsum circumstantibus debere tribuere. Cumque micas tam tenues distribuere formidaret, ne fortè inter manus exciderent, vox ei desuper ait: Francisce, unam de micis omnibus hostiam facito, & manducare volentibus tribue. Quo id agente, quicumque illud non devotè recipiebant, aut receptum contemnebant donum; mox leprâ infecti, notabiles

biles apparebant . Recitat manè vir sanctus hæc omnia sociis, dolens se non percipere mysterium visionis . Sequenti verò die, cùm vigil in oratione persisteret, hujusmodi vocem de cælo delapsam audivit, Franciscæ, micæ præteritæ noctis verba Evangelica sunt : hostia, regula; lepra, iniquitas . Volens igitur confirmandam Regulam ex verborum Evangelii aggregatione profusiùs traditam, ad compendiosiore formam, juxta quod dictabat visio monstrata, redigere : in montem quendam cum duobus sociis, Spiritu sancto ducente, conscendit; ubi panem tantùm contentus & aquâ jejunans conferri eam fecit, secundùm quod oranti sibi, divinus Spiritus suggererat . Quam, cùm de monte descendens, servandam suo-Vicario commississet; & ille paucis elapsis diebus assereret per incuriam perditam : iteratò sanctus vir ad locum solitudinis rediit, eamque instar prioris, ac si ex ore Dei verba susceperet, illièd reparavit : & per supradictum Dominum Papam Honorium, octavo Pontificatus illius anno, sicut optaverat, obtinuit confirmari . Ad cujus observantiam fratres ferventer inducens, dicebat, se nihil ibi posuisse secundùm industriam propriam : sed omnia sic scribi fecisse, sicut sibi fuerant divinitus revelata . Quod ut certius constaret testimonio Dei, paucis admodum evolutis diebus, impressa sunt ei Stigmata Domini Jesu, digito Dei vivi, tanquam Bulla Summi Pontificis Christi : ad confirmationem omnimodam Regulæ, & commendationem auctoris . Sicut post suarum enarrationem virtutum, suo loco inferiùs describetur .



CA-



De Austeritate vitæ ejus. & quomodo creaturæ præbebant ei solatium.

CAPUT V.



UM igitur cerneret vir Dei Franciscus, suo exemplo ad Crucem Christi bajulandam, ferventi spiritu plurimos animari: animabatur & ipse; tanquam bonus dux exercitus Christi, ad palmam victoriæ, per culmen invictæ pervenire virtutis. Attendens enim illud Apostoli verbum, *Qui autem sunt Christi, carnem suam crucifixerunt cum vitiis & concupiscentiis*; ut Crucis armaturam suo ferret in corpore; tantâ disciplinæ rigiditate sensuales appetitus arcebat, ut vix necessaria sumeret sustentationi naturæ. *Difficile namque fore dicebat, necessitati corporis satisfacere, & pruritui sensuum non parere*: propter quod cocta cibaria sanitatis tempore vix admittebat, & rarò. admissa verò aut conficiebat cinere, aut condimenti saporem admixtione aquæ ut plurimum reddebat insipidum. De potu vi-

F ni.

ni quid dicam? cùm & de aquâ frigidâ, dum sitis æstua-
ret ardore, vix ad sufficientiam biberet. Modos adinve-
niebat abstinentiæ potioris, & quotidie exercitatione cre-
scebat: licetque jam perfectionis culmen attingeret,
tanquam incipiens semper aliquid innovabat, afflictio-
nibus carnis puniendo libidinem. Egrediens tamen ex-
teriùs, propter verbum Evangelii, conformabat se susci-
pientibus ipsum in qualitate ciborum: cùm tamen ad in-
teriora regressus, districtè servaret rigidam abstinentiæ
parcitatem. Sicque seipsum austerum sibi, humanum
proximo, subiectum Evangelio Christi, per omnia red-
dens; non solum abstinendo, verùm etiam manducando,
præbebat ædificationis exemplum. Nuda humus, ut fre-
quentiùs, lectus erat lassato corpusculo: & sæpius se-
dens, ligno vel lapide ad caput posito, dormiebat, uni-
câ paupere contentus tuniculâ, in nuditate Domino ser-
viebat, & frigore.

Interrogatus aliquando quomodo vestitu tam tenui,
se posset ab hiemalis algoris asperitate tueri; in spiritûs
fervore respondit: si supernæ patriæ flammâ, per desi-
derium contingeremur interiùs; frigus istud exterius fa-
cilè portaremus. Vestis horrebat molliciem, asperitatem
amabat; asserens propter hoc Joannem Baptistam ore di-
vino fuisse laudatum. Si quando verò in datâ sibi tunicâ
lenitatem sentiret, chordulis eam contexebat interiùs:
quia non in casulis pauperum, sed in palatiis principum,
juxta veritatis verbum, vestimentorum dicebat requi-
rendam esse molliciem. Experienciâ enim certâ didice-
rat, dæmones asperitate terreri: delitiosis autem & mol-
libus ad tentandum fortiùs animari. Unde cùm nocte
quadam, propter infirmitatem capitis & oculorum, præ-
ter

ter solitum mōrem, cervical de plumâ positum haberet ad caput: dæmon in illud ingressus, ipsum usque ad horam matutinalem, inquietatum multimodè, à sanctæ orationis studio perturbavit; donec vocato socio, pulvinar cum dæmonio fecit extra cellulam longiùs exportari: Egressus autem cum pulvinari frater de cellâ, membrorum omnium vires amisit & usum: quousque ad vocem sancti Patris hoc cognoscentis in spiritu, vigor pristinus cordis & corporis sibi fuit plenariè restitutus.

Rigidus in disciplinâ super custodiam suam stabat: curam permaximam gerens de utriusque hominis puritate servandâ. Quapropter circa conversionis suæ primordia, tempore hiemali, in foveam glacie plenam seipsum plerunque mergebat: ut & domesticum sibi hostem perfectè subigeret, & candidum vestimentum pudoris à voluptatis incendio præservaret. Tolerabilius viro spirituali fore incomparabiliter asseribat, magnum sustinere frigus in carne, quàm ardorem carnalis libidinis vel modicum sentire in mente. Cùm autem apud eremum de Sathiano, nocte quadam orationi vacaret in cellulâ; vocavit eum hostis antiquus tertio, dicens: Francisce; Francisce, Francisce. Cui cùm quid quæreret, respondisset, fallaciter ille subjunxit: Nullus est in mundo peccator, cui si conversus fuerit, non indulgeat Deus: sed quicumque semetipsum pœnitentiâ durâ necaverit, misericordiam non inveniet in æternum. Statim vir Dei per revelationem cognovit hostis fallaciam, quo modonifus fuerit eum ad tepida revocare: nam hoc sequens indicavit eventus. Continuo enim post hoc, ad insufflationem illius, *cujus balitus prunas ardere facit*; gravis ipsum carnis tentatio apprehendit. Quam ut præsen-

sit castitatis amator , depositâ veste , chordâ cœpit se verberare fortissimè ; Eja , inquit , frater Asine , sic te decet manere , sic subire flagellum . Tunica Religioni deservit , sanctitatis signaculum præfert : furari eam libidinoso non licet . si quò vis pergere , perge . Insuper & mirando fervore spiritûs animatus , apertâ cellâ foras exivit in hortum ; & in magnam demergens nivem corpusculum jam nudatum , septem ex eâ plenis manibus cœpit compingere massas : quas sibi proponens , suo sic exteriori homini loquebatur : Ecce , inquit , hæc major , uxor tua est ; quatuor istæ , duo filii & duæ filix ; reliquæ duæ , servus & ancilla , quos ad serviendum habere oportet . Festina igitur omnes induere : quoniam frigore moriuntur . Si verò eorum multiplex sollicitudo molestat ; uni Domino sollicitè servi . Illicò tentator victus abscessit , & vir sanctus cum victoriâ in cellam rediit : quia dum benè pœnaliter arsit foris , ardorem interiùs sic extinxit libidinis , ut deinceps tale aliquid minimè sentiret . Quidam autem frater , qui tunc orationi vacabat , hæc omnia , Lunâ clariùs incedente , prospexit . Comperto vir Dei , quòd hæc ille nocte vidisset ; referans ei tentationis processum , præcepit ut quamdiu ipse viveret , nulli viventi rem quam viderat , propalaret .

Non solum autem mortificari debere docebat vitia carnis , & ejus incentiva frenari : verum etiam exteriores sensus , per quos mors intrat ad animam , summâ vigilantia custodiri . Mulierum familiaritates , colloquia & aspectus , quæ multis sunt occasio ruinæ , sollicitus evitari jubebat ; asserens per hujusmodi , debilem frangi , & fortem sæpe spiritum infirmari . Harum contagionem evadere conversantem cum eis , nisi probatissimum virum , tam facile

facile dixit, quàm juxta Scripturam, *in igne ambulare, & non comburere plantas*. Siquidem ipse adeò averterat oculos suos, ne hujusmodi vanitatem viderent: quòd (sicut aliquando socio dixit) quasi nullam recognoscebat in facie. Non enim securum esse putabat, earum formarum introrsus haurire imagines, quæ possunt aut edomitæ carnis resuscitare igniculum, aut pudicæ mentis maculare nitorem. Asserebat etiam frivolum esse mulieris colloquium, exceptâ solâ confessione, vel instructione brevissimâ: juxta quod & saluti expedit, & congruit honestati. Quæ sunt, inquit, religioso cum muliere tractanda negotia? nili cùm sanctam pœnitentiam, vel melioris vitæ consilium, religiosâ petitione deposcit? Ex nimâ securitate, minus cavetur hostis. Et diabolus, si de suo capillum potest habere in homine, citò excrefcere facit in trabem.

Otium autem omnium malarum cogitationum sentinam, docebat summopere fugiendum: exemplo demonstrans, rebellem carnem & pigram, disciplinis continuis, & fructuosis laboribus esse domandam. Unde corpus suum, fratrem asinum appellabat; tanquam laboriosis supponendum oneribus, crebris cædendum flagellis, & vili pabulo sustentandum. Si quem verò cernebat otiosum, & vagum, aliorum velle manducare labores, fratrem muscam nominandum censebat: eò quòd talis nihil boni faciens, sed benefacta inficiens, vilem & abominabilem se omnibus reddat. Propter quod dixit aliquando, Volo fratres meos laborare & exercitari: ne otio dediti, per illicita, corde aut linguâ vagentur. Evangelicum siquidem volebat à fratribus observari silentium: ut videlicet ab omni otioso verbo, omni tempore, absti-

ne;

nerent sollicitè ; tanquam reddituri in die iudicii de huiusmodi rationem . Sed & si quem invenisset fratrem verbis assuetum inanibus , acriter arguebat ; taciturnitatem modestam , & puri cordis affirmans custodiam , & non modicam esse virtutem : pro eo quòd *mors & vita fore dicuntur in manibus linguæ* , non tam ratione gustûs , quàm ratione loquelæ .

Licet autem pro viribus ; ad vitam austeram fratres induceret : non tamen ei placebat districtionis severitas , quæ pietatis non induit viscera , nec est discretionis sale condita . Cùm enim quadam nocte , unus ex fratribus , præ nimietate abstinentiæ admodum fame cruciatus , nullam posset habere quietem ; intelligeretque pius pastor ovi suæ imminere periculum : vocavit fratrem , apposuit panem . Et ut ruborem illi tolleret , cœpit ipse prior comedere , eumque ad manducandum dulciter invitare . Deposuit frater verecundiam , sumsit cibum , gavissus quamplurimum , quòd per circumspectam condescensionem pastoris ; & corporis evasisset dispendium , & non modicum accepisset ædificationis exemplum . Mane factò , fratribus convocatis in unum , vir Dei referens quod acciderat nocte providâ commonitione subjunxit ; Sit vobis fratres , non cibus , sed charitas in exemplum . Docuit insuper eos discretionem sequi , ut aurigam virtutum : non eam quam caro suadet , sed quam edocuit Christus : cuius sacratissimam vitam , expressum constat esse perfectionis exemplar .

Et quoniam Agnum sine maculâ Christum crucifixum , non est possibile homini carnis infirmitate circumdato sic perfectè sectari , quin aliquas contrahat sordes : ideo documento certo firmabat eos , qui perfectioni vitæ invi-

invigilant & intendunt, quotidianis debere se lacrymarum emundare fluentis. Licet enim jam esset adeptus cordis & corporis puritatem mirabilem : non cessabat tamen lacrymarum imbribus jugiter oculos expiare mentales, corporeorum luminum non ponderando jaçturam. Cum enim ex continuo fletu, infirmitatem oculorum incurrisset gravissimam; suadente sibi medico, quòd abstinere à lacrymis, si corporis visus cæcitatem vellet effugere : Vir sanctus respondit : Non est, frater medice, ob amorem luminis, quod habemus commune cum muscis, visitatio lucis æternæ repellenda vel modicum : quia non spiritus propter carnem, sed caro propter spiritum, beneficium lucis accepit. Malebat siquidem corporalis visus lumen amittere, quàm lacrymas (quibus oculus mundatur interior, ut Deum videre valeat) represcâ devotione spiritûs impedire.

Cùm autem semel daretur consilium à medicis, & instanter suaderetur à fratribus, ut pateretur sibi per remedium subveniri coçturæ; humiliter vir Dei assensit : quia salutiferum hoc simul & asperum esse cernebat. Vocatus itaque venit Chirurgus, instrumentum ferreum igni submittens ad faciendam coçturam. At Christi servus; corpus jam horrore concussum confortans, sicut amicum, cœpit ignem alloqui, dicens : mi frater ignis, præ ceteris rebus æmulandi decoris, virtuosum, pulchrum & utilem te creavit Altissimus : esto mihi hac horâ propitius, esto curialis. Precor magnum Dominum qui te creavit, ut tuum mihi calorem temperet : quo suaviter urentem valeam sustinere. Oratione finitâ, contra igne candescens ferreum instrumentum signum crucis edidit : ac deinceps intrepidus persilitebat. Profundatum est cre-
pitans

pitans ferrum in tenerâ carne : & ab aure usque ad supercilium coctura protracta . Quantum irrogaverit ignis ille dolorem , vir ipse sanctus expressit : Laudate , inquit ad fratres , Altissimum : quia verè dico vobis , nec ignis ardorem sensi , nec carnis ullum dolorem . Et conversus ad medicum ; si non est , inquit , caro bene decocta , imprime iterum . Expertus medicus in invalidâ carne virtutem spiritûs tam potentem , miratus est : & divinum hoc miraculum extulit , dicens : Dico vobis , fratres , vidi miracula hodie . Quia enim ad tantam pervenerat puritatem , ut caro spiritui , & spiritus Deo , harmoniâ mirabili concordarent : divinâ ordinatione fiebat , ut creatura Creatori suo deserviens , voluntati & imperio ejus mirabiliter subjaceret . Alio enim tempore , apud cremum S. Urbani , Servo Dei ægritudine gravissimâ laborante ; cùm ipse naturæ defectum sentiens , vini poculum postulasset ; nihilque de vino , quod sibi dari posset , responderetur adesse : jussit aquam adferri , & allatam signo crucis edito benedixit . Mox vinum efficitur optimum , quod fuerat aqua pura : & quod deserti loci paupertas non potuit , viri sancti puritas impetravit . Ad ejus gustum tantâ protinus facilitate convaluit ; ut saporis novitas , & innovatio sanitatis , gustabile ac gustantem supernaturaliter innovantes , perfectam in ipso expoliationem veteris hominis , & induitionem novi duplici attestacione firmarent .

Non solùm creatura Servo Dei serviebat ad nutum : sed & Creatoris ubique providentia condescendebat ad placitum . Cùm enim tempore quodam , ex multarum infirmitatum concursu , aggravato corpore , ad jucunditatem spiritûs excitandam , alicujus audiendi soni har-

mo-

moniaci desiderium habuisset ; nec id honestatis decencia per ministerium fieri pateretur humanum : adfuit Angelorum obsequium , ad viri sancti placitum adimplendum . Nocte etenim quadam vigilante ipso , & meditante de Domino ; repentè insonuit cithara quædam harmoniæ mirabilis , & suavissimæ melodix . Non videbatur aliquis : sed transitum & reditum citharædi ; ipsa hinc inde auditus volubilitas innuebat . Spiritu in Deum directo , tantâ fuit in illo dulcisono carmine suavitatis perfruitus , ut aliud se putaret sæculum commutasse . Hoc & fratres sibi familiares , non latuit : qui per certa frequenter conspiciebant indicia , cum tam excessivis , & crebris consolationibus à Domino visitari , ut nec ipsas omnino occultare valeret .

Alio quoque tempore , viro Dei prædicationis causâ inter Lombardiam , & Marchiam Tervisinam iter agente cum fratre socio juxta Padum ; tenebrosa noctis supervenit obscuritas . Cumque via esset exposita periculis magnis & multis , propter tenebras , fluvium , & paludes ; dixit socius ad virum sanctum : Ora pater , ut de instantibus periculis liberemur : Cui vir Dei cum fiducia multâ respondit : Potens est Deus , si placet suæ dulcedini , tenebrarum effugata caligine , beneficium nobis impendere lucis . Vix sermonem compleverat ; & ecce tanta lux illicò cœpit circa eos supernâ radiare virtute : ut nocte aliis existente obscurâ , ipsi luce clarâ viderent non solum viam , verum etiam plurima circumquaque . cujus lucis ducatu corporaliter directi , & spiritaliter confortati , usque ad locum hospitii , per non modicum viæ spatium , cum divinis hymnis & laudibus , incolumes pervenerunt . Perpende quàm miran-

dæ fuerit vir iste mundiciæ, quantæque virtutis; ad cuius nutum, suum ignis ardorem contemperat; aqua saporem commutat; Angelica præbet melodia folatium; & lux divina ducatum: ut sic sanctificatis viri sancti sensibus, omnis probetur mundi machina deservire.



De



*De Humilitate ejus & Obedientiâ . & de
Condescensionibus ei factis
ad nutum .*

C A P U T VI.



QUONIAM virtutum custos, & decor
humilitas, copiosâ virum Dei uber-
tate repleverat. In propriâ quidem
reputatione nihil erat, nisi peccator:
cû in veritate speculum esset, &
splendor omnimodæ sanctitatis. Su-
per hanc studuit ædificare seipsum;
ut sapiens architectus fundamentum præjaciens, quod à
Christo didicerat. Dicebat propter hoc, filium Dei de
altitudine sinûs paterni ad nostra despicabilia descendisse:
ut tam exemplo quàm verbo, Dominus & magister hu-
militatem doceret. Propter quod studebat, tanquam
Christi discipulus, in oculis suis & aliorum vilescere: à
summo dictum esse magistro commemorans; *Quod al-
tum est apud homines abominatio est apud Deum.* Sed &
verbum hoc dicere solitus erat; *Quantum homo est in*
G 2 *oculis*

oculis Dei; tantum est, & non plus. Stultum proinde judicans mundanis extolli favoribus, gaudebat de opprobriis, & de laudibus tristabatur. Malebat quidem de se vituperium audire, quàm laudem: sciens quòd hoc ad emendandum induceret, illa impelleret ad cadendum. Et ideo sæpe cùm populi, merita in eo sanctitatis extollerent: præcipiebat alicui fratri, ut in contrarium, verba ipsum vilificantia suis auribus inculcando proferret. Cumque frater ille licet invitatus, eum rusticum, & mercenarium, imperitum, & inutilem diceret: exhilaratus tam mente quàm facie respondebat; Benedicat tibi Dominus, fili carissime: quia tu verissima loqueris, & talia filium Petri Bernardonis decet audire.

Ut autem se ceteris despicabilem redderet, non parcebat rubori: quin in prædicatione coram omni populo, proprios manifestaret defectus. Accidit semel ut infirmitate gravatus, rigorem abstinentiæ pro recuperandâ sanitate modicum relaxaret. Viribus autem corporis utcumque resumptis, verus sui contemptor, ad propriæ carnis animatus opprobrium; Non est, inquit, conveniens, ut populus abinentem me credat: & ego è contrario carnaliter reficiar in occulto. Surrexit propterea sanctæ humilitatis spiritu inflammatus: & in plateâ civitatis Assisii populo convocato, solenniter cum fratribus multis; quos secum adduxerat, majorem introivit Ecclesiam: funeque ad collum ligato, nudum cum femoralibus solis; in oculis omnium se trahi præcepit usque ad lapidem, in quo malefactores puniendi consueverant collocari. Super quem conscendens, licet quartanarius esset & debilis; acerbi frigoris tempore, cum multo vigore animi prædicavit. Audientibusque cunctis, asseruit se, non tantum
quam

quam spiritualem honorandum fore : quinimo tanquam carnalem , & gluttonem , ab omnibus contemnendum . Igitur qui convenerant , tam ingenti viso spectaculo admirati sunt : & quia ipsius austeritatem jam noverant , devotione compuncti , humilitatem hujusmodi magis admirabilem , quàm imitabilem proclamabant . Licet autem id magis videatur portentum fuisse , instar prophetalis vaticinii , quàm exemplum : tamen verè documentum exstitit humilitatis perfectæ : quo Christi sectator instruitur , transitorie laudis præconium debere contemnere , tumentis quoque jactantiæ comprimere fastum , & fraudulentæ simulationis mendacium confutare . Multa quidem in hunc modum sæpiùs faciebat : ut exterius tanquam vas perditum fieret , & sanctificationis spiritum interiùs possideret .

Studebat bona Domini sui arcano pectoris conderet : nolens patère gloriæ , quod posset occasio esse ruinæ . Nam sæpe cum beatificaretur à pluribus , verbum hujusmodi proferebat : Filios & filias adhuc habere possem , nolite laudare nondum securum . *Nemo laudandus cujus incertus est exitus* . Ista quidem laudantibus . Ad se autem sic : Latroni si tanta contulisset Altissimus , gratior te foret , Francisce . Dicebat fratribus sæpe ; De omni eo , quod peccator potest , nemo sibi debet iniquo applausu blandiri . Peccator , ait , jejunare potest , orare , plangere , carnemque propriam macerare : hoc solum non potest , Domino scilicet suo esse fidelis . In hoc itaque gloriandum , si suam Domino gloriam reddimus : si fideliter servientes , ipsi , quicquid donat , fideliter adscribimus .

Ut autem pluribus modis negotiator hic Evangelicus

cus

cus lucraretur , ac totum præsens tempus conflaret in meritum : non tam præesse voluit , quàm subesse , nec tam præcipere , quàm parère . Idcirco Generali cedens officio , Guardianum petiit , cujus voluntati per omnia subjaceret . Tam enim uberem asseribat sanctæ Obedientiæ fructum , ut eis qui jugo ipsius colla submitterent , nil temporis sine lucro transiret : unde & fratri , cum quo erat solitus ire , semper obedientiam promittere consueverat , & servare . Dixit aliquando sociis : Inter alia , quæ dignanter pietas mihi divina concessit , hanc gratiam contulit ; quòd ità diligenter novitio unius horæ obedirem , si mihi Guardianus daretur : sicut antiquissimo , & discretissimo fratri . Subditus , inquit , Prælatum suum non hominem considerare debet : sed illum , pro cujus est amore subiectus . Quantò enim contemptibilior præfides , tantò magis humilitas obedientis placet .

Cùm verò vice quadam quæreretur ab eo , quis esset verus obediens judicandus ; corporis mortui similitudinem pro exemplo proposuit . Tolle , inquit , corpus exanime , & ubi placuerit pone : videbis non repugnare motum , non murmurare situm , non reclamare dimissum . Quòd si statuatur in cathedrâ , non alta , sed ima respiciet . Si collocetur in purpurâ , duplò pallefcet . Hic , ait , verus obediens est , qui cur moveatur , non dijudicat ; ubi locetur non curat ; ut transmutetur non instat : evectus ad officium solitam tenet humilitatem . Plus honoratus , plus reputat se indignum . Dixit aliquando socio suo ; Non mihi videor frater Minor , nisi fuero in statu , quem tibi descripsero . Ecce Prælatum existens fratrum , vado ad Capitulum : prædico & commonco fratres , & in fine dicitur contra me ; non convenis nobis ,
quia

quia illitteratus es, elinguis, idiota & simplex. Tandem ejicior cum opprobrio, vili pensus ab omnibus. dico tibi, nisi eodem vultu, eadem mentis lætitiâ, & eodem sanctitatis proposito, hæc verba audiero; frater Minor nequaquam sum. Et addebat: *In prælatione casus, in laude præcipitium; in humilitate subditi animæ lucrum est.* Cur ergo periculis plus quàm lucris attendimus, cùm acceperimus tempus ad lucrum?

Hac igitur de causâ, humilitatis formâ Franciscus fratres suos voluit vocari Minores, & Prælatos sui ordinis dici Ministros: ut & verbis uteretur Evangelii, quod observare promiserat; & ex ipso nomine discerent discipuli ejus, quod ad discendam humilitatem, ad scholas humilis Christi venissent. Magister siquidem humilitatis Jesus Christus ut informaret discipulos ad humilitatem perfectam, dixit: *Quicumque voluerit inter vos major fieri, sit vester minister: Et quicumque voluerit inter vos primus esse, erit vester servus.* Cùm autem requireret ab eo Dominus Hostiensis, Ordinis Minorum Protector & promotor præcipuus (qui postmodum, juxtâ quod idem vir sanctus prædixerat, ad summi Pontificatus sublimatus honorem, Gregorius Nonus est dictus) utrùm sibi placeret, quod fratres sui promoverentur ad Ecclesiasticas dignitates, respondit: Domine, Minores ideo vocati sunt fratres mei, ut majores fieri non præsumant. Si vultis, ait, ut faciant fructum in Ecclesiâ Dei, tenete illos, & conservate in statu vocationis eorum: & ad prælationes Ecclesiasticas nullatenus ascendere permittatis.

Et quoniam humilitatem; tam in se quàm in subditis, cunctis præferebat honoribus, amator humilium
Deus;

Deus, altioribus ipsum dignum judicabat fastigiis: secundum quod uni fratri viro virtutis & devotionis præcipuæ, visio cælitus ostensa monstravit. Cum enim esset in comitatu viri Dei, & unâ cum ipso in quadam Ecclesiâ desertâ, ferventi oraret affectu, in ecstasi factus; vidit inter multas in cælo sedes, unam ceteris digniorem, pretiosis ornatam lapidibus, & omni gloriâ refulgentem. Miratus intra se præcelsi refulgentiam throni; anxîâ cœpit cogitatione perquirere, quis ad illum deberet assumi. Audivit inter hæc, vocem dicentem sibi: Sedes ista unius de ruentibus fuit, & nunc humili servatur Francisco. Reversus demum frater ad se, ab orationis excessu, virum beatum exterius prodeuntem solito fuit more sequutus. Cumque incedentes per viam, de Deo invicem loquerentur: frater ille visionis suæ non immemor, solerter ab eo quæsit, quid de seipso sentiret. Ad quem humilis Christi servus; *Videor, ait, mihi maximus peccatorum*. Cui cum frater diceret ex adverso, quòd hoc non posset sanâ conscientia dicere, nec sentire; subjunxit: Si quantumcunque sceleratum hominem tanta fuisset Christus misericordia prosequutus; arbitror sanè, quòd multò quàm ego Deo gravior esset. Confirmatus fuit frater ex tam admirabilis humilitatis auditu, de veritate visionis ostensæ: Evangelio sacro testante cognoscens, quòd ad excellentiam gloriæ, de quâ superbus ejicitur, verè humilis exaltetur.

Alio quoque tempore, cum in desertâ quadam oraret Ecclesiâ, in Provinciâ Massæ, apud montem Casalem; intellexit per spiritum, sacras ibidem remansisse reliquias: quas cum longo jam tempore, defraudatas honorificentia debitâ, non sine mœrore conspiceret, præcepit

cepit fratribus, ut eas cum reverentiâ deferrent ad locum. Sed cùm poscente causâ discessisset ab eis; mandati Patris immemores filii, obedientiæ meritum neglexerunt. Die verò quadam, cùm sacra celebrare vellent mysteria, superiori altaris operimento submoto, ossa pulcherrima & redolentia nimis, non sine admiratione reperiunt: intuentes reliquias, quas non hominis manus, sed Dei virtus attulerat. Reversus paulo post vir Deo devotus, diligenter cœpit exquirere, si quod de reliquiis mandaverat, esset impletum. Verùm neglectæ obedientiæ culpam fratres confitentes humiliter, cum poenâ veniam meruerunt. Et ait vir sanctus: Benedictus Dominus Deus meus, qui per seipsum implevit, quod vos facere debuistis. Considera diligenter divinæ providentiæ curam circa pulverem nostrum: & humilis Francisci excellentem in oculis Dei perpende virtutem. Nam cuius jussis non paruit homo, votis obedivit Deus.

Quodam tempore deveniens Imolam, civitatis Episcopum adiit: humiliterque poposcit, ut cum ipsius beneplacito posset populum ad prædicationem vocare. Cui Episcopus durè respondens: Sufficit, inquit, frater, quòd ego prædicem populo meo. Inclinavit caput verus humilis: & foras egressus, post modicam horam regreditur intrò. A quo cùm Episcopus quasi turbatus requireret, quid iteratò petere vellet: humili tam corde, quàm voce respondit: Domine, si pater filium uno repulerit ostio, alio sibi reintrandum est. Humilitate victus Episcopus, alacri vultu eum amplexatus est, dicens: Tu, & omnes fratres tui de cetero, in Episcopatu meo, generali meâ licentiâ prædicetis: quia illud humilitas sancta promeruit.

H

Conti-

Contigit ipsum aliquando Aretium devenire, cum tota civitas intestino bello quassata, propinquum sui minabatur excidium. Hospitatus verò in suburbio, vidit supra civitatem exultantes dæmones; ac perturbatos cives ad eandem mutuam succendentes. Ut autem seditiosas illas effugaret æreas potestates, fratrem Silvestrum columbinæ simplicitatis virum, quasi præconem præmisit dicens: Vade ante portam civitatis; & ex parte Dei omnipotentis, dæmonibus in virtute obedientiæ præcipe, ut exeant festinanter. Accelerat verus obediens Patris iussa perficere: & præoccupans in laudibus faciem Domini, ante portam civitatis cœpit clamare valenter. Ex parte omnipotentis Dei, & jussu Servi ejus Francisci, procul hinc discedite dæmones universi. Redit ad pacem continuo civitas: & civilitatis in se jura cives omnes cum magna tranquillitate reformant. Expulsâ quippe dæmonum furibundâ superbiâ, quæ civitatem illam velut obsidione vallaverat, superveniens sapientia pauperis, videlicet Francisci humilitas, pacem reddidit, urbemque salvavit. Humilis enim Obedientiæ arduâ promerente virtute, super spiritus illos rebelles atque protervos, tam potestativum fuerat assecutus imperium; ut & ipsorum feroces protervias premeret, & importunas violentias propulsaret. Fugiant quidem superbi dæmones, excelsas virtutes humilium: nisi cum interdum ad humilitatis custodiam, divina eos clementia colaphizari permittit; sicut & Paulus Apostolus de seipso scribit, & Franciscus experimento probavit. Rogatus enim à Domino Leone Cardinale Sanctæ Crucis, ut secum aliquantulum moraretur in Urbe: acquievit humiliter ob ipsius reverentiam & amorem. Primâ igitur nocte, cum post orationem vellet

vellet quiescere, supervenerunt dæmones in Christi militem atrociter insurgentes. Quem cum diu verberassent ac durè, ad ultimum quasi seminecem reliquerunt. Descendentibus illis, socius vocatus advēnit; cui cum vū Dei rei narrasset eventum, subjungens ait; Credo frater, quod dæmones, qui nihil possunt, nisi quantum providentia superna disponit; ideo in me nunc tam ferociter irruerunt, quia non bonam spem præfert mansio mea in Curiâ magnatum. Fratres mei, qui in locis pauperculis commorantur, audientes me cum Cardinalibus esse; suspicabuntur forsitan implicari mundanis, efferrī honoribus, & delitiis abundare. Ideo melius judico, cum qui ponitur in exemplum, fugere Curias, & humiliter inter humiles, in locis conversari humilibus: ut sustinentes penuriam, fortes efficiat, similia sustinendo. Veniunt ergo mane, & humili excusatione propositā, vale faciunt Cardinali.

Abhorrebat nempe vir sanctus superbiam omnium malorum originem, & inobedientiam ipsius pessimam prolem: sed non minùs humilitatem pœnitentiæ acceptabat. Accidit semel, ut eidem præsentaretur quidam frater, qui contra legem obedientiæ aliquid fecerat, disciplinā justitiæ corrigendus. Videns autem vir Dei, fratrem illum per signa evidentia veraciter esse compunctum: ad indulgendum ei, amore fuit humilitatis inductus. Ne tamen facilitas veniæ incentivum esset aliis delinquendi, jussit ablatum fratri capitium in medio flammarum projici: ut omnes adverterent, quantā qualique vindictā, offensa sit inobedientiæ percellenda. Cumque per moram, capitium fuisset in medio ignis: præcepit ipsum flammis detrahi, reddique fratri humiliter pœnitenti.

Mirabile dictu ! Extrahitur capitium de medio flammarum , nullum habens adustionis vestigium : sicque factum est , ut hoc uno Deus miraculo , & sancti Viri virtutem , & humilitatem pœnitentiæ commendaret . Dignè itaque sectanda est Francisci humilitas , quæ tam miram in terris etiam dignitatem obtinuit , ut Deum inclinaret ad votum , & hominis immutaret affectum : dæmonum protervitatem suo jussu propelleret , & flammarum voracitatem solo nutu refrenaret . Re vera hæc est , quæ possesores suos exaltans , dum omnibus reverentiam exhibet , ab omnibus promeretur honorem .



De



*De amore paupertatis, & mirâ supple-
tione defectuum.*

CAPUT VII.



UNTER cetera charismatum dona; quæ à largo datore Franciscus obtinuit; prærogativâ quadam speciali promeruit in divitias simplicitatis excrefcere per altiffimæ paupertatis amorem. Hanc Filio Dei, Vir sanctus familiarem attendens, & jam quasi toto orbe repulfam, caritate sic studuit desponsare perpetuâ, quòd non folùm pro eâ patrem matremque reliquit, verùm etiam quæ habere potuit, univerfa difperfit. Nemo tam auri, quàm ipfe cupidus paupertatis: nec thefauri custodiendi follicitior ullus, quàm ifte hujus Evangelicæ margaritæ. In hoc præcipuè fuus offende-
batur afpectus, fi quicquam videret in fratribus, quod paupertati non per omnia confonaret. Re vera ipfe à principio Religionis ufque ad mortem, tunicâ, chordulâ, & femoralibus dives, iis contentus fuit. Christi Jefu pauper.

paupertatem & matris, frequenter cum lacrymis revocabat ad mentem: inde, hanc virtutum asserens esse reginam, quia in Rege Regum, & in Reginâ matre ipsius tam præstanter effulsit. Nam & fratribus in conclav quærentibus, quæ virtus magis amicum redderet Christo: quasi secretum sui cordis aperiens, respondebat *Paupertatem novveritis fratres, specialem viam esse salutis*; tanquam humilitatis fomentum, perfectionisque radicem: cujus est fructus multiplex, sed occultus. Hæc enim est *Evangelici agri thesaurus absconditus*: pro quo emendo vendenda sunt omnia, & quæ vendi non possunt, illius comparatione spernenda. Ad hujus, inquit, culmen qui cupit attingere, non solum mundanæ prudentiæ, verum etiam litterarum peritiæ, renunciare quodammodo debet: ut tali expropriatus possessione, introeat in potentias Domini, & nudum se offerat brachiis Crucifixi: *Nequaquam enim sæculo perfecte renunciat, qui proprii sensus oculos intra cordis arcana reservat.*

Sæpe verò de paupertate sermonem faciens, ingerebat fratribus Evangelicum illud, *Vulpes forreas habent, & volucres celi nidos: Filius autem hominis non habet, ubi caput suum reclinet.* Propter quod docebat fratres, ut pauperum more, pauperulas casulas erigerent: quas non inhabitarent ut proprias; sed sicut peregrini & adventiæ alienas. Leges namque peregrinorum esse dicebat, sub alieno colligi tecto, sitire ad patriam, pacificè pertransire. Mandabat dirui aliquando domos erectas, aut fratres exinde amoveri: si aliquid in eis perciperet, quod ratione appropriationis vel sumptuositatis, contrarium esset Evangelicæ paupertati. *Hanc sui dicebat Ordinis fundamentum*: cui substrato primariè sic omnis structura religionis inni-

innititur, ut ipsius firmitate firmetur, & everfione funditus evertatur.

Docbat proinde, ficut revelatione didicerat, sacræ Religionis ingreffum, ab illo fore inchoandum Evangelico verbo; *Si vis perfectus effe; vade, & vende omnia que habes, & da pauperibus*. Ideoque non nifi expropriatos, & nihil penitus retinentes admittebat ad ordinem tum propter verbum sancti Evangelii, tum etiam, ne forent in scandalum loculi reservati. Unde in Marchiâ Anconitanâ cuidam petenti ad Ordinem recipi, verus pauperum Patriarcha respondit: Si vis Christi pauperibus jungi, pauperibus tua distribue. Quo audito perrexit homo, & ductus amore carnali, sua suis reliquit, nilque pauperibus. Verùm cum hoc, illo referente, Vir sanctus audisset, durâ cum increpatione feriens, dixit: Vade viam tuam frater musca: quoniam nondum existi de domo & cognatione tuâ: confanguineis tuis tua dedisti, & defraudasti pauperes: dignus non es pauperibus sanctis sociari. Incepisti à carne; ruinosum fundamentum spiritali fabricæ collocasti. Rediit animalis homo ad suos, & repetiit sua: quæ pauperibus relinquere nolens, virtutis propositum citius dereliquit.

Alio quoque tempore, cum in loco Sanctæ Mariæ de Portiunculâ, tanta esset inopia, quod non posset hospitibus fratribus supervenientibus, secundum necessitatis exigentiam provideri; adiit Virum Dei Vicarius suus, allegans penuriam fratrum, & petens, ut intransium novitiorum res aliquas reservare liceret, ad quas expendas recurrere possent fratres, tempore opportuno. Ad quem Vir sanctus, superni consilii non ignarus; Absit, inquit, à nobis, frater carissime, ut pro quovis homine impiè

impiè agamus in Regulam. Malo te Altare Virginis gloriosæ nudare, cum necessitas id requirit, quam contra paupertatis votum, & observantiam Evangelii, aliquid vel modicum attentare: Gratiùs enim habebit beata Virgo, sancti Evangelii perfectè servato consilio, suum altare detegi, quam altari suo ornato, filii sui promissum consilium prætermitti.

Transiens autem quodam tempore Vir Dei, cum suo socio per Apuliam juxta Barum: invénit in viâ bursam magnam, quasi plena esset denariis, tumescen te m, quam usitato vocabulo, Fundam appellant. Monetur à socio pauper Christi, & instanter inducitur, ut bursa tolleretur à terrâ, & pecunia pauperibus erogetur. Renuit homo Dei, commentum affirmans fore diaboli in bursâ inventâ: & fratrem non suadere rem meriti, sed peccati, aliena scilicet furripere ac donare. Recedunt de loco, festinant iter perficere cœptum. Sed nondum quiescit frater, vacuâ pietate delusus, virum Dei molestans, quasi qui de relevandâ pauperum penuriâ non curaret. Acquivit tandem vir mitis, redire ad locum: non ut fratris voluntatem perficeret, sed ut detegeret diabolicam fraudem. Reversus est ergo ad Fundam cum fratre, & juvene quodam qui erat in viâ. Oratione præmisâ, jubet socio illam levare. Tremefactus frater obstupuit, diabolicum jam præsentiens monstrum: propter obedientiæ tamen sanctæ mandatum, dubietatem abigens cordis, manum extendit ad bursam. Et ecce serpens non modicus de bursâ exsiliens, simulque cum ipsâ subito evanescens, diabolicam deceptionem fratri monstravit. Hostilis itaque versutiæ deprehensâ fallaciâ, dixit Vir sanctus ad socium; Pecunia Servis Dei, ò frater, nihil aliud est, quam diabolus, & coluber venenosus. Acci-

Accidit post hæc, quoddam mirabile Viro sancto, dum se ad civitatem Senensem, causâ exigente, transferret. Tres quidem mulieres pauperculæ, staturâ, ætate, ac facie per omnia similes, in quadam ei magnâ planitie, inter Campilium & sanctum Quiricum occurrerunt; novum salutationis munusculum ei offerentes; Bene veniat, inquirunt, domina paupertas. Quo audito, verus paupertatis amator indicibili repletus est gaudio: utpote qui nihil in se salutandum ab hominibus tam libenter haberet, quàm quod illæ decreverant. Subitò disparentibus illis; considerantes fratres socii tam admirabilem in eis similitudinem, salutationis, occursûs, & disparentiæ novitatem; mysticum aliquid designari circa Virum sanctum, non irrationabiliter perpenderunt. Sanè per illas tres, ut videbatur, mulieres pauperculas, sic uniformi facie occurrentes, sic salutantes insolitè, sic subitò disparentes, Evangelicæ perfectionis formositas, quantum ad castitatem scilicet, obedientiam & paupertatem, satis convenienter ostenditur in Viro Dei, pari formâ perfectè fulsisse: licet gloriari prælegerit in privilegio paupertatis, quam modò matrem, modò sponsam, modò dominam nominare solebat. In hac ceteros cupiebat excedere, qui ex ipsâ didicerat inferiorem se omnibus reputare. Si quando igitur pauperiorem se quempiam, secundum exteriorem habitum cerneret, semetipsum protinus arguens excitabat ad simile: tanquam si æmulâ paupertate concertans, vinci se timeret in illo. Accidit enim, ut pauperculum quemdam obvium haberet in viâ: cujus cùm nuditatem aspiceret, compunctus corde, lamentabili voce dixit ad socium: Magnam verecundiam intulit nobis hujus inopia: quia nos pro magnis divitiis

paupertatem elegimus : & ecce magis relucet in isto .

Propter sanctæ paupertatis amorem , omnipotentis Dei famulus , eleemosynis ostiatim quæsitis utebatur multo libentiùs , quàm oblati . Si quando enim invitatus à magnis personis , mensis esset profusioribus honorandus : prius per propinquas vicinorum domos , panum fragmenta petebat , ac deinde sic ditatus inopiâ discumbere . Et cùm aliquando id fecisset , invitatus à Domino Hostiensi , qui pauperem Christi præcipuo complexabatur affectu , conquerenti Episcopo , quòd suo derogasset honori : utpote qui in ejus comesturus domo , pro eleemosynis isset ; Servus Dei respondit , Magnum , mi domine , vobis honorem exhibui , dum majorem Dominum honoravi ; siquidem beneplacitum est Domino in paupertate , & eâ maximè , quæ voluntaria pro Christo mendicitas est . Hanc dignitatem regalem , quam pro nobis Dominus Jesus egenus factus assumpsit , ut suâ nos ditaret inopiâ , ac verè pauperes spiritu , regni Cælorum reges institueret , & hæredes ; nolo relinquere pro pseudo divitiarum falsarum , nobis ad horam concessio .

Nonnunquam fratres ad petendum eleemosynam hortans , verbis utebatur hujusmodi ; *Ite , inquit , quoniam hæc novissimâ horâ Fratres Minorum commodati sunt mundo , ut electi in eis impleant , undè à Judice commendentur : illud audientes suavissimum verbum ; *Quandiu fecistis uni ex his fratribus meis minimis , mihi fecistis* . Jucundum proinde dicebat , sub Fratrum Minorum titulo mendicare , quem in retributione justorum , Evangelicæ veritatis Magister , ore suo tam signanter expressit . In festis quoque præcipuis , ubi oportunitas aderat , mendicare solitus erat : dicens in sanctis pau-*

pauperibus Propheticum illud impleri, *Pauzem Angelorum manducavit homo*; illum sanè panem Angelicum esse dicebat, quem pro Dei petito amore, & beatis suggerentibus Angelis, pro ipsius caritate largitum, sancta paupertas colligit ostiatim. Unde cùm semel die sancto Paschæ, moram faceret in eremitorio quodam, adeò ab hominum habitatione remoto, quòd commodè mendicare non posset: memor illius, qui discipulis euntibus in Emaus, ipso die in specie peregrini apparuit; ab ipsis fratribus eleemosynam petiit, ut peregrinus & pauper. Quam cùm accepisset humiliter, sacris eos informavit eloquiis: quòd transeuntes per mundi desertum, tanquam peregrini & advenæ, verique Hebræi, Pascha Domini, hoc est, transitum ex hoc mundo ad Patrem, in paupertate spiritûs, continuè celebrarent.

Et quoniam in petendis eleemosynis, non quæstûs agebatur cupidine, sed spiritûs libertate: pater pauperum Deus specialem de ipso curam gerere videbatur. Accidit enim, ut infirmitate gravatus Domini servus in loco Noceræ, reduceretur Assisium per solennes nuncios, ad hoc Assisinas populi devotione transmissos. Qui Christi famulum deducentes, ad villam quandam devenerunt pauperulam, nomine Sarthianum: ubi cùm fames & hora cibum expeterent, euntes & nihil invenientes venale, vacui redierunt. Ad quos Vir sanctus: ideo nihil invenistis, quia plus in muscis vestris quàm in Domino confiditis. Muscas nempe denarios vocavit. Sed revertimini, ait, per domos quas circuistis, & amorem Dei offerentes pro pretio, humiliter eleemosynam postulate. Nec falsâ id æstimatione verecundum putetis aut vile: quoniam universa in eleemosyna post peccat-

tum, dignis & indignis, eleemosynarius ille magnus. largifluâ pietate concessit. Deponunt erubescentiam, milites: & eleemosynam sponte petentes, plura pro Dei amore quàm denariis emunt. Siquidem divino nutu, corde compuncti pauperes incolæ, non solum sua, sed & seipfos liberaliter obtulerunt. Sicque factum est, ut inopiam, quam pecunia relevare non poterat, Francisci pauperes opulenta suppleret.

Tempore quo infirmus jacebat in cremitorio prope Reate; medicus quidam oportuno cum frequentabat officio. Cum autem Christi pauper impotens esset ad rependendam mercedem labori condignam: liberalissimus Deus, ne ipsum sine præsentî remuneratione dimitteret, pium ejus obsequium, hoc novo beneficio, vice pauperis compensavit. Hujus enim medici domus, quam tunc temporis ex omni lucro suo de novo construxerat; parietum patulâ scissione, à summo usque deorsum, adeò de proximo minabatur ruinam, quòd non videbatur per humanæ artis industriam possibile ipsius casui obviare. Ipse verò de sancti Viri meritis plenè confidens; cum magnæ fidei devotione petivit à sociis ejus aliquid sibi concedi, quod idem Vir Dei manibus contrectasset. Cum igitur modicum de capillis ipsius, multâ precum, obtentum instantiâ; posuisset de sero intra muri scissuram: mane confurgens tantâ invenit aperturam illam, soliditate conclusam, ut nec reliquias ibi positas posset extrahere, nec scissuræ prioris vestigium aliquod invenire. Factumque est, ut qui ruinoso corpusculo Servi Dei sedulè ministrarat, ruituræ domus propriæ periculo præcaveret.

Alio quoque tempore, Vir Dei ad quandam eremum

num transferre se volens, ut ibi liberius contemplationi vacaret; quia debilis erat, cujusdam viri pauperis vectabatur asello. Cumque diebus æstivis, famulum Christi sequendo, vir ille montana conscenderet, asperioris & longioris viæ itinere fatigatus, nimioque sitis ardore deficiens: instanter cœpit clamare post sanctum: En morior, inquit, siti, nisi poculi alicujus beneficio continuo refociller. Absque morâ Vir Dei prosilivit de asino: & fixis in terrâ genibus, palmas tetendit in cælum, orare non cessans, donec se intellexit auditum. Oratione tandem finitâ; Festina, inquit viro, ad petram, & illic aquam vivam invenies: quam tibi hac horâ, misericorditer Christus de lapide bibendam produxit. Stupenda Dei dignatio! quæ servis suis tam facili se inclinat. Bibit sitiens homo aquam de petrâ, orantis virtute productam, & poculum hausit de saxo durissimo. Aquæ decursus ibidem ante non fuit: nec ut est diligenter quæsitum, deinceps potuit inveniri.

Qualiter autem per merita sui pauperis, Christus multiplicaverit cibos in mari, cum suo sit loco inferius adnotandum, hoc tantum commemorasse sufficiat; quod de eleemosynâ modicâ sibi collatâ, nautas à famis & mortis periculo, per dies plurimos liberavit: ut ex hoc liquido possit adverti, quod omnipotentis Dei famulus, sicut in educatione aquæ de petrâ, conformis extitit Moyfi; sic in multiplicatione victualium, Eliseo. Procul igitur à pauperibus Christi diffidentia omnis abscedat. Si enim paupertas Francisci adeo copiosæ sufficientiæ fuit, ut subvenientium sibi defectus tam mirâ virtute suppleret; quod nec cibus, nec potus, nec domus deesset, cum pecuniæ, & artis, & naturæ facultas defecerat; multò

multò magis illa merebitur, quæ usitato divinæ providentiæ ordine, communiter conceduntur. Si, inquam, petræ siccitas ad pauperis vocem, abundans poculum sitienti propinavit pauperulo: nil jam inter omnia suum denegabit obsequium his, qui pro Auctore omnium omnia reliquerunt.



De



*De Pietatis adfectu, & quomodo ratione
carentia adfici videbantur ad ipsum.*

C A P U T VIII.



PIETAS vera, quæ secundum Apostolum, *ad omnia valet*, adeò cor Francisci repleverat, ac penetraverat, ut totum videretur virum Dei, in suum dominium vendicasse. Hæc est, quæ ipsum per devotionem sursum agebat in Deum; per compassionem transformabat in Christum; per condescensionem inclinabat ad proximum: & per universalem conciliationem ad singula, refigurabat ad innocentiae statum. Cumque per hanc piè moveretur ad omnia: specialiter tamen animas Christi Jesu sanguine pretioso redemptas, cùm cerneret inquinari aliquâ sorde peccati, tantâ miserationis teneritudine deplorabat, ut eas tanquam mater in Christo, quotidie parturiret. Et hæc penes ipsum caussa præcipua venerandi Verbi Dei ministros: quòd semen fratri suo defuncto, Christo videlicet, pro peccatoribus cruci-

crucifixio, per ipsorum conversionem; & piâ sollicitudine suscitent, & sollicitâ pietate gubernent. Istiusmodi miserationis officium patri misericordiarum omni sacrificio firmabat acceptius: maxime si studio fuerit perfectæ caritatis impensum: ut ad id laboretur magis exemplo, quàm verbo, magis lacrymosa prece, quàm loquaci sermone. Plangendum proinde dicebat prædicatorem, tanquam verâ pietate privatum: sive qui in prædicatione, non animarum quærit salutem, sed propriam laudem; sive qui pravitate destruit vitæ, quod ædificat veritate, doctrinæ. Præferendum huic dicebat fratrem simplicem & elinguem, qui bono exemplo alios provocat ad bonum. Illud quoque verbum, *Donec sterilis peperit plurimos*; taliter exponebat: Sterilis, inquit, est frater pauperculus, qui generandi in Ecclesiâ filios non habet officium. Hic pariet in iudicio plurimos: quia quos nunc privatis orationibus convertit ad Christum, suæ gloriæ tunc Iudex adscribet. Quæ multos habet filios, infirmabitur: quia prædicator vanus & loquax, qui multis nunc, quasi suâ virtute genitis gaudet, cognoscet tunc, se nil proprii habere in eis.

Cùm igitur animarum salutem viscerosâ pietate appeteret, & fervidâ æmulatione zelaret: suavissimis se dicebat repleri odoribus, & quasi unguento pretioso liniri; cùm sanctorum fratrum per orbem distantium odoriferâ famâ multos audiret ad viam veritatis induci. Ex talium auditu exultabat in spiritu: benedictionibus omni acceptione dignissimis fratres illos accumulans, qui verbo vel opere ad Christi amorem inducerent peccatores. Sic etiam qui Religionem sacram, iniquis violarent operibus, maledictionis ejus gravissimam incurrebant sententiam;

A te

A te Domine, inquit, sanctissime, & à totâ celesti curiâ, & à me parvulo tuo sint maledicti: qui suo malo exemplo confundunt & destruunt, quod per sanctos fratres Ordinis hujus ædificasti, & ædificare non cessas. Tantâ frequenter afficiebatur mœstitiâ super scandalo pusillorum, ut deficere se putaret, nisi divinæ fuisset clementiæ consolatione suffultus. Cùm autem semel malis turbatus exemplis, anxio spiritu misericordem patrem precaretur pro filiis, responsum hujusmodi reportavit à Domino. Cur tu pauper homuncio conturbaris; An ego te super Religionem meam sic pastorem institui, ut me principalem nescias esse patronum? Hominem simplicem ad hoc te constitui: ut quæ in te fecero, non humanae industriæ, sed supernæ gratiæ adscribantur. Ego vocavi, servabo, & pascam, & aliis excidentibus alios subrogabo: ita ut si nati non fuerint, faciam illos nasci. Et quantiscunque fuerit impulsibus paupercula hæc concussa Religio, salva semper meo munere permanebit.

Detractionis quoque vitium inimicum fonti pietatis & gratiæ, tanquam serpentinum abhorrebat morsum, & atrocissimam pestem; & piissimo Deo abominabile fore firmabat: pro eo quòd detractor animarum sanguine pascitur, quas gladio linguæ necat. Audiens semel, fratrem quendam denigrare famam alterius; conversus ad Vicarium suum dixit: Surge, surge, discute diligenter: & si accusatum fratrem innocentem reperis, accusantem durâ correctione cunctis redde notabilem. Nonnunquam verò eum, qui fratrem suum famæ gloriâ spoliaret, judicabat habitu spoliandum: nec ad Dominum oculos posse levare, nisi priùs quod abstulerat, reddere pro posse curaret. Tantò major est (ajebat) detractorum impietas,

K

quàm

quàm latronum: quanto lex Christi, quæ in observantiâ pietatis impletur, magis animarum, quàm corporum nos astringit optare salutem.

Afflictis quoque qualicunque corporali molestiâ, mirâ compassionis teneritudine condescendens, si quid penuriæ, si quid defectûs in aliquo cerneret, pii cordis dulcedine regerebat in Christum. Sanè clementiam habebat ingenitam, quam superinfusa Christi pietas duplicabat. Itaque liquecebat animus ejus ad pauperes & infirmos, & quibus non poterat manum, exhibebat affectum. Contigit semel, ut pauperi cuidam elemosynam importunè petenti unus è fratribus duriùs responderet. Quod audiens pauperum pius amator, fratri præcepit, ut ad illius pauperis pedes se nudatum prosterneret: proclamaret culpabilem, orationis suffragium postularet, & veniam. Quod cùm ille fecisset humiliter, dulciter pater adjecit; Dum pauperem vides, ò frater, speculum tibi proponitur Domini, & pauperis matris ejus. In infirmis similiter infirmitates quas assumpsit, considera. Cumque in pauperibus cunctis, & ipse Christianissimus pauper effigiem Christi prospiceret: si qua etiam necessaria vitæ sibi collata fuissent, eis occurrentibus non solum liberaliter conferebat, verum etiam ac si illorum propria essent; judicabat esse reddenda. Accidit semel, ut eidem redeunti de Senis, pauper quidam occurreret: cum occasione infirmitatis, super habitum palliolo quodam esset amictus. Cujus miseriam oculo clementi conspectâ; Oportet, inquit ad socium, ut reddamus mantellum pauperculo isti, nam ipse est: mutuò enim ipsum accepimus, donec pauperiorem invenire contingeret. Socius autem, pii Patris necessitatem considerans, pertinaciter obstitabat, ne provide-

videret alii, se neglecto. At ille; Pro furto, ait, mihi reputo à magno eleemosynario imputandum; si hoc quod fero, non dederò magis egenti. Propterea, de omnibus quæ sibi dabantur ad necessitatem corporis relevandam; solitus erat à dantibus licentiam petere: ut licitè posset, si magis egenus occurreret, erogare. Nulli prorsus rei parcebat, nec mantellis, nec tunicis, nec libris, nec etiam paramentis altaris: quin omnia hæc dum posset, ut pietatis impleret officium, indigentibus largiretur. Pluries cùm oneratis obviaret in viâ pauperibus, imbecilles humeros illorum oneribus supponebat.

Consideratione quoque primæ originis omnium abundantiori pietate repletus, creaturas quantumlibet parvas, fratris vel sororis appellabat nominibus: pro eo quòd sciebat eas unum secum habere principium. Illas tamen viscerosius complexabatur, & dulcius quæ Christi mansuetudinem piam, similitudine naturali prætendunt, & Scripturæ significatione figurant. Redemit frequenter agnos, qui ducebantur ad mortem: illius memor Agni mitissimi, qui ad occisionem duci voluit pro peccatoribus redimendis. Hospitato quadam vice Servo Dei apud Monasterium Sancti Verecundi, de Episcopatu Eugubii: ovicula quædam agniculum peperit illâ nocte. Aderat sus ferocissima, quæ vitæ innocentis non parcens, rapaci eum morsu necavit. Hoc audito, pius pater mirâ compassionē commotus, & Agni sine maculâ recordatus; lamentabatur pro morte agniculi coram omnibus, dicens: Heu me, frater agnicule, animal innocens, Christum hominibus repræsentans! maledicta sit impia, quæ te interfecit, nullusque de eâ comedat homo, vel bestia. Mirabile dictu! Statim infirmari cœpit porca malefica: & tribus

diebus corpoream pœnam exsolvens; ultricem tandem pertulit necem. Projecta autem in vallum Monasterii, ibique longo tempore jacens, in modum tabulæ desiccata, nulli fuit esca famelico. Advertat igitur humana impietas, quali pœnâ sit ferienda finaliter; si tam horrendâ morte percussa est ferocitas bestialis. Perpendat & fidelis devotio, quàm in Servo Dei pietas fuerit admirandæ virtutis, & copiosæ dulcedinis, ut ei applauderet suo modo etiam natura brutorum. Iter enim faciens juxta civitatem Senensem, invenit in pascuis magnum ovium gregem. Quas cum benignè (ut erat solitus) salutasset; relicto pastu, occurrerunt omnes ad eum: levantisque capita sua, erectis in eum luminibus intendebant. Tantum quidem ei fecerunt applausum, ut & pastores mirarentur & fratres: cernentes circa ipsum tam ovium agnos, quàm ipsos arietes sic mirabiliter exultantes.

Alio quoque tempore, apud Sanctam Mariam de Portiunculâ, quædam Viro Dei fuit ovis oblata, quam propter innocentiae & simplicitatis amorem, quas ovis natura prætendit, gratanter suscepit. Monebat pius vir oviculam, ut & laudibus divinis intenderet, & ab omni fratrum offensâ caveret. Ovis autem, quasi Viri Dei pietatem adverteret, informationem ipsius sollicitè observabat. Nam audiens fratres in choro cantare, & ipsa Ecclesiam ingrediens, sine alicujus informatione, flectebat genua: vocem balatûs emittens, ante Altare Virginis Matris Agni, ac si eam salutare gestiret. Insuper & cum elevaretur sacratissimum Christi Corpus, inter Missarum solemniam, flexis curvabatur poplitibus: tanquam si reverens pecus de irreverentiâ indevotos argueret; Christoque devotos ad Sacramenti reverentiam invitaret. Tempore

pore quodam agniculum in Urbe secum habuerat, ob reverentiam illius mitissimi agni, quem nobili matronæ, dominæ scilicet Jacobæ de Septem foliis, in suo recessu conservandum commisit. Agnus verò quasi in spiritualibus eruditus à Sancto, dominæ ad Ecclesiam eunti, stanti & revertenti, societate inseparabili cohærebat. Si matutinali horâ, domina tardaret exsurgere; agnus consurgens impellebat eam corniculis, & balatibus excitabat; gestibus adhortans & nutibus, ut ad Ecclesiam properaret. Propter quod, agnus Francisci discipulus, devotionis jam magister effectus, ut mirabilis & amabilis à dominâ servabatur.

Alio quoque tempore, apud Græcium, vivus Viro Dei oblatus fuit lepusculus: qui liber in terrâ positus, cum posset quò vellet effugere, vocante se Patre benigno, in sinum illius propero cursu saltavit. Quem ipse pio cordis affectu circumfovens, videbatur eidem compati quasi mater: dulcique allocutione commonitum, ne se iterum capi permetteret, liberum abire permisit. Cumque pluries in terra positus ut abscederet, semper in sinum Patris rediret (tanquam si sensu quodam occulto, cordis ipsius perciperet pietatem) tandem jussu Patris à fratribus delatus est ad loca solitudinis tutiora. Modo quoque consimili, in insulâ lacus Perusini, cuniculus quidam captus, & Viro Dei oblatus, cum ceteros fugeretur, manibus ejus & sinui, se domesticâ securitate commisit. Per lacum Reatinum eidem ad eremum de Græcio properanti, piscator unam ex devotione fluvialem obtulit avem: quam cum libenter susceptam apertis invitaret manibus ad recessum, nec illa vellet abire; erectis in cælum oculis, diu in oratione permanfit: & quasi aliunde
post

post longam horam ad se reversus, dulciter iteratò mandavit aviculæ, ut Dominum laudatura recederet. Susceptâ itaque cum benedictione licentiâ, gestu corporis quoddam prætendens gaudium, avolavit. In eodem lacu, similiter oblatus fuit ei piscis magnus & vivus: quem, more solito, fraterno nomine vocans, in aquam reposuit juxta navem. Piscis verò coram Viro Dei ludebat in aquâ: & quasi amore illius allectus, nullatenus recessit à navi, nisi priùs ab eodem cum benedictione licentiâ sibi datâ.

Alio quoque tempore, ambulans cum quodam fratre per paludes Venetiarum, invenit maximam avium multitudinem residentium, & cantantium in virgultis. Quibus visis dixit ad socium; Sorores aves laudant creatorem suum: nos itaque in medium ipsarum cuntes; laudes & horas Canonicas Domino decantemus. Cumque in medium ipsarum intrassent, non sunt aves motæ de loco; & quia propter garritum ipsarum, in dicendis horis se mutuò audire non poterant, conversus Vir sanctus dixit ad aves: Sorores aves, à cantu cessate, donec laudes Deo debitas persolvamus. At illæ continuò tacuerunt: tamdiu in silentio persistentes, quamdiu dictis horis spatiosè, & laudibus persolutis, à sancto Dei cantandi licentiam receperunt. Dante autem eis Viro Dei licentiam, statim more solito cantum suum resumpserunt.

Apud sanctam Mariam de Portiunculâ, juxta cellam Viri Dei, super ficum Cicada residens & decantans, cum Servum Domini (qui etiam in parvis rebus, magnificentiam Creatoris admirari didicerat) ad divinas laudes, cantu suo frequentius excitaret: ab eodem quadam die

voca-

vocata, velut edocta cælitus, super manum volavit ipſius. Cui cum dixiſſet: Canta ſoror mea Cicada, & Dominum Creatorem tuo iubilo lauda; ſine morâ obediens canere cœpit, nec deſtitit, donec juffu patris ad locum proprium revolavit. Manſit autem per octo dies ibidem, quolibet die veniendo, cantando, & recedendo; ejus juffa perficiens. Tandem vir Dei ait ad ſocios: Demum jam ſorori noſtræ Cicadæ licentiam: ſatis enim noſ ſuo cantu lætificans, ad laudes Dei octo dierum ſpatio excitavit. Et ſtatim ab eo licentiata receſſit; nec ultra ibidem apparuit, ac ſi mandatum ipſius non auderet aliquatenus prætereire.

Eidem Senis infirmo; Phaſianus quidam de novo captus, à nobili quodam tranſmiſſus eſt vivus: qui continuo ut virum ſanctum audivit & vidit, tantâ ei amicabilitate cohæſit, ut nullo modo pateretur ab ipſo ſeſungi: Nam pluribus vicibus, extra locellum fratrum, in vineâ poſitus, ut abiret, ſi vellet, rapido ſemper curſu redibat ad Patrem: tanquam ſi ab eodem omni fuiſſet tempore educatus. Deinde cuidam collatus viro, qui ex devotione ſervum Dei viſitare ſolebat; velut ſibi moleſtum foret à pii Patris abſentari conſpectu, eſcam recuſavit omnino: Reportatus tandem ad famulum Dei, ut conſpexit eundem, quibuſdam hilaritatis prætenſis geſtibus, avidè manducavit.

Cùm ad eremum perveniſſet Alvernæ, propter Quædragefimam celebrandam in honorem Archangeli Michaelis: diverſi generis aves circa ipſius cellulam volitantes, concentu ſonoro, & lætitiæ geſtibus, quaſi de ejus adventu gaudentes, Patrem pium invitare, ac allicere videbantur ad moram. Quo viſo, dixit ad ſocium: Cerno
fra-

frater, voluntatis esse divinæ, quod hîc aliquandiu comoremur : tantùm sorores aviculæ de nostrâ videntur præsentîâ consolari. Cùm igitur contraheret ibi moram, Falco ibidem nidificans, magno se illi amicitîæ fœdere copulavit. Nam semper horam nocturno tempore, in quâ vir sanctus ad divina officia surgere solitus erat, cantu suo præveniebat & sono : quod famulo Dei gratissimum erat : eo quòd tanta sollicitudo, quam circa eum gerebat, omnem ab ipso torporem desidiæ excuteret. Cùm verò servus Christi infirmitate plus solito gravaretur, parcebat Falco, nec tam tempestivas indicebat vigilias : siquidem velut instructus à Deo, circa diluculum, suæ vocis campanam levi tactu pulsabat. Divinum certè videtur fuisse præfagium, tam in exultatione multimodi generis avium, quàm in cantu Falconis : cùm Dei laudator & cultor, pennis contemplationis subvectus, tunc foret illic apparitione Seraphicâ sublimandus.

Moram eo faciente, tempore quodam in eremitorio Græcii; loci illius indigenæ malis multiplicibus vexabantur. Nam & Luporum rapacium multitudo, non solum bruta, sed & homines consumeat : & grando annuâ tempestate blada & vineas devastabat. Dum igitur sic afflictis præco sacri Evangelii prædicaret, dixit ad eos; Ad honorem & laudem Dei omnipotentis fidere jubeo vobis, quòd pestilentia hæc omnis abscedet; & respiciens vos Dominus, multiplicabit in temporalibus bonis, si mihi credentes misereamini vestri : ut verâ confessione præmissâ, dignos faciatis pœnitentiæ fructûs. Iterum hoc annuncio vobis, quòd si beneficiis ingrati, ad vomitum conversi fueritis : inno vabitur plaga, duplicabitur pœna, & major in vos irâ deserviet. Ab illâ utique horâ,

horâ, pœnitentiam ad exhortationem ipsius agentibus illis, cessaverunt clades, periére pericula : nec molestiæ quicquam lupi intulére, vel grandines. Imò, quod majus est, si quando vicinorum arva grando pervaderet : istorum terminis appropinquans, terminabatur ibidem, aut in partem aliam divertebat. Cessavit grando, servaverunt & lupi pactionem servi Dei : nec contra pietatis legem, in homines ad pietatem conversos, attentaverunt amplius defœvire; quamdiu juxta condictum, contra piissimas Dei leges impiè non egerunt. Piè igitur sentiendum est de pietate viri beati : quæ tam miræ dulcedinis & virtutis fuit, ut domaret ferocia, domesticaret Silvestria, mansueta doceret : & brutorum naturam homini jam lapsa rebellem, ad sui obedientiam inclinaret. Verè hæc est quæ cunctas sibi creaturas confœderans, *valet ad omnia; promissionem habens vitæ quæ nunc est, & futura.*





*De fervore Caritatis ejus . Et desiderio
Martyrii .*

C A P U T IX.



CARITATEM ferventem, quâ sponſi
amicus Franciscus ardebat, quis enar-
rare ſufficiat ? Totus namque quaſi
quidam carbo ignitus, divini amoris
flammâ videbatur abſorptus. Subitò
enim ad auditum amoris Domini ex-
citabatur, afficiebatur, inflammaba-
tur: quaſi plectrò vocis extrinſecæ chorda cordis interior
tangeretur . Talem pro eleemoſynis cenſum offerre, no-
bilem prodigalitatem dicebat . Et eos qui minùs ipſum ,
quàm denarios reputarent , eſſe ſtultiſſimos : pro eo quòd
folius divini amoris impretiabile pretium , ad regnum cæ-
lorum ſufficiat comparandum : & ejus qui nos multum
amavit , multum ſit amor amandus . Ut autem ex omni-
bus excitaretur ad amorem divinum, exultabat in cun-
ctis operibus manuum Domini : & per jucunditatis ſpe-
cula, in vivificam conſurgebat rationem, & cauſſam .
Con-

Contuebatur in pulchris pulcherrimum; & per impressa rebus vestigia prosequabatur ubique dilectum: de omnibus sibi scalam faciens, per quam conscenderet ad apprehendendum eum, qui est desiderabilis totus. Inaudita namque devotionis affectu, fontalem illam bonitatem in creaturis singulis; tanquam in rivulis degustabat: & quasi cælestem concentum perciperet, in consonantiâ virtutum, & actuum eis datorum à Deo, ipsas ad laudem Domini more Prophetæ David dulciter hortabatur.

Christus Jesus crucifixus intra suæ mentis ubera; ut myrrhæ fasciculus jugiter morabatur: in quem optabat, per excessivi amoris incendium totaliter transformari. Prærogativâ quoque peculiaris devotionis ad ipsum, ab Epiphaniæ festo, usque ad continuos quadraginta dies, eo scilicet tempore, quo Christus latuit in deserto, ad solitudinis loca declinans, cellâque reclusus, quantâ poterat artitudine cibi & potûs, jejniis; & orationibus, & laudibus Dei, sine intermissione vacabat. Tam fervido quidem in Christum ferebatur affectu. Sed & dilectus, illi tam familiarem rependebat amorem; ut videretur ipsi famulo Dei, quasi jugem præ oculis, ipsius Salvatoris sentire præsentiam; sicut aliquando fociis familiariter revelavit. Flagrabat erga sacramentum Dominici corporis, fervore omnium medullarum: stupore admirans permaximo, illam carissimam dignationem, & dignantissimam caritatem. Sæpe communicabat, & tam devotè, ut alios devotos efficeret: dum ad immaculati Agni degustationem suavem, quasi spiritu ebrius, in mentis ut plurimum rapiebatur excessum. Matrem Domini nostri Jesu Christi indicibili complectebatur amore: eo quod Dominum

Majestatis fratrem nobis effecerit, & per eam sumus misericordiam consequuti. In ipsâ post Christum præcipuè fidens: eam sui ac suorum advocatam constituit. Et ad honorem ipsius à festo Apostolorum Petri & Pauli, usque ad festum Assumptionis, devotissimè jejunabat. Angelicis spiritibus ardentibus igne mirifico, ad excedendum in Deum, & electorum animas inflammandas; inseparabilis erat amoris vinculo copulatus: & ob devotionem ipsorum, ab Assumptione Virginis gloriosæ, quadraginta diebus jejunans, orationi jugiter insistebat. Beato autem Michaeli Arcangelo, eo quòd animarum repræsentandarum haberet officium, speciali erat amore devotior: propter fervidum quem habebat zelum, ad salutem omnium salvandorum. Ex recordatione Sanctorum omnium, tanquam lapidum ignitorum, in Deificum recalescebat incendium: Apostolos omnes, & præcipuè Petrum & Paulum, propter fervidam caritatem quam habuerunt ad Christum, summâ devotione complexans: ob quorum reverentiam & amorem, quadragesimæ specialis jejunium Domino dedicabat.

Non habebat aliud Christi pauper nisi duo minuta, corpus scilicet & animam quod posset liberali caritate largiri. Sed hæc per amorem Christi sic offerebat continuè, ut quasi omni tempore per rigorem jejunii corpus; & per ardorem desiderii, spiritum immolaret: exterius in atrio sacrificans holocaustum, & in templo interius concremans thymiana. Sic autem eum caritatis excessiva devotio sursum in divina ferebat, ut ejusdem affectuosa benignitas ad naturæ consortes & gratiæ dilataret. Quem enim creaturis ceteris germanum pietas cordis effecerat: mirum non est, si Creatoris insignitis imagine, & sanguine

ne redemptis auctoris, germaniorem Christi caritas faciebat. Non se Christi reputabat amicum, nisi animas foret, quas ille redemit. Saluti animarum nihil præferendum esse dicebat: eo maximè probans, quòd unigenitus Dei pro animabus dignatus fuerit in cruce pendere. Hinc sibi in oratione luctamen, in prædicatione discursus, & in exemplis dandis excessus. Unde quoties austeritas nimia reprehenderetur in ipso; respondebat se datum aliis in exemplum. Licet enim innocens ejus caro, quæ jam se sponte subdebat spiritui, nullo egeret flagello, propter offensas: tamen exempli causâ renovabat illi pœnas & onera; custodiens propter alios vias duras. Dicebat enim: *si linguis hominum loquar, & Angelorum, caritatem autem in meipso non habeam, & proximis virtutum exempla non monstrum, parum prosum aliis, mihi nihil.*

Ferventi quoque caritatis incendio, gloriosum sanctorum Martyrum æmulabatur triumphum: in quibus nec amoris flamma extingui, nec fortitudo potuit infirmari. Desiderabat propterea & ipse, illâ perfectâ caritate succensus, quæ foras mittit timorem, per martyrii flammam, hostiam Domino se offerre viventem: ut & vicem Christo pro nobis morienti rependeret, & ad divinum amorem ceteros provocaret. Sexto namque conversionis suæ anno, desiderio martyrii flagrans, ad prædicandam fidem Christianam, & pœnitentiam Saracenis; & aliis infidelibus, ad partes Syriæ transfretare disposuit. Cumque navem quandam ut illuc tenderet, conscendisset: ventis contrariis flantibus, compulsus est in Scavoniæ partibus applicare. Cùm igitur moram aliquandiu contraxisset ibidem, nec invenire posset navem tunc temporis transfretantem: fraudatum à suo desiderio se sentiens,

tiens ; nautas quosdam Anconam tendentes , ut amore Dei cum secum ducerent , exoravit . Verùm illis propter expensarum defectum , pertinaciter recusantibus : vir Dei plurimùm de Domini bonitate confusus , navem cum socio latenter conscendit . Adfuit quidam , à Deo , ut creditur , pro paupere suo missus ; qui secum ferens necessaria victūs , quendam timentem Deum de navi ad se vocatum sic alloquutus est : Hæc pro pauperibus fratribus in navi latitantibus , conserva fideliter , ac necessitatis tempore amicabiliter subministra . Sicque factum est , ut nautis propter vim ventorum , per dies plurimos nusquam applicare valentibus , omnia consumerentur ipsorum ci- baria , & sola pauperi Francisco collata desuper eleemosyna superesset . Quæ cùm esset permodica , tantum divi- nâ virtute suscepit augmentum : ut diebus plurimis in mari , propter tempestatem continuam contrahentibus moram , usque ad portum Anconæ , omnium necessita- tibus plenariè subveniret . Videntes itaque nautæ per ser- vum Dei multa se mortis evasisse discrimina ; tanquam qui maris horrenda pericula fenserant , & miranda opera Domini viderant in profundo , gratias egerunt omnipo- tenti Deo : qui semper in suis amicis & servis mirabilem , & amabilem se ostendit , Cùm autem , relicto mari , terram perambulare cœpisset : jactato in eam salutis semine , re- portabat manipulos fructuosos .

Verùm quia martyrii fructus adeò cor ejus allexe- rat , ut pretiosam pro Christo mortem , super omnia vir- tutum merita peroptaret , versus Marrochium iter arri- puit , ut Miramolino , & genti ejus Christi Evangelium prædicaret : si quo modo ad concupitam palmam valeret attingere . Tanto namque desiderio ferebatur , ut quam-
vis

vis esset imbecillis corpore, peregrinationis suæ præcurreret comitem: & ad exsequendum propositum festinus, & tanquam spiritu ebrius advolaret. Sed cum jam usque in Hispaniam perrexisset, divinâ dispositione, quæ ipsum reservabat ad alia; gravissima ei supervénit infirmitas: quâ præpeditus, quod cupiebat, adimplere nequivit. Sentiens igitur vir Dei, quod necessaria erat adhuc proli quam genuerat, ipsius vita in carne; quamvis mortem sibi lucrum putaret esse: rediit ad pascendum oves suæ solitudini commendatas.

Verùm caritatis ardore, spiritum ipsius ad martirium perurgente, tertiâ adhuc vice, pro fide Trinitatis; effusione sui sanguinis dilatandâ, versus infideles proficisci tentavit. Tertiodecimo namque conversionis suæ anno, ad partes Syriæ pergens, multis se periculis constanter exposuit, ut Soldani Babylonæ posset adire præsentiam. Inter Christianos enim ac Saracenos tunc bellum tam implacabile erat; exercituum castris hinc inde in campo cominus ex adverso locatis; ut via mutui transitus sine mortis discrimine non patéret. Exierat siquidem à Soldano edictum crudele: ut quicumque caput alicujus Christiani afferret, Bisantium aureum pro mercede reciperet. At intrepidus Christi miles Franciscus, sperans in proximo suum adipisci posse propositum, definivit iter arripere: mortis pavore non territus, sed desiderio provocatus. Oratione namque præmissâ, confortatus à Domino, confidenter illud propheticum decantabat; *Nam etsi ambulare vero in medio umbræ mortis, non timebo mala: quoniam tu mecum es.* Assumpto igitur socio fratre Illuminato nomine, viro utique luminis & virtutis; cum iter cœpisset, obvias habuit oviculas duas: quibus visis
exhi-

exhilaratus vir sanctus, dixit ad socium: Confide frater in Domino: nam in nobis Evangelicum illud impletur; *Ecce ego mitto vos sicut oves in medio luporum*. Cum autem processissent ulterius, occurrerunt ei satellites Saraceni: qui tanquam lupi celerius accurrentes ad oves, servos Dei feraliter comprehensos, crudeliter & contemptibiliter pertractarunt: afficientes convitiis, assilgentes verberibus, & vinculis alligantes. Tandem afflictos multipliciter, & attritos, ad Soldanum, divinâ disponente providentiâ, juxta viri Dei desiderium perduxerunt. Cum igitur princeps ille perquireret à quibus, & ad quid, & qualiter missi essent, & quomodo advenissent: intrepido corde respondit Christi servus Franciscus; Non ab homine, sed à Deo Altissimo se fuisse transmissum: ut ei & populo suo viam salutis ostenderet, & annunciarret Evangelium veritatis.

Tantâ verò mentis constantiâ, tantâ virtute animi, tantoque fervore spiritûs, prædicto Soldano prædicavit Deum trinum & unum, & Salvatorem omnium Jesum Christum: ut Evangelicum illud in ipso claresceret veraciter esse completum; *Ego dabo vobis os, & sapientiam, cui non poterunt resistere, & contradicere omnes adversarii vestri*. Nam & Soldanus admirandum in viro Dei fervorem spiritûs conspiciens & virtutem, libenter ipsum audiebat, & ad moram contrahendam cum eo, instantius invitabat. Christi verò servus superno illustratus oraculo; Si vis, inquit, converti tu, cum populo tuo ad Christum: ob illius amorem libenter vobiscum commorabor. Quòd si hæsitas, propter fidem Christi legem Mahumeti dimittere, jube ignem accendi permaximum; & ego cum sacerdotibus tuis ignem ingrediar: ut vel sic

cognoscas, quæ fides certior & sanctior non immeritò tenenda sit. Ad quem Soldanus: Non credo quòd aliquis de sacerdotibus meis se vellet igni propter fidem suam defendendam exponere, vel genus aliquod subire tormenti: Viderat enim statim quendam de presbyteris suis, virum authenticum & longævum, hoc audito verbo, de suis conspectibus aufugisse. Ad quem vir sanctus: Si mihi velis promittere pro te, & populo tuo, quòd ad Christi cultum, si ignem illæsus exiero, veniatis; ignem solus introibo: & si combustus fuero, imputetur peccatis meis. Si autem divina me protexerit virtus: Christum Dei virtutem, & sapientiam, verum Deum, & Dominum Salvatorem omnium agnoscatis. Soldanus autem, optionem hanc accipere, se non audere respondit: quia seditionem populi formidabat. Obtulit tamen ei multa munera pretiosa: quæ Vir Dei non mundanarum rerum, sed salutis animarum avidus, sprexit omnia quasi lutum. Soldanus autem videns virum sanctum, tam perfectum rerum, mundialium contemptorem: admiratione permotus, majorem erga ipsum devotionem concepit. Et quamvis ad fidem Christianam transire nollet, vel forsan non auderet: rogavit tamen devotè famulum Christi, ut prædicta susciperet pro salute ipsius, Christianis pauperibus, vel Ecclesiis eroganda. Ipse verò quia pondus fugiebat pecuniæ & in animo Soldani veræ pietatis non videbat radicem, nullatenus acquievit. Videns etiam se non proficere in conversione gentis illius, nec suum assequi posse propositum: ad partes fidelium, divinâ revelatione præmonitus, remeavit. Sic itaque Dei ordinante clementiâ, & sancti viri promerente virtute; misericorditer & mirabiliter factum est, quòd Christi amicus, mortem

M

pro

pro ipso viribus totis exquireret, & tamen nullatenus inveniret: ut & merito non careret optati martyrii, & insigniendus servaretur in posterum privilegio singulari. Sic utique factum est, ut ignis ille divinus, adhuc perfectiùs ipsius æstualet in corde, ut post patentius evaporaret in carne. O verè beatum virum, cujus caro etsi tyrannico ferro non cæditur, occisi tamen Agni similitudine non privatur. O, inquam, verè ac plenè beatum, cujus animam etsi gladius persecutoris non abstulit, palmam tamen martyrii non amisit.





De studio & virtute Orationis.

CAPUT X.



SENTIENS Christi servus Franciscus, corpore se peregrinum à Domino; cùm jam ad terrena foris desideria, per Christi caritatem totus esset insensibilis factus: ne foret absque consolatione dilecti, sine intermissione orans, spiritum Deo contendeat exhibere præsentem. Erat quidem oratio contemplanti solatium; dum supernarum circuitu mansionum, Angelorum concivis jam factus, ferventi desiderio quærebat dilectum: à quo solus cum carnis paries disjungebat. Erat & operanti præsidium: dum in omnibus quæ agebat, de suâ diffidens industriâ, & de supernâ pietate confidens, per ipsius instantiam totum in Domino cogitatum jactabat. Orationis gratiam viro religioso desiderandam super omnia, firmiter asserbat: nullumque credens sine ipsâ in Dei prosperari servitio, modis, quibus poterat, fratres suos ad ejus studium excitabat.

M 2

Nam

Nam ambulans & sedens, intus & foris, laborans & vacans, orationi adeò erat intentus: ut illi videretur, non solum quicquid erat in eo cordis & corporis, verum etiam operis & temporis dedicasse. Solitus erat nullam visitationem spiritûs, cum negligentia præterire. Siquidem cum offerebatur, sequebatur eam: & quamdiu Dominus concedebat, dulcedine perfruebatur oblatâ. Cum autem intentus itineri, divini spiritûs aliquos sentiret afflatus, fociis præcedentibus gradum figebat: novamque inspirationem ad fruitionem convertens, gratiam non recipiebat in vacuum.

Suspendebatur multoties tanto contemplationis excessu, ut supra semetipsum raptus, & ultra humanum sensum aliquid sentiens, quid ageretur circa se exteriùs ignoraret. Transiens namque semel, per Burgum sancti sepulcri, castrum utique populosum, pro debilitate corporis subvectus asello, obvias habuit turbas, in eum præ devotione ruentes. Tractus autem & detentus ab eis, compressus quoque, ac multipliciter attrectatus; insensibilis videbatur ad omnia: & velut exanime corpus, de iis quæ fiebant circa ipsum, nihil penitus advertebat. Unde cum jam diu transito castro, turbisque relictis, pervenisset ad quoddam domicilium leproforum: quasi aliunde rediens, cælestium contemplator, sollicitè requisivit, quando propinquarent ad Burgum. Mens quidem ipsius in cælestibus fixa splendoribus, varietates non senserat locorum, nec temporum, nec occurrentium personarum. Quod ipsi accidisse frequentius, sociorum ejus experientia multiplex comprobavit. Et quia in oratione percepit sancti Spiritûs desideratam præsentiam, tanto familiarius se offerre precantibus, quanto plus invenit elongatos

gatos à strepitu mundanorum: idèd loca solitaria quærens, ad solitudines & Ecclesias derelictas oraturus nocte pergebat. Ubi dæmonum pugnas horribiles frequenter sustinuit: qui secum sensibilibiter confligentes, nitebantur ipsum ab orationis studio perturbare. Ipse verò armis munitus cælestibus, quanto vehementius impetebatur ab hostibus, tanto fortior in virtute, & ferventior reddebatur in prece. Fidenter dicens ad Christum: *Sub umbrâ alarum tuarum protege me, à facie impiorum, qui me afflixerunt.* Ad dæmones autem: Facite quicquid in me valetis, maligni spiritus, & fallaces: Non enim potestis, nisi quantum vos manus superna relaxat: & ego ad perferendum omnia, quæ illa infligenda decreverit, cum omni jucunditate paratus assisto. Quam mentis constantiam superbi dæmones non ferentes, abscedebant confusi.

Vir autem Dei solitarius remanens, & pacatus, nemora replebat gemitibus, loca spargebat lacrymis, pectora manu tundebat: & quasi occultius secretarium nactus, confabulabatur cum Domino suo. Ibi respondebat Judici, ibi supplicabat Patri, ibi colloquebatur amico. Ibi quoque à fratribus ipsum piè observantibus, aliquoties auditus est, clamosis gemitibus apud divinam pro peccatoribus interpellare clementiam: deplorare etiam altâ voce, quasi coram se positam Dominicam passionem. Ibi visus est nocte orans manibus ad modum crucis protensis, toto corpore sublevatus à terrâ & nubeculâ quadam fulgente circumdatus: ut illustrationis mirabilis intra mentem, mira circa corpus perlustratio testis esset. Ibi etiam, sicut certis est comprobatum indiciis, incerta sibi & occulta divinæ sapientiæ pandebantur: quamvis illa
non

non vulgaret exteriùs, nisi quantum Christi urgebat caritas, & proximorum utilitas exigebat: Dicebat enim: Levi mercede rem impretiabilem contingit amitti; & illum qui dedit, ad non dandum iterum faciliè provocari.

Quando à privatis redibat orationibus, quibus penè in virum alterum mutabatur, summopere studebat conformare se ceteris: ne fortè quod foris ostenderet, aura favoris intus à mercede evacuaret. Cùm in publico, subito afficeretur visitatus à Domino. Semper aliquid obiciebat astantibus, ne sponsi familiares attactus forinsec usvulgarentur. Excreationes, gemitus, dueros anhelitus, extrinsecos nutus, orans inter fratres devitabat omnino: sive quia diligebat secretum, sive quia ad interiora reintrans, totus ferebatur in Deum. Sæpe talia familiaribus dixit; Quando servus Dei orans visitatur divinitus, dicere debet; istam consolationem, mihi peccatori & indigno de cælo misisti Domine; & ego illam tuæ commito custodiæ: quia thesauri tui me sentio esse latronem. Cùm autem ab oratione revertitur, sic debet se pauperculum, & peccatorem ostendere, ac si nullam sit novam gratiam consequutus.

Orante autem viro Dei in loco de Portiunculâ, contigit Assisinatem Episcopum venire ad eum, ut erat solitus, visitandum. Qui mox ut locum fuit ingressus, ad cellam, in quâ Christi servus orabat, plus debito fidenter accessit: pulsatoque ostiolo, intraturum se ingerens, dum caput immisit, sanctumque orantem conspexit; repentino timore concussus, obrigescentibus membris, etiam loquelam amisit. Subitoque voluntate divinâ per vim foras propulsus, retrogrado pede, procul abductus est. Stupefactus Episcopus, ad fratres festinavit, ut per-
tuit:

tuit: Deoque sibi restituyente loquelam, primo verbo confessus est culpam.

Contigit tempore quodam, Abbatem monasterii Sancti Justini, de Episcopatu Perusii, obviare famulo Christi. Quo viso, Abbas devotus, celeriter de equo descendit: ut & viro Dei reverentiam faceret, & de salute animæ aliqua cum ipso conferret. Tandem habitâ collatione suavi, Abbas abscedens, orari pro se humiliter petiit. Cui vir Deo carus respondit; Orabo libenter. Parum itaque discedente Abbate, dixit fidelis Franciscus ad socium; Expecta frater modicum: quia debitum volo solvere, quod promisi. Orante autem illo, subito Abbas insolitum calorem, & dulcedinem hætenus inexpertam sensit in spiritu: ita quod in excessu mentis effectus, totus à seipso in Deum defecit. Parva morulâ substitit: & in se reversus, virtutem orationis Sancti Francisci cognovit. Majore proinde circa Ordinem semper amore flagavit; multisque factum pro miraculo retulit.

Solitus erat vir Sanctus horas Canonicas non minus timoratè Deo persolvere, quàm devotè. Nam licet oculorum, stomachi, splenis, & hepatis ægitudine laboraret, nolebat tamen muro vel parieti inhærere dum psalleret: sed horas semper erectus, & sine capitis, non gyrovagis oculis, nec cum aliquâ syncopâ persolvebat. Si quando esset in itinere constitutus, figebat tunc temporis gressum: hujusmodi consuetudinem reverentem & sacram, propter pluviarum inundantiam non omittens. Dicebat enim, si quietè comedit corpus cibum suum; futurum cum ipso vermium esca; cum quantâ pace & tranquillitate accipere debet anima cibum vitæ? Gravi-
ter etiam se putabat offendere, si quando orationi deditus;
vanis

vanis phantasmatibus interiùs vagaretur. Cùm aliquid tale accideret, non parcebat confessioni, quin illud protinus expiaret. Hoc studium sic in usum converterat, ut rarissimè muscas hujusmodi pateretur.

Fecerat in Quadragesimâ quâdam vasculum unum, ut minutias temporis, ne omnino exciderent, occuparet. Quod cùm dicenti Tertiam, in memoriam veniens, paululum ipsius animum distraxisset, motus fervore spiritus, vasculum igne consumpsit, dicens: Sacrificabo illud Domino, cujus sacrificium impedivit. Psalmos cum tantâ mentis & spiritûs attentione dicebat, quasi Deum præsentem haberet: & cum nomen Domini in eis occurreret, præ suavitatis dulcedine, labia sua lingere videbatur. Ipsum quoque Domini nomen, non solum cogitatum, verum etiam prolatum & scriptum, reverentiâ volens honorare præcipuâ: fratribus persuasit aliquando, ut omnes schedulas scriptas ubicunque repertas, colligerent, mundoque loco reponerent; ne fortè sacrum illud nomen ibi scriptum, contingeret conculcari. Nomen autem Jesu cùm exprimeret vel audiret, jubilo quodam repletus interiùs, totus videbatur exteriùs alterari: ac si mellifluus sapor gustum, vel harmonicus sonus ipsius immutasset auditum.

Contigit autem anno tertio ante obitum suum, ut memoriam nativitatis Pueri Jesu, ad devotionem excitandam, apud castrum Græcii disponderet agere, cum quanto majori solemnitate valeret. Ne verò hoc levitati posset adscribi; à summo Pontifice petita & obtenta licentiâ, fecit præparari præsepium, apportari fœnum, bovem, & asinum ad locum adduci. Advocantur fratres, adveniunt populi, personat silva voces: & venerabilis illa

illa non luminibus copiosis & claris, laudibusque sonoris, & consonis, & splendens efficitur, & sollemnis. Stabat Vir Dei coram præsepio pietate repletus, resperfus lacrymis, & gaudio superfusus. Celebrantur Missarum sollemnia super præsepe, Levitâ Christi Francisco sacrum Evangelium decantante. Prædicat deinde populo circumstante de nativitate Regis pauperis: quem cum nominare vellet, puerum de Bethleem, præ amoris teneritudine nuncupabat. Miles autem quidam virtuosus & verax; qui propter Christi amorem sæculari relictâ militiâ, Viro Dei magnâ fuit familiaritate conjunctus, dominus Joannes de Græcio, se vidisse asseruit, puerulum quendam valde formosum in illo præsepio dormientem: quem B. Pater Franciscus ambobus complexans brachiis, excitare videbatur à somno. Hanc siquidem devoti militis visionem, non solum videntis sanctitas credibilem facit; sed & designata veritas comprobatur, & miracula subsequuta confirmant. Nam exemplum Francisci consideratum à mundo, excitativum est cordium, in fide Christi torpentium; & scænum præsepîi reservatum à populo, mirabiliter sanativum fuit brutorum languentium, & aliarum repulsivum pestium diversarum; glorificante Deo per omnia servum suum, sanctæque orationis efficaciam evidentibus miraculorum prodigiis demonstrante.





*De intelligentiâ Scripturarum, &
Spiritu Prophetiæ.*

C A P U T XI.



D tantam autem mentis serenitatem, indefessum orationis studium, cum continuâ exercitatione virtutum², Virum Dei perduxerat; ut quamvis non habuerit Sacrarum litterarum peritiam per doctrinam, æternæ tamen lucis irradiatus fulgoribus, Scripturarum profunda miro intellectus scrutaretur acumine. Penetrabat enim ab omni labe purum ingenium, mysteriorum abscondita, & ubi magistralis scientia foris stat, affectus introibat amantis. Legebat quandoque in libris sacris; & quod animo semel injecerat, tenaciter imprimebat memoriæ: quia non frustra mentalis attentionis percipiebat auditu, quod continuæ devotionis ruminabat affectu. Quærentibus aliquando fratribus, utrum sibi placeret, quod litterati jam recepti ad Ordinem intenderent studio sacre Scripturæ, respondit: Mihi quidem place-

placeret : dum tamen exemplo Christi, qui magis orasse legitur quàm legisse, orationis studium non omittant, nec tantùm studeant, ut sciant qualiter debeant loqui : sed ut audita faciant, & cum fecerint, aliis faciendam proponant. Volo, inquit, fratres meos discipulos Evangelicos esse, sicque in notitiâ veritatis proficere, quodd in simplicitatis puritate concrecant : ut simplicitatem columbinam à prudentiâ serpentinâ non separent, quas magister eximius ore suo benedictio conjunxit.

Interrogatus Senis à quodam religioso Viro, Theologiæ sacræ Doctore, de quibusdam quæstionibus difficilibus intellectu : tantâ claritate doctrinæ, divinæ sapientiæ patefaciebat arcana, ut vehementer stupeffet Vir ille peritus, & cum admiratione referret ; Verè Theologia sancti Patris istius, puritate & contemplatione, tanquam alis in altum subvecta, est aquila volans : nostra verò scientia ventre graditur super terram. Licet enim esset imperitus sermone, scientiâ tamen plenus enodabat dubia quæstionum & abscondita producebat in lucem. Nec absponum, si Vir sanctus Scripturarum à Deo intellectum acceperat : cùm per imitationem Christi perfectam, veritatem ipsarum descriptam gestaret in opere : & per Sancti Spiritus unctionem plenariam, doctorem earum apud se haberet in corde.

Aded etiam in ipso claruit spiritus Prophetiæ, ut & prævideret futura, & cordium contueretur occulta : absentia quoque velut præsentia cerneret, & se præsentem absentibus mirabiliter exhiberet. Tempore namque, quo Damiatam Christianorum obsidebat exercitus, aderat vir Dei non armis, sed fide munitus. Cùm igitur die belli, Christiani pararentur ad pugnam, hoc audito Christi ser-

vus vehementer ingemuit : dixitque socio suo : Si belli fuerit attentatus congressus ; ostendit mihi Dominus non prosperè cedere Christianis . Verùm si hoc dixerò , fatuus reputabor : si tacuero , conscientiam non evadam . Quid igitur tibi videtur ? Respondit socius ejus dicens ; Frater pro minimo tibi sit , ut ab hominibus judiceris : quia non modò incipis fatuus reputari . Exonerà conscientiam tuam : & Deum magis time , quàm homines . Quo audito , exiliens Christi præco , salutaribus monitis Christianos aggreditur : prohibet bellum , denunciât casum . Fit veritas in fabulam : induraverunt cor suum , & noluerunt reverti . Igitur committitur , & bellatur , totaque in fugam vertitur militia Christiana ; finem belli opprobrium regerens , non triumphum . Tantâ verò strage Christianorum imminutus est numerus , ut circa sex millia fuerint inter mortuos & captivos . In quo evidenter innotuit , quòd spernenda non erat sapientia pauperis : cùm *anima viri justî , enunciet aliquando vera , quàm septem circumspectores , sedentes in excelsò ad speculandum .*

Alio quoque tempore , cùm post reversionem ipsius de ultra mare , Celanum prædicaturus accederet : miles quidam , supplici cum devotione , cum instantiâ magnâ , invitavit ad prandium . Venit itaque ad militis domum : omnisque familia , pauperum hospitem exultavit ingressu . Antè verò quàm cibum fumerent , juxta solitum morem , vir mente devotus , offerens Deo preces & laudes , oculis stabat elevatis in cælum . Oratione completâ , benignum hospitem familiariter advocatum in partem , sic allocutus est : Ecce frater hospes , tuis victus precibus , ut manducarem , domum tuam intravi . Meis nunc citò monitis acquiesce : quoniam non hîc , sed alibi manducabis .

bis . Confitere nunc peccata tua, veræ pœnitentiæ dolore contritus : nec in te remaneat quicquam quod veridicâ confessione non pandas . Reddet tibi Dominus hodie vicem : quoniam tantâ devotione suos pauperes suscepisti . Acquievit continuò vir ille sermonibus sancti : socioque ipsius universa peccata in confessione detegens, disposuit domum suam ; & ad mortem suscipiendam se quantum valuit, præparavit . Intraverunt tandem ad mensam : & incipientibus alijs manducare, hospes subitò spiritum exhalavit, juxta verbum hominis Dei, repentinâ morte sublatus . Sicque factum est, hospitalitatis gratiâ promerente, ut (juxta verbum veritatis) *Prophetam recipiens, mercedem Prophetæ acciperet* : dum per sancti viri prænunciationem propheticam, miles ille devotus, sibi contra mortis subitationem providit ; quatenus armis pœnitentiæ præmunitus, perpetuam damnationem evaderet, & in æterna tabernacula introiret .

Tempore quo vir sanctus Reate jacebat infirmus ; Præbendarius quidam nomine Gedeon, lubricus & mundanus, infirmitate gravi correptus, lectulo decubans ; cum ad eum fuisset delatus, lacrymosè rogabat cum simul æstantibus, ut ab ipso Crucis signaculo signaretur . Ad quem ille ; Cùm vixeris olim secundùm desideria carnis, non veritus judicia Dei : quomodo te Cruce signabo ? Verùm propter devotas intercedentium preces, signo te Crucis signabo in nomine Domini . Tu tamen scito, te graviora passurum, si ad vomitum redieris liberatus : propter peccatum enim ingritudinis, semper pejora prioribus inferuntur . Signo itaque Crucis super eum facto, statim qui contractus jacuerat, surrexit sanus : & in laudem Dei prorumpens : Ego, inquit, sum liberatus .

Info-

Insonuerunt autem ossa renum ejus, audientibus cunctis : veluti cum manu ligna sicca franguntur . Paucis autem interlapsis temporibus, Dei oblitus, corpus impudicitiae reddidit . Cumque serò quodam cœnasset in domo cujusdam Canonici ; nocteque illa dormiret ibidem : subito super omnes corruit tectum domus . Ceteris autem evadentibus mortem, solus ille miser interceptus atque interemptus est . Justo igitur Dei judicio, *facta sunt novissima hominis illius pejora prioribus*, propter ingratitude vitium, Deique contemptum : cum de acceptâ veniâ gratum esse oporteat, & duplo displiceat flagitium iteratum .

Alio quoque tempore, mulier quædam nobilis, Deo devota, venit ad Sanctum, ut suum ei explicaret dolo-rem, ac remedium postularet . Habebat quidem virum valde crudelem, quem adversarium patiebatur in servitio Christi . Et ideo petebat à Sancto, quatenus oraret pro illo, ut suâ Deus cor ipsius dignaretur emollire clementiâ . Ipse verò hoc audiens ait illi : Vade cum pace, indubitanter expectans de viro tuo consolationem tibi de proximo adfuturam . Et adjecit ; Dices ei ex parte Dei & meâ, quòd nunc est tempus clementiæ, postmodum æquitatis . Benedictione acceptâ revertitur mulier : invenit virum, denunciât verbum . Cecidit super eum Spiritus sanctus : & novum factum de veteri, sic facit cum mansuetudine respondere : Domina, serviamus Domino, & salvemus animas nostras . Suadente igitur sanctâ uxore, pluribus annis cælibem vitam agentes, eodem die ambo ad Dominum migraverunt . Miranda certè in viro Dei spiritus Prophetici virtus, quâ & membris jam aren-
tibus restituebat vigorem, & duris imprimebat cordibus
pie-

pietatem . Quanquam non minùs ejusdem spiritus sit stupenda limpides , quâ sic futurorum præcognoscebat eventum , ut etiam conscientiarum scrutaretur arcana , quasi alter Elifæus duplicem Eliæ spiritum assequutus .

Nam cùm Senis, viro cuidam sibi familiari quædam superventura finaliter prædixisset ; & vir ille peritus , (de quo suprà mentio facta est quòd de Scripturis cum eo conferebat aliquando) his auditis, ab eodem sancto Patre dubitando perquireret , an hæc ipse dixisset , quæ illius viri relatione cognoverat : non solum se illa dixisse asseruit , verùm etiam quærenti alienum eventum , proprium exitum prophetando prædixit . Quod ut certiùs cordi ejus imprimeret , quendam secretum conscientiæ illius scrupulum , quem nulli viventi vir præfatus expresserat , & mirabiliter revelando explicuit , & salubriter consulendo referavit . Ad quorum omnium firmitatem accidit , quòd vir ille religiosus , sicut Christi famulus ei prædixit , sic finaliter consumavit .

Eo quoque tempore , quo revertebatur de ultra mare , socium habens Fratrem Leonardum de Assisio , contigit eum fatigatum & lassum parumper asellum conscendere . Subsequens autem socius , & ipse non modicum fessus , cœpit dicere intra se , humanum aliquid passus ; Non de pari ludebant parentes ejus , & mei . En ipse equitat , & ego pedester asinum ejus duco . Hæc illo cogitante , protinus descendit de asino vir sanctus , & ait : Non , frater , convenit , ut ego equitem , tu venias pedes : quia nobilior & potentior in sæculo tu me fuisti . Obstupuit illic frater , & rubore suffusus , deprehensum se recognoscens , procidit ad pedes ipsius : & lacrymis irrigatus , nudum

nudum exposuit cogitatum , veniamque poposcit :

Frater quidam Deo devotus & famulo Christi , frequenti cogitatione versabat in pectore , supernâ fore gratiâ dignum , quem Vir sanctus familiari complecteretur affectu : quem verò tanquam extraneum reputaret , extra numerum electorum reputandum à Deo . Cùm igitur cogitationis hujus crebriùs vexatus impulsu , Viri Dei familiaritatem vehementer optaret ; nec tamen cordis sui secretum revelaret alicui : advocans eum ad se , dulciter Pater pius sic alloquutus est ; Nulla te turbet cogitatio , fili : quoniam te carissimum habens inter præcipuè mihi caros , libenter tibi munus meæ familiaritatis , & dilectionis impendo . Miratus exinde frater , factusque devotior ex devoto , non solum in amore crevit hominis sancti ; verùm etiam per Spiritus sancti gratiæ munus , donis est majoribus cumulatus .

Cùm autem in monte maneret Alvernæ cellâ reclusus , unus è sociis magno desiderio cupiebat habere de verbis Domini aliquod scriptum , manu ipsius breviter annotatum . Gravem enim , quâ vexabatur , tentationem , non carnis sed spiritus , ex hoc credebatur evadere , vel certè leviùs ferre . Tali desiderio languens anxiabatur interiùs : quia verecundiâ victus , reverendo Patri rem pandere non audebat . Sed cui homo non dixit , spiritus revelavit . Portari namque sibi jussit à fratre prædicto atramentum , & chartam : laudesque Domini juxta fratris desiderium propriâ manu scripsit & ultimò benedictionem ipsius , dicens ; Accipe tibi chartulam istam , & usque ad diem mortis tuæ custodias diligenter . Accepit frater donum illud optatum : & statim omnis illa tentatio effugatur . Servatur littera : & cùm in posterum miranda effecerit , virtutum Francisci testimonium fuit . Fra-

Frater quidam erat, quantum à foris videbatur, sanctitate præclarus, conversatione insignis: tamen admodum singularis, Omni tempore orationi vacans, tantâ districtione silentium observabat, quòd consueverat non verbis sed nutibus confiteri. Accidit autem sanctum Patrem venire ad locum, videre fratrem; & de ipso cum aliis fratribus habere sermonem. Commendantibus autem omnibus, & magnificentibus illum, respondit vir Dei: Sinite fratres, ne mihi in eo diabolica figmenta laudetis: In veritate sciatis, quòd diabolica tentatio est, & deceptio fraudulenta. Durè acceperunt hoc fratres, tanquam impossibile judicantes: quòd tot perfectionis indiciiis, fraudis se commenta fucarent. Verum non post multos dies, eo Religionem egresso, evidenter apparuit, quanta luculentia interioris contuitus, vir Dei, cordis ejus secreta perspexit. Multorum quoque per hunc modum, qui itare videbantur, ruinam; sed & plurium perversorum conversionem ad Christum, immobili veritate prænuncians, appropinquasse videbatur ad æternæ lucis speculum contemplandum: cujus fulgore mirabili, absentia corporaliter, tanquam si essent præsentia, mentis ejus cernebat obtutus.

Quodam namque tempore, Vicarius suus tenebat capitulum: ipse verò in cellâ orans, sequester erat, & medijs inter fratres & Deum. Cùm igitur unus ex ipsis, defensionis quodam contactus palliolo, non se subderet disciplina: videns hoc vir sanctus in spiritu, vocavit quendam de fratribus, & dixit ad eum: Vidi, frater, diabolum super illius fratris inobedientis dorsum, collum ejus tenentem astrictum: qui tali sessore subactus, obedientiæ freno spreto, instrictus ejus sequebatur habenas. Et cùm

O

roga-

rogarem Deum pro fratre, subito dæmon confusus abscessit. Vade igitur, & dic fratri, ut Obedientiæ sanctæ jugo collum sine mora submittat; monitus per internuntium frater, statimque conversus ad Deum, ad pedes Vicarii humiliter se projecit.

Alio quoque tempore contigit, duos fratres ad eremitorium Græcii de remotis venire, ut virum Dei cerneant, & benedictionem, multo desideratam jam tempore, reportarent. Venientes autem & non inveniētes, quia de publico jam ad cellam redierat, desolati abibant. Et ecce recedentibus illis, cum de ipsorum adventu vel recessu, nihil secundum humanum sensum percipere potuisset; præter solitum morem egressus è cellâ, clamavit post eos: & ipsos juxta quod optaverant, signo crucis factio, in Christi nomine benedixit.

Duo fratres venerunt aliquando de terrâ Laboris; quorum antiquior nonnulla intulit scandala juniore. Cum autem pervenissent ad Patrem, quæsit ille à juniore, qualiter erga ipsum, se frater socius habuisset in viâ: quo respondente; Utique satis bene. Subjunxit; Cave frater, ne sub humilitatis specie mentiaris: scio enim, scio, sed exspecta modicum & videbis. Miratus est per plurimum frater, quomodo tam absentia per spiritum cognovisset. Igitur non post multos dies, contemptâ Religione foras egreditur, qui scandalum fecerat fratri, & à Patre non petierat veniam, nec correctionis debitam receperat disciplinam; simulque duo, in unâ illius claruere ruinâ: æquitas scilicet divinæ justitiæ, & perspicacitas spiritûs prophetiæ. Qualiter autem absentibus se præsentem exhibuit, divinâ faciente virtute, evidenter ex superioribus innotebat: si revocetur ad mentem, qualiter absens in

curru

curru igneo fratribus transfiguratus apparuit ; & quomodo se Arelatensi Capitulo in crucis effigie præsentavit ; quod factum esse divinâ dispositione credendum est: ut ex præsentia corporalis apparitione mirabili patenter claresceret, quàm præsens & pervius spiritus ejus, luci sapientiæ foret æternæ, quæ *omnibus mobilibus mobilior est, & ubique attingens propter sui munditiam, per nationes in animas sanctas se transfert, & Dei amicos & Prophetas constituit*. Simplicibus enim & parvulis sua solet pandere myſteria Doctor excelsus : sicut priùs apparuit in David Prophetarum eximio, & post in Apostolorum principe Petro ; & tandem in pauperculo Christi Francisco. Hi enim cùm essent litterarum imperitiâ simplices, facti sunt sancti Spiritus eruditione illustres. Is quidem pastor : ut gregem pasceret Synagogæ de Ægypto eductum ; iste piscator : ut sagenam repletet Ecclesiæ multiformitate credentium ; hic autem negotiator : ut margaritam emeret Evangelicæ vitæ, venditis, & dispersis omnibus propter Christum.





*De efficaciâ prædicandi; & gratiâ
sanitatum.*

C A P U T XII.



FIDELIS re verâ famulus & minister Christi Franciscus, ut cuncta fideliter & perfectè perageret, illis potissimè virtutum exercitiis intendebat, quæ sacro dictante Spiritu, Deo suo magis placere cognoverat. Quâ de re contigit, illum in magnam dubitationis cujusdam agoniam incidere: quam multis diebus, ab oratione rediens, terminandam fratribus sibi familiaribus proponebat. Quid, inquit, fratres, consulitis, quid laudatis; An quòd orationi vacem, an quòd prædicando discurram? Siquidem ego parvulus, simplex, & imperitus sermone, majorem orandi accepi gratiam, quàm loquendi. Videtur etiam in oratione lucrum, & cumulatio gratiarum: in prædicatione distributio quædam donorum, cælitus acceptorum; in oratione etiam purificatio interiorum affectuum, & unio ad unum verum & summum Bonum,

Bonum, cum vigoratione virtutis: in prædicatione spiritualium pulverisatio pedum, distractio circa multa, & relaxatio disciplinæ. Tandem, in oratione Deum alloquimur, & audimus; & quasi Angelicam vitam agentes, inter Angelos converſamur: in prædicatione, multâ oportet condeſcensione uti ad homines; & humanè inter eos vivendo, humana cogitare, videre, dicere, & audire. Sed unum est in contrarium, quod videtur proponere his omnibus ante Deum: quòd videlicet unigenitus Dei filius, qui est Sapiencia summa, propter animarum salutem de sinu Patris descendit, ut suo mundum informans exemplo, verbum salutis hominibus loqueretur, quos sacri sanguinis & pretio redimeret, & emundaret lavacro, & poculo sustentaret; nihil sibi omnino reservans, quod non in salutem nostram liberaliter erogaret. Et quia debemus omnia facere secundum exemplar eorum quæ videmus in ipso, tanquam in monte sublimi; videtur magis Deo placitum, quod intermissâ quiete, foras egrediar ad laborem. Cumque per multos dies, verba hujusmodi ruminaret cum fratribus: certitudinaliter nequibat percipere, quid horum sibi foret, ut Christo verè acceptius, eligendum. Cùm enim miranda nosset per spiritum prophetiæ, hanc per seipsum quæstionem dissolvere non valebat ad liquidum: Deo meliùs providente, ut prædicationis meritum, per supernum manifestaretur oraculum, & servi Christi humilitas servaretur. Non erubescere à minoribus parva querere verus minor, qui magna didicerat à magistro supremo. Studio namque præcipuo solitus erat exquirere, quali viâ, qualique modo, Deo posset secundum ipsius beneplacitum perfectiùs deservire. Hæc summa ejus philosophia,

phia, hoc summum ejus desiderium exstitit, quoad vixit: ut quæreret à sapientibus & simplicibus, perfectis & imperfectis, parvulis & grandævis, qualiter ad perfectionis culmen virtuosius pervenire valeret.

Assumens itaque duos ex fratribus, misit ad fratrem Silvestrum, qui crucem egredientem viderat de ore ipsius; & tunc in monte supra Assisium, jugiter orationi vacabat: ut divinum super dubitatione hujusmodi responsum perquireret, quod sibi ex parte Domini demandaret. Hoc ipsum demandavit sacræ virgini Claræ, ut per aliquam puriorem & simpliciorum de virginibus sub ipsius disciplinâ degentibus, & ipsa cum sororibus aliis orans, super hoc exquireret Domini voluntatem. Concordaverunt autem mirabiliter in idipsum, superno eis revelante Spiritu, venerabilis Sacerdos, & Virgo Deo dicata: beneplaciti scilicet esse divini, quod Christi præco ad prædicandum exiret. Revertentibus itaque fratribus, & Dei, juxta quod acceperant, indicantibus voluntatem; exsurgens continuo succinxit se, nullâ prorsus contractâ morâ, iter aggressus est. Ibat autem cum tanto fervore, ut divinum exsequeretur imperium, tamque celeriter percurreret, ac si factâ manu Dei super eum, novam induisset à cælo virtutem.

Cùm igitur appropinquaret Bevanio; ad quendam locum devenit, in quo diversi generis avium maxima multitudo convenerat: Quas cùm sanctus Dei vidisset, alacriter cucurrit ad locum, & eas velut rationis participes salutavit. Omnibus verò expectantibus, & convertentibus se ad eum; ita, ut quæ in arbustis erant, inclinatis capitibus, cum appropinquaret ad eas, insolito modo in ipsum intenderent; usque ad eas accessit & omnes

nes

nes ut verbum Dei audirent, sollicitè admonuit dicens : Fratres mei volucres, multum debetis laudare Creatorem vestrum, qui plumis vos induit, & pennas tribuit ad volandum; puritatem concessit aëris, & sine vestrâ sollicitudine vos gubernat. Cùm autem eis hæc & his similia loqueretur: aviculæ modo mirabili gestientes, cœperunt extendere colla, protendere alas, aperire rostra, & in illum attentè respicere. Ipse verò cum spiritûs fervore mirando per medium ipsarum transiens, tunicâ contingebat easdem: nec tamen de loco aliqua mota est, donec signo crucis factò, & licentiâ datâ, cum benedictione viri Dei, omnes simul avolarunt. Hæc omnia contuebantur socii expectantes in viâ. Ad quos reversus vir simplex & purus, pro eo quòd hæctenus avibus non prædicaverat, cœpit se de negligentia inculpare.

Exinde, prædicando per loca vicina procedens; venit ad castrum quoddam nomine Alvianum: ubi congregato populo, & indicto silentio, propter hirundines nidificantes in eodem loco, magnisque garribus perstreptentes, audiri vix poterat. Quas vir Dei, omnibus audientibus, alloquutus est, dicens: Sorores meæ Hirundines, jam tempus est, ut loquar & ego: quia vos usque modò satis dixistis. Audite verbum Dei, tenentes silentium, donec sermo Dei compleatur. At illæ tanquam intellectûs capaces, subito tacuerunt: nec fuerunt motæ de loco, donec fuit omnis prædicatio consummata. Omnes igitur qui viderunt, stupore repleti glorificaverunt Deum. Istius miraculi fama circumquaque diffusa, multos ad sancti reverentiam, & fidei devotionem accendit.

In civitate namque Parisiensi, scholaris quidam indolis

domis bonæ; cum sociis aliis studio diligenter intentus; dum importunâ garrulitate cujusdam infestaretur hirundinis, dicere cœpit ad socios; Hæc hirundo una de illis est, quæ virum Dei Franciscum prædicantem aliquando, donec silentium eis imponeret, molestabant. Et conversus ad hirundinem fiducialiter ait; in nomine servi Dei Francisci præcipio tibi, ut ad me veniens continuò conticescas. At illa Francisci audito nomine, quasi viri Dei disciplinis edocta, & statim conticuit, & ipsius manibus, tanquam tutæ custodiæ se commisit. Stupefactus scholaris statim eam libertati restituit, & ejus garritum amplius non audivit.

Alio quoque tempore cùm famulus Dei Cajetæ prædicaret in littore maris, turbis præ devotione ruentibus, ut eum contingerent, horrens Christi servus tantum populorum applausum, in unam hærentem littori naviculam profilivit solus. Illa verò, tanquam si rationis particeps, motore moveretur intrinseco, sine aliquo remige, cernentibus & mirantibus cunctis, se longius à terrâ protraxit. Cùm autem aliquanto spatio, in maris altitudinem secessisset; stetit inter fluctus immobilis, quamdiu vir sanctus turbis expectantibus in littore, prædicavit. Cumque audito sermone, & viso miraculo, ac benedictione acceptâ, multitudo recederet, ne ipsum amplius molestaret: navicula proprio ductu ad terram reversa est. Quis igitur tam obstinatæ mentis esset, & impiæ, ut prædicationem Francisci contemneret: cujus mirandâ fiebat virtute, ut non solum carentia ratione disciplinam suscipere, verum etiam inanimata corpora, tanquam animata prædicanti servirent?

Aderat equidem servo suo Francisco, ad quæcunque

que

que pergeret; is qui eum unxerat, & miserat spiritus Domini, & ipse Dei virtus, & sapientia Christus: ut sanæ doctrinæ verbis afflueret, & magnæ potentiae miraculis coruscaret. Erat enim verbum ejus velut ignis ardens, penetrans intima cordis, omniumque mentes admiratione replebat: cum non humanæ inventionis ornatum prætenderet, sed divinæ revelationis afflatum redoleret. Nam cum semel prædicaturus coram Papâ & Cardinalibus, ad suggestionem Domini Hostiensis, sermonem quendam studiosè compositum commendasset memoriæ; stetitque in medio, ut ædificationis verba proponeret; sic oblivioni tradidit omnia, ut effari aliquid omnino nesciret. Verùm cum hoc veridicâ humilitate narrasset, conferens se ad Spiritûs sancti gratiam invocandam; tam efficacibus subito cœpit verbis affluere, tamque potenti virtute illorum mentes virorum sublimium, ad compunctionem inflectere; ut apertè clareret, quod non ipse, sed Spiritus Domini loquebatur. Et quoniam primò sibi suaferat opere, quod aliis suadebat sermone: reprehensorem non timens, veritatem fidentissimè prædicabat. Nesciebat aliquorum culpas palpare, sed pun gere: nec vitam fovere peccantium, sed asperâ increpatione ferire. Eâdem mentis constantiâ magnis loquebatur & parvis: eademque spiritûs jucunditate paucis loquebatur & multis. Omnis ætas, omnisque sexus properabat virum novum, mundo cælitus datum & cernere, & audire. Ipse verò per diversas regiones progrediens, evangelizabat ardentè: *Domino cooperante, & sermone confirmante, sequentibus signis*. In virtute namque nominis ejus, veritatis præco Franciscus ejiciebat dæmonia, sanabat infirmos: & quod majus est, sui

sermonis efficaciam, obstinatorum mentes ad poenitentiam mollebat, simulque sanitatem corporibus reddebat, & cordibus; sicut aliqua comprobant operum ejus, exempli gratiam, inferius adnotanda.

In civitate Tuscanellâ, à milite quodam hospitio devotè susceptus, filium ejus unicum à nativitate contractum, ad multam ipsius instantiam, manu allevans, sic subitò incolumem reddidit; ut videntibus cunctis, protinus consolidarentur omnia corporis membra, & puer sanus & fortis effectus, confestim exurgeret ambulans, & exsiliens, & laudans Deum.

In civitate Narniensi, cum paralyticum quendam membrorum omnium destitutum officio, signo crucis à capite usque ad pedes, ad instantiam signasset Episcopi, perfectæ restituit sanitati.

In Episcopatu Reatino, puer quidam sic turgidus à quatuor annis, ut nullo modo propria crura cernere posset, à matre cum lacrymis præsentatus eidem: statim, ut vir sanctus tetigit eum manibus sacris, incolumis est effectus.

Apud civitatem Ortensem, puer unus ita conglomeratus, ut caput pedibus portaret applicitum, & haberet ossa nonnulla confRACTA, signo crucis ad parentum lacrymabiles preces ab eodem suscepto, subitò extensus extitit, & illicò liberatus.

Mulier quædam civitatis Eugubii, ambas contractas & aridas habens manus, adeò ut nihil per illas operari valeret; signo crucis ab eodem in nomine Domini sibi factò, tam perfectam obtinuit sospitatem, quòd statim rediens domum, cibos in ministerium ejus & pauperum, quasi altera focrus Simonis, propriis manibus præpararet.

Puel-

Puellæ cuidam, in castro Mevanii, oculorum, privatæ luminibus, cùm in Trinitatis nomine, sputo suo ter ipsius oculos linivisset, lumen concupitum restituit.

Mulier quædam civitatis Narnii, oculorum cæcitæ percussa, signum crucis ab eodem suscipiens, lucem recuperavit optatam.

Bononiæ, puer quidam unum oculorum maculâ adeò habens obtectum, ut nihil prorsus videre posset, nec aliquo juvari remedio; post signum crucis, à capite usque ad pedes per servum Domini sibi factum, visum recuperavit tam limpidum, ut postmodum fratrum Minorum Ordinem ingressus, se longè clariùs videre assereret de oculo priùs infirmo, quam de oculo semper sano.

In castro sancti Geminiani, servus Dei à quodam devoto viro susceptus hospitio, cujus uxor à dæmonio vexabatur; post orationem factam, in virtute obedientiæ imperavit dæmoni ut exiret: eumque potestate divinâ tam subito effugavit, ut verè claresceret, quòd obedientiæ sanctæ virtuti pervicacia dæmonum non obstat.

In civitate de Castello, quidam furibundus & nequam spiritus quandam obsidens mulierem, à viro sancto, Obedientiæ accepto mandato, indignabundus discessit: mente simul & corpore liberam, obsessam priùs sceminam derelinquens.

Frater quidam infirmitate tam horribili gravabatur, ut magis esse vexatio dæmonis, quàm naturalis infirmitas à pluribus firmaretur. Nam totus sæpe allidebatur, & volutabatur spumans: membris corporis nunc

contractis, nunc extensis, nunc plicatis, nunc tortis, nunc rigidis effectis, & duris. Quandoque totus extensus, & rigidus, pedibus æquatis capiti, levabatur in altum, horribiliter illicò relapsurus. Hunc sic miserabiliter, & irremediabiliter ægotantem, plenus misericordiâ Christi servus commiserans, buccellam sibi panis, de quo edebat, transmisit. Tantam verò gustatus panis contulit ægro virtutem, ut deinceps hujus infirmitatis molestiam non sentiret.

In comitatu Aretii, cùm diebus pluribus, mulier quædam laborasset in partu, essetque jam proxima morti, nullum omnino desperanti de vitâ supererat remedium, nisi Dei. Cùm autem equo vectus; propter corporis infirmitatem, Christi famulus, per partes illas transitum habuisset: contigit reduci animal per villam, in quâ mulier torquebatur. Homines verò loci, viso equo, cui vir sanctus infederat, extraxerunt frenum, ut superponerent mulieri. Ad cujus contactum mirificum, omni remoto periculo, mulier illicò peperit cum salute.

Vir quidam de Castro Plebis, religiosus ac timens Deum, chordam apud se, quâ cinctus fuerat sanctus Pater, habebat. Cumque multitudo virorum ac mulierum, in castro illo, variis infirmitatibus laboraret; ibat per infirmantium domos, & intinctâ chordâ in aquâ, dabat bibere patientibus: sicque per hunc modum plurimi sanabantur. Sed & de panibus à viro Dei contactis gustantes ægroti, divinâ operante virtute, consequebantur celeriter remedia sanitatum. Cùm his & aliis multis miraculorum prodigiis, præco Christi coruscaret: attendebatur his quæ dicebantur ab eo, ac si Angelus Domini loqueretur. Excellens namque in ipso prærogativa virtutum, propheticæ

tiæ spiritus , efficacia miraculorum , oraculum de prædicando cælitus datum , obedientia creaturarum ratione carentium , vehemens immutatio cordium ad verborum , ipsius auditum , eruditio ejus à Spiritu sancto præter humanam doctrinam , prædicandi auctoritas à summo Pontifice non sine revelatione concessa : insuper & Regula , in quâ forma prædicandi exprimitur , ab eodem Christi Vicario confirmata : summi quoque Regis signacula , per modum sigilli corpori ejus impressa : tanquam testimonia decem , toti sæculo indubitanter affirmant , Christi præconem Franciscum & venerandum officio , & doctrinâ authenticum , & admirabilem sanctitatem : ac per hoc tanquam verè Dei nuntium , Christi Evangelium prædicasse .



De



De Stigmatibus sacris.

C A P U T XIII.



Os erat Angelico viro Francisco nunquam otiosi à bono: quin potiùs instar supernorum spirituum in scalâ Jacob, aut ascendeat in Deum, aut descendeat ad proximum. Nam tempus sibi concessum ad meritum, dividere sic prudenter didicerat, ut aliud proximorum lucris laboriosis impenderet, aliud contemplationis tranquillis excessibus dedicaret. Unde cùm secundum exigentiam locorum & temporum, alienæ condescendisset procurandæ salutis, inquietationibus derelictis turbarum, solitudinis secreta petebat, locumque quietis: quò liberius Deo vacans, extingeret, si quid pulveris sibi ex conversatione hominum adhæsisset. Biennio itaque antequam spiritum redderet cælo, divinâ providentiâ duce, post labores multimodos, perductus est in locum excelsum, seorsum, qui dicitur mons Alvernæ. Cùm igitur juxta solitum morem, Quadragesimam ibidem ad honorem

S. Ar-

S. Archangeli Michaelis jejunare cœpisset ; supernæ contemplationis dulcedine abundantius solito superflusus , ac cœlestium desideriorum ardentiori flammâ succensus , supernarum cœpit immissionum cumulatiùs dona sentire . Ferebatur quidem in altum , non ut curiosus Majestatis percrutator opprimendus à gloriâ , sed tamquam servus fidelis & prudens , investigans beneplacitum Dei , cui se conformare omnimodè , summo peroptabat ardore . Immissum est igitur menti ejus , per divinum oraculum , quòd in apertione libri Evangelici revelaretur ei à Christo , quod Deo in ipso , & de ipso maximè foret acceptum . Oratione itaque cum multâ devotione præmissâ , sacrum Evangeliorum librum de altari sumptum , in sanctæ Trinitatis nomine aperiri fecit per socium , virum utique Deo devotum & sanctum . Sanè cùm in trinâ libri apertione , semper Domini passio occurreret : intellexit vir Deo plenus , quod sicut Christum fuerat imitatus in actibus vitæ , sic conformis ei esse deberet in afflictionibus & doloribus passionis , antequam ex hoc mundo transiret . Et licet propter multam austeritatem vitæ præteritæ , Crucisque Dominicæ bajulationem continuam , imbecillis jam esset corpore , nequaquam est territus : sed ad martyrii sustinentiam vigorosiùs animatus . Excreverat quidem in eo insuperabile amoris incendium boni Jesu , in lampades ignis atque flammarum : ut aquæ multæ charitatem ejus tam validam extinguere non valerent .

Cùm igitur Seraphicis desideriorum ardoribus sursum ageretur in Deum ; & compassivâ dulcedine in eum transformaretur , qui ex charitate nimiam voluit crucifigi : quodam mane circa festum Exaltationis sanctæ Crucis , dum oraret in latere montis : vidit Seraph unum , sex alas habentem-

habentem tam ignitas quàm splendoras ; de cœlorum sublimitate descendere . Cumque volatu celerrimo pervenisset ad aëris locum viro Dei propinquum : apparuit inter alas effigies hominis crucifixi , in modum crucis manus & pedes extensos habentis , & cruci affixos . Duæ alæ super caput ipsius elevabantur , duæ ad volandum extendebantur , duæ verò totum velabant corpus . Hoc videns , vehementer obstupuit : mixtumque mærore gaudium cor ejus incurrit . Lætabatur quidem in gratioso aspectu , quo à Christo sub specie Seraph cernebat se conspici : sed crucis affixio compassivi doloris gladio ipsius animam pertransibat . Admirabatur quamplurimum in tam inscrutabilis visionis aspectu : sciens quòd passionis infirmitas , cum immortalitate spiritûs Seraphici nullatenus conveniret . Intellexit tandem ex hoc , Domino revelante , quòd ideo hujusmodi visio , sic divinâ providentiâ suis fuerat præsentata conspectibus : ut amicus Christi prænosceret , se non per martyrium carnis , sed per incendium mentis , totum in Christi crucifixi similitudinem transformandum .

Disparens igitur visio , mirabilem in corde ipsius reliquit ardorem : sed & in carne non minùs mirabilem signorum impressit effigiem . Statim namque in manibus ejus & pedibus apparere cœperunt signa clavorum : quemadmodum paulo antè , in effigie illa viri crucifixi conspexerat . Manus enim & pedes , in ipso medio , clavis confixæ videbantur : clavorum capitibus in interiori parte manuum , & superiori pedum apparentibus , & eorum acuminibus existentibus ex adverso . Erantque clavorum capita , in manibus & pedibus rotunda & nigra : ipsa verò acumina oblonga , retorta , & quasi reperiussa , quæ de ipsâ

de ipsâ carne surgentia, carnem reliquam excedebant : Dexterum quoque latus, quasi lanceâ transfixum, rubrâ cicatrice obductum erat : quod sæpe sanguinem sacrum effundens, tunicam & femoralia respergebat.

Cernens autem Christi servus, quòd Stigmata carni tam læculenter impressa, socios familiares latere non possent; timens nihilominus publicare Domini Sacramentum; in magno positus fuit dubitationis agone; utrum videlicet quod viderat diceret, vel taceret. Vocavit proinde aliquos ex fratribus; & generalibus verbis loquens, dubium coram eis proposuit, & consilium requisivit. Quidam verò ex fratribus, gratiâ Illuminatus & nomine, intelligens quòd aliqua miranda vidisset; pro eo quod videbatur admodum stupefactus: dixit ad virum sanctum: Frater, non solum propter te, sed etiam propter alios, scias tibi ostendi aliquando Sacramenta divina. Timendum propterea jure videtur, ne, si quod pluribus profuturum accepisti, celaveris, pro talento abscondito reprehensibilis judiceris. Ad cujus verbum motus vir sanctus, licet aliàs dicere solitus esset; *Secretum meum tibi*; tunc tamen cum multo timore, seriem retulit visionis præfatæ: addens quòd is qui sibi apparuerat, aliqua dixerit, quæ nunquam dum viveret alicui hominum aperiret. Credendum sanè, tam arcana illa fuisse sacri illius Seraph, in cruce mirabiliter apparentis eloquia, quòd fortè non liceret hominibus ea loqui.

Postquam igitur verus Christi amor, in eandem imaginem transformavit amantem; quadraginta dierum numero juxta quod decreverat, in solitudine consummato; superveniente quoque solennitate Archangeli Michaelis:

Q

chaelis:

chaelis : descendit Angelicus vir Franciscus de monte ; secum ferens crucifixi effigiem , non in tabulis lapideis vel ligneis , manu figuratam artificis , sed in carneis membris descriptam digito Dei vivi . Et quoniam *Sacramentum Regis abscondere bonum est* : ideo secreti Regalis vir conscius , signacula illa sacra pro viribus occultabat . Verùm quia Dei est , ad gloriam suam magna revelare quæ facit ; Dominus ipse , qui signacula illa secretè impresserat , miracula quædam apertè per ipsa monstravit : ut illorum occulta & mira vis Stigmatum , manifestâ patèret claritate signorum .

In provinciâ namque Reatinâ , pestis invaluerat valde gravis : quæ oves , & boves omnes sic consumebat crudeliter , quòd nullum poterat remedium adhiberi . Vir autem quidam timens Deum , nocte fuit per visionem commonitus , ut ad eremitorium fratrum festinanter accederet : & loturam manum ac pedum famuli Dei Francisci , qui tunc temporis morabatur ibidem , acceptam super animalia cuncta respergeret . Mane itaque surgens venit ad locum : loturâque hujusmodi per socios sancti viri latenter obtentâ , oves & boves languentes ex eâ respersit . Mirabile dictu ! Statim ut aspersio animalia languida , & in terrâ jacentia quantuncunque paululum attingebat , pristino recuperato vigore , surgebant continuò : & tanquam nihil mali sensissent , ad pascua festinabant . Sicque factum est , ut per virtutem mirandam aquæ illius , quæ sacras plagas contigerat , omnis prorsus plaga cessaret , pestilensque morbus à gregibus fugaretur .

Circa præfatum montem Alvernæ , antequam vir sanctus ibi contraheret moram ; nube ex ipso monte surgente , grandinis violenta tempestas , fructus terræ conductu-

fuetudinariè devaftabat : fed poft illam apparitionem felicem , non fine incolarum admiratione , grando ceffavit : ut cœleftis illius vifionis excellentiam , & Stigmatum ibidem imprefforum virtutem , ferenata præter morem ipfâ Cœli facies declararet .

Contigit quoque eum tempore hiemali , propter debilitatem corporis , & afperitatem viarum , hominis unius pauperis subvectum afello , fub rupis cujufdam prominentis pernoctare crepidine ; ut nivis & noctis fuperveniendum , quoquo modo declinaret incommoda , quibus præpeditus ad hofpitii locum non valuerat pervenire . Cùm autem vir fanctus , hominem illum querulofis fubmurmuranti gemitibus , hinc inde feipfum jactare , fenfiffet ; tanquam qui tenui operimento contectus , quiefcere præ frigoris acerbitate nequibat : divini amoris fervore fuccenfus , manu illum protensâ palpavit . Mirabile certè ! Repentè ad illius facræ manûs contactum , quæ Seraphici calculi gerebat incendium , omni fugato frigore , tantus in virum intus & extrâ calor advénit , ac fi quædam in eum vis flammea ex fornacis fpiraculo proceffiffet . Nam illicò & mente & corpore confortatus , fuaviùs inter faxa & nives ufque mane dormivit , quàm unquam in proprio lecto paufaverat : ficut ipfe poftmodum aferebat . Certis itaque conftat indiciis , facra illa fignacula illius impreffa fuiſſe virtute , qui operatione Seraphicâ purgat , illuminat , & inflammat : cùm ipfâ , forinfecus expurgando à peſte , falutem , ferenitatem , & calorem corporibus , efficacîâ mirâ conferrent : ficut & poſt mortem , evidentioribus eſt demonſtratum prodigiis , fuo loco poſteriùs adnotandis .

Ipſe verò , licet theſaurum inventum in agro multâ dili-

diligentiâ studeret abscondere; latere tamen non potuit, quin aliqui Stigmata manuum viderent & pedum: quam manus quasi semper portaret contactas, & pedibus ex tunc incederet calceatis. Viderunt enim, dum viveret, fratres plurimi: qui licet essent propter sanctitatem præcipuam, viri per omnia fide digni: tamen ad omne dubium amovendum, sic esse, ac se vidisse, tactis sacrosanctis, juramento firmârunt. Viderunt etiam ex familiaritate, quam cum viro sancto habebant, aliqui Cardinales; laudes sacrorum Stigmatum prosis, & hymnis, & antiphonis, quas ad ipsius ediderunt honorem, veraciter inferentes: qui tam verbo, quàm scripto perhibuerunt testimonium veritati. Summus etiam Pontifex Dominus Alexander, cum populo prædicaret, coram multis fratribus, & me ipso, affirmavit; se, dum Sanctus viveret, Stigmata illa sacra suis oculis conspexisse. Viderunt in morte plusquam quinquaginta fratres, virgoque Deo devotissima Clara, cum cæteris sororibus suis, & sæculares innumeri: ex quibus, quemadmodum suo loco dicetur, quamplurimi & osculati sunt ex devotionis affectu, & contrectaverunt manibus ad testimonii firmitatem.

Vulnus autem lateris tam sollicitè occultavit, ut illud nemo posset nisi furtim contueri, dum viveret. Unus etenim frater qui ei sedulè ministrare solitus erat, cum piâ cum cautelâ, ut ad excutiendum extraheret tunicam, induxisset; attentè respiciens vidit plagam: cui etiam tres veloci contactu digitos applicans, tam visu, quàm tactu, vulneris quantitatem agnovit. Cum simili cautelâ vidit etiam frater ille, qui tunc temporis erat Vicarius ejus. Frater verò socius mirandæ simplicitatis; dum

dum infirmitatis causâ languentis scapulas contrectaret : manu per capitium missâ , & casualiter vulneri sacro illapsâ , magnum ei dolorem infixit . Proinde portabat ex tunc femoralia ita facta , ut usque ad axillas pertingerent , ad vulnus lateris contegendum . Fratres quoque , qui illa lavabant , vel tunicam excutiebant pro tempore , quia inveniebant eam sanguine rubricatam ; indubitanter per evidens signum , in cognitionem sacri vulneris pervenerunt : quod postmodum in morte , revelatâ facie ; ipsi cum aliis plurimis contemplati simul & venerati sunt .

Eja nunc strenuissime miles Christi , ipse fer arma invictissimi ducis : quibus munitus & insignitus , omnes adversarios superabis . Fer vexillum Regis altissimi : ad cujus intuitum omnes pugnatore divini exercitûs animantur . Fer nihilominus sigillum Summi Pontificis Christi : quo verba & facta tua tanquam irreprehensibilia , & authentica meritò ab omnibus acceptentur . Iam enim propter Stigmata Domini Jesu , quæ in corpore tuo portas , nemo debet tibi esse molestus : quin potiùs , quilibet Christi servus , omni esse tenetur affectione devotus . Jam per hæc signa certissima , non duobus aut tribus testibus ad sufficientiam , sed quàm plurimis ad superabundantiam comprobata testimonia Dei in te , & per te credibilia facta nimis , omne tollunt infidelibus velamen excusationis : dum credentes in fide stabiliunt , spei fiduciam sursum agunt , & igne charitatis accedunt . Jam verè impleta est prima visio quam vidisti : videlicet , quòd dux in militiâ Christi futurus , armis deberes cælestibus , signoque Crucis insignibus decorari . Jam in principio tuæ conversionis , crucifixi visio compassivi dolo-

doloris gladio mentaliter te transfigens : sed & auditus vocis de cruce, tanquam de throno Christi sublimi, & secreto propitiatorio, procedentis, (juxta quod tuo sacro firmasti eloquio) vera indubitanter fuisse creduntur. Jam in tuæ conversionis progressu, & crucem quam vidit frater Silvester ex ore tuo mirabiliter procedentem; & gladios in crucis modum tua viscera transfigentes, quos facer vidit Pacificus, teque secundum crucis figuram in aëre sublevatum, cum de crucis titulo sanctus prædicabat Antonius, juxta quod prospexit Angelicus vir Monaldus : non phantasticâ visione, sed revelatione fuisse cælicâ conspecta, verè creditur, & firmatur. Jam denique circa finem, quod simul tibi ostenditur, & sublimis similitudo Seraph, & humilis effigies crucifixi, interiùs te incendens, & exteriùs te consignans; tanquam alterum Angelum ascendentem ab ortu solis, qui signum in te habeas Dei vivi; & prædictis dat firmitatem fidei, & ab eis accipit testimonium veritatis. Ecce jam septem apparitionibus crucis Christi, in te, & circa te secundum ordinem temporum mirabiliter exhibitis & monstratis, quasi sex gradibus ad istam septimam, in quâ finaliter requiescis, pervenisti. Christi namque crux in tuæ conversionis primordio, tam propofita quàm assumpta, & dehinc in conversationis progressu per vitam probatissimam bajulata, in te ipso continuè, & in exemplum aliis demonstrata; tantâ certitudinis claritate, ostendit Evangelicæ perfectionis apicem te finaliter conclusisse, ut demonstrationem hanc Christianæ sapien-

fapientia, in tuæ carnis pulvere exaratam ; nullus verè devotus abjiciat ; nullus verè fidelis impugnet ; nullus verè humilis parvipendat ; cùm fit verè divinitus expreffa , & omni acceptione condigna.



De



De patientiâ ipsius; & transitu mortis.

C A P U T XIV.



CHRISTO jam igitur cruci confixus Franciscus, tam carne quàm spiritu; non solùm Seraphico amore ardebat in Deum: verum etiam sitiebat cum Christo crucifixo; multitudinem salvandorum. Faciebat proinde, quoniam propter excrecentes in pedibus clavos, ambulare non poterat, corpus emortuum per civitates & castra circumvehi: ut ad crucem Christi ferendam ceteros animaret. Fratribus quoque dicebat; *Incipiamus, fratres, servire Domino Deo nostro: quia usque nunc parum profecimus.* Flagrabat etiam desiderio magno, ad humilitatis redire primordia, ut leprosis sicut à principio ministraret: corpusque jam præ labore collapsum, revocaret ad pristinam servitutem. Proponebat Christo duce, se facturum ingentia: & fatiscentibus membris, spiritu fortis & servidus, novo sperabat certamine de hoste triumphum. Neque enim languor vel desidia

fidia locum habet , ubi amoris stimulus semper ad majora perurget . Tanta autem in eo carnis ad spiritum erat concordia , tanta obedientiæ promptitudo : quòd cum ille ad omnem niteretur sanctitatem pertingere , ipsa non solum non repugnaret , sed præcurrere niteretur .

Ut autem viro Dei cumulus meritorum accresceret , quæ omnia verè in patientiâ consumantur : cœpit infirmitatibus multimodis laborare tam graviter , ut vix in eo membrum aliquod remaneret , absque ingenti passionis dolore . Ad hoc tandem , per varias & diuturnas ægritudines deductus est , ut consumptis jam carnibus , quasi sola cutis ossibus cohæreret . Cumque duris corporis ange-
retur doloribus , illas suas angustias non pœnarum censēbat nomine , sed sororum . Cum autem semel gravius solito , dolorum urgeretur aculeis , quidam frater simplex dixit ad eum : Frater ora Dominum , ut mitius tecum agat : manum enim suam plus debito , super te gravare videtur . Quo audito , vir sanctus , cum ejulatu exclamans , ait : Nisi noscerem in te simplicem puritatem , tuum ex nunc abhorrerem consortium : qui ausus fueris circa me , divina judicia reprehensibilia judicare . Et licet totus esset attritus , gravis prolixitate languoris ; projiciens se in terram , ossa debilia duro casu collisit . Et deosculans humum ; Gratias , inquit , tibi ago , Domine Deus , de omnibus his doloribus meis : teque , mi Domine , rogo , ut centuplum , si tibi placuerit , addas : quia hoc erit mihi acceptissimum , ut affligens me dolore , non parcas , cum tuæ sanctæ voluntatis adimpletio , sit mihi consolatio superplena . Videbatur propterea fratribus , quòd quasi alterum Job viderent : cui cum languor cresceret carnis , crescebat simul & vigor mentis .

R

Ipse

Ipse autem obitum suum longè ante præcivit: dieque transitus imminente, dixit fratribus, sui corporis tabernaculum deponendum in proximo; quemadmodum sibi fuerat revelatum à Christo. Cum itaque per biennium, ab impressione sacrorum Stigmatum, anno videlicet à suâ conversione vigesimo; multis fuisset angustiantium infirmitatum probativis tunctionibus conquadatus, tanquam lapis in supernæ Hierusalem ædificio collocandus; & tanquam ductile opus sub multiplicis tribulationis malleo, ad perfectionem adductus: ad sanctam Mariam de Portiunculâ se portari poposcit: quatenus ubi acceperat spiritum gratiæ, ibi redderet spiritum vitæ. Quò cum fuisset perductus, ut veritatis exemplo monstraret, quòd nihil erat illi commune cum mundo, in illâ infirmitate tam gravi, quæ omnem languorem conclusit, super nudam humum se totum nudatum in spiritus fervore prostravit: quatenus horâ illâ extremâ, in quâ poterat adhuc hostis irasci, nudus luctaretur cum nudo. Decubans sic in terrâ, saccinâ veste depositâ, faciem solito more levavit in cælum: & intendens illi gloriæ totus, manu sinistrâ dextri lateris vulnus ne videretur, obtexit. Et ait ad fratres; *Ego quod meum est feci: quod vestrum est, Christus edoceat.*

Illacrymantibus autem sociis Sancti, qui miro fuerant compassionis telo percussi; unus ex eis, quem vir Dei Guardianum suum esse dicebat, votum ipsius divinâ inspiratione cognoscens, festivus surrexit; & acceptam cum chordâ & femoralibus tunicam, pauperulo Christi obtulit, dicens: Hæc tibi tanquam pauperi commodo, & tu illa suscipias obedientiæ sanctæ mandato. Gaudet ex hoc vir sanctus, & jubilat præ lætitiâ cordis: quoniam fidem tenuisse

tenuisse Dominæ paupertati, usque in finem se vidit: palmasque levans ad cœlum, Christum suum magnificat, pro eo quòd exoneratus ab omnibus, liber vadit ad ipsum. Fecerat enim hæc omnia paupertatis zelo, ut nec habitum quidem vellet habere, nisi ab alio commodatum. Voluit certè per omnia Christo crucifixo esse conformis, qui pauper & dolens, & nudus in cruce pependit. Propter quod, & in principio conversionis suæ nudus remansit coram Antistite: & in consumatione vitæ, nudus voluit de mundo exire: fratribusque sibi assistentibus in obedientiâ charitatis injunxit, ut cum viderent eum jam esse defunctum; per tam longum spatium, nudum super humum jacere permitterent, quòd unius nulliarii tractum suaviter quis perficere posset. O verè Christianissimum virum, qui & vivens Christo viventi, & moriens morienti, & mortuus mortuo, perfectâ esse studuit imitatione conformis, & expressâ promeruit similitudine decorari.

Horâ denique sui transitûs propinquantem, fecit, fratres omnes existentes in loco ad se vocari: & eos consolatoriis verbis, pro suâ morte demulcens, paterno affectu ad divinum est hortatus amorem. De patientiâ, & paupertate, & sanctæ Romanæ Ecclesiæ fide, servandis, sermonem protraxit, ceteris institutis sanctum Evangelium anteponebat. Circumsedentibus verò omnibus fratribus, extendit super eos manus, in modum crucis brachiis cancellatis: (pro eo quòd hoc signum semper amabat) & omnibus fratribus tam præsentibus quàm absentibus, in crucifixi virtute ac nomine benedixit. Insuper & adjecit: Valet filii omnes in timore Domini, & permanete in eo semper. Et quoniam futura tentatio & tribulatio appropinquat: felices qui perseverabunt in his quæ cœpe-

runt . Ego verò ad Deum propero, cujus gratiæ vos omnes commendo . Suavi hujusmodi admonitione completâ , jussit Deo vir carissimus , Evangeliorum sibi codicem apportari : & Evangelium secundum Joannem, quod incipit ab eo loco , *Ante diem festum Paschæ* , sibi legi poposcit . Ipse verò prout potuit , in hujus Psalmi vocem erupit : *Vocem meâ ad Dominum clamavi , voce meâ ad Dominum deprecatus sum*; & ad finem usque complevit . *Me*, inquit, *expectant justî, donec retribuas mihi* . Tandem cunctis in cum completis mysteriis , animâ illâ sanctissimâ , carne solutâ, & in abyssum divinæ claritatis absorptâ, beatus vir obdormivit in Domino .

Unus autem ex fratribus & discipulis ejus, vidit animam illam beatam sub specie stellæ præfulgidæ, à candidâ subuectam nubeculâ , super aquas multas in cælum recto tramite sursum ferri : tanquam sublimis sanctitatis candelæ prænitidam , & cælestis sapientiæ simul & gratiæ ubertate repletam; quibus vir sanctus promeruit locum introire lucis & pacis , ubi cum Christo sine fine quiescit . Minister quoque fratrum in terrâ Laboris tunc erat Frater Augustinus , vir utique sanctus & justus : qui in horâ ultimâ positus , cùm jam diu perdidisset loquelam , audientibus qui astabant, subito clamavit & dixit : *Expecta me pater, expecta* : ecce jam venio tecum . Quærentibus fratribus , & admirantibus multum , cui sic loqueretur : audacter respondit : Nõne videtis patrem nostrum Franciscum , qui vadit ad cælum ? Et statim sancta ipsius anima migrans à carne , Patrem est sequuta sanctissimum .

Episcopus Assisinas , ad oratorium S. Michaelis in monte Gargano, tunc temporis peregrinationis causâ perrexerat; cui B. Franciscus apparens nocte transitûs sui, dixit ;

dixit : Ecce relinquo mundum, & vado ad cælum . Mane igitur surgens Episcopus , fociis narravit quæ vidit : & Affisium rediens , cùm sollicitè perquisisset , certitudinaliter comperit, quòd eâ horâ quâ sibi per visionem innotuit, beatus Pater ex hoc mundo migravit . Alaudæ aves lucis amicæ , & crepusculorum tenebras horrescentes , horâ transitûs sancti viri , cùm jam esset noctis sequuturæ crepusculum , venerunt in multitudine magnâ super tectum domûs : & diu cum insolitâ quadam jubilatione rotantes ; gloriæ Sancti, qui eas ad divinas laudes invitare solitus erat , tam jucundum quàm evidens testimonium perhibebant .

*De*



*De canonizatione ipsius, & translatione
corporis sacri .*

CAPUT XV.



RANCISCUS igitur servus & amicus Altissimi; Ordinis Minorum fratrum institutor & dux, paupertatis professor, patientiæ forma, veritatis præco, sanctitatis speculum, & totius Evangelicæ perfectionis exemplar: supernâ præventus gratiâ, or-

dinato progressu, ab infimis pervenit ad summa. Hunc virum mirabilem, utpote paupertate prædivitem, humilitate sublimem, mortificatione vividum, simplicitate prudentem, omnique morum honestate conspicuum: quem in vitâ Dominus mirabiliter effecerat clarum, in morte fecit incomparabiliter clariorem. Beato namque viro migrante à seculo, spiritus ille sacer domum æternitatis ingrediens, fontisque vitæ haustu plenario gloriosus effectus, expressa quædam in corpore futuræ gloriæ signa reliquit: ut caro illa sanctissima, quæ crucifixa cum
vitiis,

vitiis, in novam jam creaturam transierat, & passionis Christi effigiem privilegii singularitate præferret, & novitate miraculi resurrectionis speciem præmonstraret.

Cernebantur quidem in membris illis felicibus clavi, ex ejus carne virtute divinâ mirifice fabrefacti: sicque carni eidem innati, quod dum à parte qualibet premerentur, protinus quasi nervi continui & duri, ad partem oppositam resultabant. Invenra quoque fuit patentius, in ipsius corpore, non inflicta humanitûs neque facta, plaga vulneris lateralis, instar vulnerati lateris Salvatoris: quod redemptionis & regenerationis humanæ, in ipso Redemptore nostro protulit sacramentum. Erat autem similitudo clavorum nigra quasi ferrum: vulnus autem lateris rubrum, & ad orbicularitatem quandam carnis contractione reductum, rosa quædam pulcherrima videbatur. Caro verò ipsius reliqua, quæ prius tam ex infirmitate quàm ex naturâ, ad nigredinem declinabat, candore nimio renitefcens, illius secundæ stolæ pulchritudinem prætendebat. Membra ipsius adeò mollia & tractabilia se præbebant palparentibus, ut conversâ viderentur in teneritudinem puerilis ætatis, & quibusdam cernerentur evidentibus signis innocentie decorata. Cùm igitur in candidissimâ carne clavi nigrescerent; plaga verò lateris, ut vernans roseus flos ruberet: mirandum non est si tam formosa & miraculosa varietas jucunditatem & admirationem conuentibus ingerebat.

Lacrymabantur filii pro subtractione tam amabilis patris: sed & non modicâ perfundebantur lætitiâ, dum deosculabantur in eo signacula summi Regis. Miraculi novitas planctum vertebat in jubilum: & intellectus rapiebat

piebat indaginem in stuporem . Erat quippe tam insolitum , tamque insigne spectaculum contuentibus omnibus , & firmamentum fidei , & incitamentum amoris : audientibus verò admirationis materia , & excitatio desiderii ad videndum . Audito siquidem transitu Patris , & famâ diffusâ miraculi , accelerans populus confluebat ad locum : ut id cernerent oculis carnis , quod à ratione dubium omne repelleret , & affectioni gaudium cumularet .

Admissi sunt igitur Assisinales cives quamplurimi , ad Stigmata illa sacra contemplanda oculis , & labiis osculanda . Unus autem ex eis miles , litteratus quidem & prudens , Hieronymus nomine , vir utique famosus & celebris ; cum de hujusmodi sacris signis dubitasset , effectusque incredulus , quasi Thomas : ferventiùs & audaciùs coram fratribus & aliis civibus , movebat clavos ; Sanctique manus , pedes , & latus manibus propriis contrectabat : ut dum vulnere Christi veracia illa signa palpando contingeret , de sui & omnium cordibus omne dubietatis vulnus amputaret . Propter quod & ipse inter alios , hujus veritatis tam certitudinaliter agnitæ , testis constans postmodum effectus est , & tactis sacrosanctis juramento firmavit . Fratres autem & filii , qui vocati fuerant ad transitum Patris , cum omni multitudine populorum , noctem illam , in qua almus Christi Confessor decessit , sic divinis laudibus dedicârunt ; ut non defunctorum exsequiæ , sed Angelorum excubiæ viderentur .

Mane autem facto , turbæ quæ convenerant , acceptis arborum ramis , & cereorum multiplicatis luminibus , cum hymnis & canticis , sacrum corpus ad civitatem

tatem Assisi detulerunt. Transeuntes verò per Ecclesiam S. Damiani, in quâ virgo illa nobilis Clara, nunc gloriosa in cælis, tunc inclusa cum virginibus morabatur; ibique aliquantulum subsistentes: sacrum corpus margaritis cælestibus insignitum, videndum & osculandum sacris illis virginibus obtulerunt. Pervenientes denique ad civitatem cum jubilo, pretiosum thesaurum quem portabant, in Ecclesiâ sancti Georgii, cum omni reverentiâ condiderunt. In eo siquidem loco, puerulus litteras didicit; ibique postmodum prædicavit: postremò ibidem locum primum quietis accepit. Transiit autem venerabilis Pater ex hujus mundi naufragio, anno Dominicæ Incarnationis millesimo ducentesimo vigesimo sexto, quarto Nonas Octobris, die sabbati in sero, sepultus in die Dominico.

Cœpit autem vir beatus continuò, divinæ faciei superirradiante respectu, magnis & multis coruscare miraculis: ut sublimitas sanctitatis ejus, quæ ipso vivente in carne, ad morum directionem, per exempla perfectæ justitiæ innotuerat mundo: illo jam regnante cum Christo, ad omnem fidei firmitatem, per miracula divinæ potentie comprobaretur è cælo. Cumque in diversis orbis partibus, gloriosa ejus miracula, largaque per ipsum impetrata beneficia, plurimos ad Christi devotionem accenderent, & ad ipsius sancti reverentiam incitarent: acclamantibus tam linguis sermonum, quàm operum; ad aures summi Pontificis domini Gregorii Noni, quæ per servum suum Franciscum Deus operabatur, magnalia pervenerunt. Sanè cum idem pastor Ecclesiæ, non solum ex miraculis auditis post mortem; verùm etiam experimentis in vitâ, ipsius oculis visis, & manibus contrectatis, sanctitatem

S

ejus

ejus mirabilem, plenâ fide certificatus agnosceret, ac per hoc, in cælis glorificatum à Domino nullatenus dubitaret: ut Christo, cujus erat Vicarius, concorditer ageret, hunc in terris reddere celebrem, tanquam omni veneratione dignissimum, piâ consideratione disposuit. Ad omnem quoque certitudinem faciendam orbi terrarum, de glorificatione viri sanctissimi, inventa miracula & conscripta, & testibus idoneis approbata, examinari fecit per illos, qui minus inter Cardinales, favorabiles negotio videbantur. Quibus diligenter discussis, & ab omnibus approbatis, de fratrum suorum, & omnium Prælatorum, qui tunc erant in Curiâ, concordii consilio & assensu, canonizandum decrevit: veniensque personaliter ad civitatem Assisi, anno Dominicæ Incarnationis millesimo ducentesimo vigesimo octavo, decimo septimo Calendæ Augusti, die Dominico: cum maximis, quæ longum foret enarrare, solemnibus, beatum Patrem cathalogo Sanctorum adscripsit.

Anno verò Domini millesimo ducentesimo trigésimo; convenientibus fratribus ad Capitulum Generale Assisi celebratum: ad Basilicam in honorem ipsius constructam, corpus illud Domino dedicatum, octavo Calendæ Junii translatum est. Dum autem ille sacer transportaretur thesaurus, bullâ Regis altissimi consignatus; miracula plurima ille, cujus effigiem præferebat, operari dignatus est: ut per odorem ipsius salvificum, affectus traheretur fidelium, ad currendum post Christum. Erat reverâ condignum, ut quem Deus in vitâ sibi placentem & dilectum effectum, in paradysum per contemplationis gratiam transtulerat, ut Enoch; & ad cælum in curru igneo per charitatis zelum rapuerat, ut Eliam: ejus jam vernantis,

ris, inter flores illos cælicos plantationis æternæ, ossa illa felicia de loco suo, pullulatione mirificâ redolerent. Porro sicut vir iste beatus, mirandis virtutum signis in vitâ claruerat: sic à die transitûs sui usque in præsens, per diversas mundi partes, præclaris miraculorum prodigiis, divinâ se potentiâ glorificante coruscat. Nam cæcis & surdis, mutis & claudis, hydropicis & paralyticis, dæmoniacis & leprosis, naufragis & captivis, ipsius meritis remedia conferuntur, omnibusque morbis, necessitatibus, & periculis subvenitur. Sed & multis mortuis mirificè per ipsum suscitatis, innotescit fidelibus, mirificans sanctum suum magnificentia virtutis Altissimi; cui est honor & gloria, per infinita sæcula sæculorum, Amen.





*Miracula aliquot, à S. Francisco, post
ejus obitum edita.*

C A P U T XVI.

§ I.

De virtute sacrorum Stigmatum :



D omnipotentis Dei honorem , & gloriam B. Patris Francisci, post glorificationem ipsius in cælis, aliqua ex approbatis scripturus miracula : ab illo præcipuè censui sumendum fore initium, in quo crucis Jesu virtus ostenditur , & gloria innovatur .

Novus igitur homo Franciscus, novo & stupendo miraculo claruit : cùm singulari privilegio, retroactis sæculis non concesso, insignitus apparuit, sacris videlicet Stigmatibus decoratus, & configuratus in corpore mortis hujus, corpori Crucifixi . De quo quicquid humanâ linguâ dicatur, minus erit laude condignâ . Totum quidem viri Dei studium, tam publicum quàm privatum, circa
crucem

crucem Domini versabatur . Et ut crucis signaculo, cordi ejus , à principio suæ conversionis impresso , corpus consignaret exterius in ipsâ se cruce recludens, habitum poenitentiae sumsit, crucis imaginem præferentem : quatenus sicut mens ejus intus, Dominum crucifixum induerat ; sic & corpus ejus indueret arma crucis ; & in quo signo Deus potestates aéreas debellârat , in eodem suus exercitus Domino militaret . Sed & à principio temporis , quo crucifixo militare cœperat, diversa circa eum crucis præfulsere mysteria : sicut vitæ ipsius consideranti decursum clariùs innotescit: qualiter apparitione crucis Dominicæ septiformi , tam cogitatu, quàm affectu & actu , totus fuit in crucifixi effigiem , per ipsius extaticum transformatus amorem . Dignè igitur summi Regis clementia , suis amatori- bus ultra omnem æstimationem hominum condescendens , suæ crucis vexillum ipsius corpori deferendum impressit : ut qui mirando fuerat crucis amore præventus ; mirando etiam fieret crucis honore mirificus . Ad hujus stupendi miraculi irrefragabilem firmitatem , non solum videntium & palpantium testimonia, per omnem modum credibilia : verùm etiam apparitiones mirabiles , & virtutes post ipsius obitum coruscantes , ad omne mentis effugandum nubilum suffragantur . Felicis namque recordationis Dominus Gregorius Papa Nonus , (de quo vir sanctus prophetando prædixerat , quòd ad dignitatem foret Apostolicam sublimandus) antequam crucis signiferum cathalogo Sanctorum adscriberet ; scrupulum quandam dubitationis in corde gerebat , de vulnere laterali . Nocte verò quadam , (sicut ipse felix Antistes referebat cum lacrymis) beatus ei Franciscus , quâdam faciei prætensâ duritiâ, in somnis apparuit: & hæsitacionem cordis ipsius redar-

redarguens, elevavit brachium dexterum, detexit vulnus; phialamque poposcit ab ipso, ut scaturientem reciperet sanguinem, qui ex latere defluebat. Obtulit in visione summus Pontifex phialam postulatam: quæ usque ad summum, sanguine profluente de latere videbatur impleri. Ex tunc, ad illud sacrum miraculum tantâ cœpit devotione affici, & æmulatione fervere; ut nullo modo pati posset, quòd aliquis præfulgentia illa sacra signa, superbâ præsumeret impugnatione fuscare, quin eum severâ increpatione feriret.

Frater quidam; ordine Minor, officio prædicator; virtutis & famæ prærogativâ præpollens, cui firmiter erat de sanctis Stigmatibus persuasum; dum humano sensu miraculi hujus apud se rationem perquireret, dubitationis cœpit cujusdam scrupulo titillari. Cùm igitur per dies plurimos, sensualitate fumente vigorem, luctamen hujusmodi pateretur: nocte dormienti S. Franciscus pedibus lutulentis apparuit: humiliter durus, & patienter iratus. Et quæ sunt, ait, ista in te conflictationum certamina? quæ dubitationum sordes? Vide manus meas & pedes meos. Cumque ille videret manus confixas, lutulentorum pedum stigmata non videbat. Remove, inquit, lutum à pedibus meis, & cognosce loca clavorum. Quos cùm ille apprehendisset devotè: lutum sibi videbatur abstergere, locaque clavorum manibus contrectare. Continuo ut evigilat, lacrymis irrigatur: & priores affectus quodammodo lutulentos, tam lacrymarum profluvio; quàm publicâ confessione deterfit.

In urbe Româ, matrona quædam morum claritatè; ac parentum gloriâ nobilis, S. Franciscum in suum elegerat advocatum: ipsius habens depictam imaginem in secreto

creto cubiculo, ubi patrem in abscondito exorabat. Die verò quadam, dum orationi vacaret, considerans imaginem Sancti, sacra illa signa Stigmatum non habentem: dolere cœpit non modicum & mirari. Sed non mirum, si in picturâ non erat quod pictor omiserat. Cumque per plures dies, quid causâ foret defectûs hujusmodi, mente sollicitâ pertractaret: ecce subitò die quadam apparuerunt signa illa mirifica in picturâ, sicut in aliis ipsius sancti imaginibus pingi solent. Tremefacta illa, filiam suam Deo devotam advocavit protinus: requirens si absque Stigmatibus usque tunc imago fuisset. Affirmat illa, & jurat olim sine illis sacris Stigmatibus extitisse, & nunc verè cum stigmatibus apparere. Verùm quia mens humana; semetipsam frequenter impellit ut cadat, & in dubium revocat veritatem: subintrat iterum cor mulieris dubitatio noxia, ne fortè sic fuisset imago à principio consignata. At Dei virtus, ne primum contemneret miraculum, addidit & secundum. Continuo namque disparentibus signis illis, nudata privilegiis imago remansit: ut persequens signum fieret probatio præcedentis.

In Cathalonia quoque apud Ilerdam, accidit, virum quendam nomine Joannem, B. Francisco devotum, quodam sero, per quandam incedere viam, in quâ, pro inferendâ morte latitabant insidiæ: non quidem ipsi, qui inimicitias non habebat: sed alteri cuidam, qui videbatur similis ejus; & tunc erat in comitatu ipsius. Exsurgens autem quidam de insidiis, cum hostem suum hunc esse putaret, tam lethaliter eum plagis plurimis gladiavit; ut nulla prorsus superesset spes recuperandæ salutis. Si quidem primò inflicta percussio, humerum cum brachio penè totum absciderat: & ictus alius sub mammillâ, tantam

tantam reliquerat aperturam, ut flatus inde procedens, circa sex candelas simul junctas exstingueret. Cum igitur consilio medicorum, ipsius impossibilis esset curatio; pro eo quod putrescentibus plagis, ex eis fœtor tam intolerabilis exhalaret, ut etiam ipsa ejus uxor vehementer horreret; nullisque jam humanis juvari posset remediis: convertit se ad B. Patris Francisci patrocinium, quantâ poterat devotione poscendum; quem inter ipsos ictus, unâ cum beatâ Virgine fidentissimè invocârat. Et ecce, misero in lectulo calamitatis solitario decubanti, cum Francisci nomen, vigilans & ejulans frequentius replicaret; astitit quidam in habitu fratris Minoris, per fenestram, ut ei videbatur, ingressus: qui vocans eum ex nomine, dixit: Quia fiduciam habuisti in me, ecce Dominus liberabit te. A quo, cum æger quis esset requireret; Franciscum ille se esse respondit. Et statim appropians, vulnerum illius ligaturas resolvit: & cum unguento per omnes plagas, ut videbatur, perunxit. Statim autem ut sensit illarum sacrarum manuum, Stigmatum Salvatoris virtute sanare valentium, suavem contactum: expulsâ putredine, restitutâ carne, & vulneribus solidatis, restitutus est integrè pristinæ sospitati: quo factò beatus Pater abcessit, Et ipse sentiens se sanatum, & in vocem divinæ laudis, & B. Francisci lætanter erumpens, vocavit uxorem. At illa celerius currens, & stare jam videns quem sepeliendum credebat in crastino; cum esset stupore vehementi perterrita: viciniam totam clamore complevit. Accurrentes autem sui, cum illum niterentur, tanquam phreneticum in lecto reponere, & ille è contrâ renitens assereret, & ostenderet se sanatum; tanto sunt stupore attoniti, ut quasi sine mente omnes effecti, phantasticum esse

esse crederent quod videbant : quia quem paulo antè conspexerant plagis atrocissimis laniatum, & totum jam marcidum ; plenâ cernebant incolumitate jucundum. Ad quos ille qui factus fuerat sanus : Nolite timere, inquit ; nolite credere inane quod cernitis : quia S. Franciscus modò à loco recessit, & illarum sacrarum manuum tactu, me integrè ab omni plagâ curavit. Crebrescente tandè hujus famâ miraculi, accelerat populus omnis : & videntes in tam aperto prodigio, Stigmatum beati Francisci virtutem, admiratione simul & gaudio replebantur ; Christique signiferum magnis laudum præconiis extollebant. Dignè quidem beatus Pater, carne jam mortuus ; & vivens cum Christo, præsentiae suæ ostensione mirabili, & manuum sacrarum palpatione suavi, vulnerato lethaliter viro sanitatem concessit : cùm illius etiam in se Stigmata tulerit, qui misericorditer moriens, & mirabiliter surgens, vulneratum genus humanum, & semivivum relictum, plagarum suarum virtute sanavit.

Apud Potentiam Apuliæ civitatem, erat quidam clericus Rogerus nomine, vir honorabilis, & Ecclesiæ majoris Canonicus. Hic cùm infirmitate quassatus, die quâdam Ecclesiam oraturus intrasset, in quâ erat imago beati Francisci depicta, gloriosa Stigmata repræsentans : cœpit de illius sublimitate miraculi, tanquam de re omnino insolitâ & impossibili, dubitare. Subitò igitur, dum mente plagatus interiùs cogitaret inania : in palmâ sinistræ manûs sub chirothecâ, graviter se sensit esse percussum, sonitum audiens percussuræ, velut cùm spiculum profluit de balistâ ; moxque tam vulnere sauciatus, quàm sonitu stupefactus ; chirothecam de manu traxit : ut visu digno-

T

ficeret,

sceret, quod tactu perceperat & auditu. Cumque nulla fuisset prius in palmâ percussio, conspexit in medio manûs plagam, quasi sagittæ percussione inflictam: ex quâ, tanta vis procedebat ardoris, ut videretur ex illo deficere. Mirabile dictu! Nullum in chirotheca vestigium apparebat: ut latenti plagæ cordis, latenter inflicti pœna vulneris responderet. Clamat exinde per duos dies, & rugit, dolore gravissimo stimulatus: & increduli cordis velamen explicat universis. Credere se veraciter, sacra Stigmata in sancto fuisse Francisco fatetur, & jurat: contestans omnis dubitationis abscessisse phantasmata. Orat suppliciter Sanctum Dei, per sacra sibi Stigmata subvenire: & multas cordis preces multo impinguat profluvio lacrymarum. Mirum certè! Incredulitate projectâ sanationem mentis, sanatio sequitur corporalis. Omnis quiescit dolor, frigescit ardor, nullum remanet vestigium percussuræ. Sicque factum est, ut latens mentis infirmitas, per patens carnis cauterium, supernâ providente clementiâ, curaretur: menteque sanata, & ipsa caro pariter sanaretur. Fit homo humilis Deo, devotus Sancto, & fratrum Ordini perpetuâ familiaritate subjectus. Hujus rei tam solemne miraculum, juramenti firmatum fuit: & literis sigilli Episcopi munimine roboratis, ipsius ad nos notitia delata pervenit. De sacris ergo Stigmatibus, nullus sit ambiguitati locus; nullius in hoc, quia Deus bonus est, nequam sit oculus quasi hujusmodi doni largitio sempiternæ bonitati non congruat. Si enim illo amore Seraphico, multa membra capiti cohærerent Christo, ut & in bello simili armaturâ invenirentur condigna; & in regno ad similem forent gloriam subvehenda: nullus hoc sanæ mentis, nisi ad Christi gloriam diceret pertinere.

§. 2. De

§. 2. *De Mortuis suscitatis .*

In castro montis Marani prope Beneventum , mulier quædam S. Francisco peculiari devotione cohærens , viam universæ carnis intravit . Convenientibus autem clericis nocte , ad exsequias , & vigilias cum psalteriis decantandas : subitò , cunctis cernentibus , erexit se mulier super lectum ; & unum de astantibus Sacerdotem , patrum videlicet suum , advocavit , dicens : Volo confiteri , pater . Ego enim mortua , duro eram carceri mancipanda : quoniam peccatum quod tibi pandam , necdum confessa fueram . Sed orante , inquit , pro me S. Francisco , cui dum viverem , devotâ mente servivi ; redire nunc ad corpus indultum est mihi : ut , illo revelato peccato , sempiternam promerear vitam . Et ecce vobis videntibus , postquam illud dixero , ad promissam requiem properabo . Trementer ergo Sacerdoti trementi confessa , post absolutionem receptam , quietè se in lecto collegit , & in Domino feliciter obdormivit .

In castro Pamarco , in montanis Apuliæ posito , patri & matri unica erat filia , in tenerâ ætate , tenerè prædicta . Quâ , infirmitate gravi ad mortem perductâ ; parentes ejus successionem aliam non sperantes , se in illâ , quasi mortuos reputabant . Convenientibus ergo consanguineis , & amicis , ad flebile nimis funus ; jacebat mater infelix , ineffabilibus completa doloribus , & absorpta supremâ tristitiâ , de his quæ fiebant , nihil penitus advertabat . Interim S. Franciscus , uno tantum socio comitatus apparens , desolatam visitare dignatus est feminam , quam sibi senserat esse devotam : & piis eam affatus allo-

quius : Noli flere , inquit : nam lucernæ tuæ lumen , quod deploras extinctum , meâ tibi est intercessione reddendum . Surrexit continuò mulier ; & quæ sibi dixerat Sanctus , omnibus manifestans , non permisit extinctum corpus efferrî : sed cum magnâ fide S. Francisci nomen invocans , & mortuam filiam apprehendens , vivam & incolumem cunctis videntibus & mirantibus allevavit .

Cùm fratres de Noceriâ , peterent quoddam plaustrum , à quodam viro Petro nomine , quo aliquantulum indigebant ; stultè respondit eis , pro petito subsidio irrogando convitium : & pro elemosynâ ad honorem sancti postulatâ Francisci , in nomen ipsius blasphemiam jaculando . Pœnituit hominem statim insipientiæ suæ , divino super eum irruente pavore ; ne fortè ultio Domini sequeretur ; sicut & fuit protinus subsequuta . Nam infirmatus continuò primogenitus ejus , parvo elapso spatio , spiritum exhalavit . Volutabatur per humum pater infelix ; & sanctum Dei Franciscum invocare non cessans , cum lacrymis exclamabat : Ego sum qui peccavi , ego qui iniquè locutus sum : me in personâ propriâ flagellare debuisti . Redde , sancte , jam pœnitenti , quod abstulisti impiè blasphemanti . Tibi me reddo , tuis me obsequiis semper expono : nam & devotum sacrificium laudis , pro tui honore nominis , semper offeram Christo . Mira res ! Ad hæc verba surrexit puer ; & planctum prohibens , se morientem educit de corpore , per B. Franciscum deductum asseruit , & deductum .

Cujusdam Urbis Romæ Notarii puerulus vix septennis , matrem ad Ecclesiam S. Marci euntem , puerili more sequi desiderans , dum remanere domi compelleretur à matre , per fenestram palatii se projecit : & ultimâ quas-

quassatione collisus continuò exspiravit. Mater verò ; quæ nondum longè discesserat , ad sonitum corruentis , præcipitum pignoris suspicata , celeriter rediit : filiumque reperiens tam miserabili casu repente subtrahit , protinus sibi ipsi manus injecit ultrices , ac dolorosis clamoribus totam excitavit viciniam ad lamentum . Frater verò quidam nomine Raho , de Ordine Minorum , illuc se ad prædicandum conferens , propinquavit ad puerum : & fide plenus ait ad patrem : Credisne sanctum Dei Franciscum , posse filium tuum à mortuis suscitare , propter amorem quem semper ad Christum habuit , pro reddendâ vitâ hominibus crucifixum ? Quo respondente , se firmiter credere , & fideliter confiteri ; servumque Sancti in perpetuum se esse futurum , si tantum à Deo munus per ipsius merita recipere mereretur : prostravit se frater ille cum fratre socio in oratione , ceteros qui aderant excitans ad orandum . Quo facto cœpit puer aliquantulum oscitare ; & apertis oculis , brachiisque elevatis , seipsum erexit : & statim coram omnibus ambulavit incolumis , per mirandam sancti virtutem , vitæ simul redditus & salutis .

In civitate Capuæ , dum puer quidam super ripam Vulturni fluminis , cum pluribus jocaretur , incautus cecidit in profundum : quem fluminis impetus celeriter vorans , sub sabulo mortuum sepelivit . Proclamantibus autem pueris , qui cum eo luserant circa flumen : populosa illuc multitudo convenit . Cumque universus populus suppliciter & devotè beati Francisci merita invocaret ; ut devotorum sibi parentum fidem aspiciens , prolem à mortis periculo dignaretur eripere : natator quidam procul astans , clamoribus auditis , accessit ; & post diutinam inquisitionem , invocato tandem Beati Francisci subsidio ,
locum

locum invenit, in quo limus in modum sepulchri, pueri cadaver obtexerat; quem effodiens, & extrâ deportans, dolens defunctum inspexit. Licet autem populus qui astabat, videret juvenem mortuum: nihilominus tamen flens, & ejulans proclamabat; Sancte Franciscè, redde puerum patri suo. Sed & Judæi qui venerant, naturali pietate commoti, dicebant; Sancte Franciscè, redde puerum patri suo. Subitò puer, lætantibus & mirantibus cunctis, exsurgens incolumis, duci se ad Ecclesiam. B. Francisci suppliciter postulavit: ut gratias illi devotus exolveret, cujus se noverat virtute mirabiliter fuscitatum.

In civitate Suefsâ, in vico qui ad columnas dicitur, repentè quædam corruens domus, unum absorbit juvenem; & subitò interemit. Viri autem & mulieres ruinæ sonitu excitati, undique accurrentes, elevaverunt hinc inde ligna & lapides: & miseræ matri mortuum filium reddiderunt. Illa verò amarissimis repleta singultibus, sicut poterat, dolorosis vocibus exclamabat: Sancte Franciscè, Sancte Franciscè, redde mihi filium meum. Non solùm autem illa, sed & omnes qui aderant, B. Patris præsidium flagitabant. Sed cùm non esset neque vox, neque sensus; cadaver posuerunt in lectulo: & ad sepeliendum ipsum, diem crastinum expectabant. Mater verò fiduciam habens in Domino, per merita sancti ejus, votum emisit, novâ se sindone B. Francisci operturam altare, si filium suum revocaret ad vitam. Et ecce circa horam noctis mediam, cœpit juvenis oscitare: & calefcentibus membris, vivus exsurgens & sanus, in laudis verba prorumpit. Sed & Clerum qui convenerat, & populum universum excitavit ad laudes & gratias Deo & B. Francisco cum mentis lætitiâ persolvendas.

Juve-

Juvenis quidam Gerlandinus nomine, de Ragusâ oriundus, vindemiarum tempore ad vineas exiens, cum in vase vinario, ut utres impleret; sub torculari se mitteret: repentè prægrandes lapides, motis in se lignorum struibus, caput ipsius lethali percussione quassarunt. Festinavit continuo pater ad filium, & desperans obrutum non adjuvit: sed cum sub onere, sicut corruit, sic reliquit. Accurrerunt expeditiùs vinitores, magni clamoris vocem lugubrem audientes: multoque cum patre pueri, dolore completi, extraxerunt juvenem jam mortuum à ruinâ: Pater verò ipsius Jesu pedibus provolutus, humiliter precabatur; ut filium suum unicum per S. Francisci merita, cujus tunc imminabat solemnitas, sibi reddere dignaretur. Ingeminabat preces, vovebat officia pietatis: & sancti Viri corpus se visitaturum cum filio, si suscitaretur à mortuis, repromisit. Mirum certè! Continuo puer qui toto fuerat corpore conquassatus, restitutus vitæ & integræ sospitati, gaudens coram omnibus exsurrexit: plangentes objurgans, & S. Francisci suffragiis vitæ se redditum asseverans.

Quendam alium mortuum in Alemaniâ, suscitavit; de quo Dominus Papa Gregorius, tempore translationis ipsius Sancti, fratres omnes qui ad translationem & Capitulum convenerant, per Apostolicas literas, certos reddidit & gaudentes. Miraculi hujus seriem, quia ignoravi, non scripsi: credens Papale testimonium omnis assertionis excellere instrumentum.

§. 3. *De his quos à mortis periculo liberavit.*

In confinibus Urbis, Vir quidam nobilis Rodolphus nomine; cum Deo devotâ uxore, fratres Minores suo
rece-

recepit hospitio : tam hospitalitatis gratiâ , quàm B. Francisci reverentiâ , & amore . Nocte verò illâ , in summitate turris , dormiens cultos castrî , cùm jaceret super struem lignorum , in ipsâ muri positorum crepidine : ipsorum solutâ compage , in tectum palatii corruit , & exinde super terram . Excitatâ ad sonitum casûs totâ familiâ , & custodis intellectâ ruînâ ; dominus castrî & domina , cum fratribus accurrerunt . Is verò qui ab alto corruerat , absorptus fuerat tam profundo sopore , ut nec ad casum evigilaret iteratâ ruînâ , nec ad strepitum currentis familiæ cum clamore . Trahentium tandem , & impellentium manibus excitatus , conqueri cœpit quòd dulci fuisset quiete privatus : inter beati Francisci brachia , suaviter asserens se dormisse . Cùm verò de casu proprio doceretur ab aliis , & in imo se videret , qui in alto jacuerat : stupens esse factum quod fieri non perceperat , pœnitentiam se facturum ob reverentiam Dei , & beati Francisci , coram omnibus promisit .

In castro Pophis , quod in Campaniâ positum est , Sacerdos quidam Thomas nomine , accessit ad reparandum Ecclesiæ molendinum . Deambulans autem incautè circa extrema canalîs , quo gurgès profundus copioso defluebat influxu : subito casu caviloso ligno intrusus est , cujus impulsu volvitur molendinum . Cùm igitur confertus jaceret in ligno , & super os ipsius , quia supinus erat , aquarum impetus inundaret : corde tamen , quia linguâ non poterat , S. Franciscum flebiliter invocabat . Per magnum verò spatium sic illo jacente : ac de vitâ ipsius jam penitus sociis desperatis , in contrariam partem molam cum violentiâ revolverunt ; & sic ejectus Sacerdos , palpitans volutaba-

lutabatur in aquæ meatu . Et ecce quidam frater Minor , indutus tunicâ candidâ , & fune succinctus , cum magnâ suavitate arreptum per brachium , extra flumen eduxit , dicens : Ego sum Franciscus , quem invocasti . Ille verò sic liberatus nimis obstupuit : volensque pedum ipsius osculari vestigia , huc atque illuc anxius discurrebat , quærens à sociis : Ubi est ille ? Quò abijt sanctus ? Quâ viâ discessit ? Viri autem illi tremefacti , proni ceciderunt in terram , sublimis Dei gloriosa extollentes magnalia , & virtuosa merita humilis servi ejus .

Juvenes quidam de Burgo Celani , pro metendis herbis exierant ad campestria quædam , in quibus vetus latebat puteus , herbis in summo ore virentibus obumbratus ; qui quasi per passus quatuor , aquarum altitudinem continebat . Segregatim igitur per campum discurrentibus pueris ; unus ex improvise decurrit in puteum . Abforbente autem profundâ foveâ corpus : Spiritus mentis sursum recurrebat ad beati Francisci suffragium , clamans in ipso lapsu fideliter & fidenter ; Sancte Francisce adjuva me . Ceteri huc atque illuc se vertentes , dum puer alius non comparêret , clamore , circuitu , & lacrymis requirebant eundem . Comperto tandem quòd in puteum cecidisset , festinanter cum gemitibus redierunt ad Burgum , indicantes eventum , exposcentes auxilium . Redeuntibus autem illis , cum multâ hominum turbâ , demissus unus per funem in puteum , puerum respexit in aquarum superficie residentem , nihil passum penitus læsionis . Extractus verò de puteo puer , dixit omnibus qui astabant ; Quando subito cecidi , B. Francisci patrocinium invocavi : Qui corruenti mihi , statim præsentialiter affuit , & manum porrigens , leviter apprehendit ; nec unquam de-

V

deferuit, donec unâ vobiscum puteo me eduxit.

In Ecclesiâ beati Francisci apud Assisium, dum præsente Romanâ Curiâ prædicaret Dominus Episcopus Hostienfis, qui postmodum Summus Pontifex existit Alexander: quidam lapis ponderosus & magnus, incautè super pulpitum excelsum & lapideum derelictus, præ nimietate pressuræ impulsus, super caput cujusdam cecidit mulieris. Existimantes igitur circumstantes, perfectè ipsam jam mortuam, & caput ejus totaliter conquassatum: cooperuerunt eam pallio, quo erat amicta, ut sermone finito, educeretur extra Ecclesiam lugubre funus. Ipsa verò se beato Francisco, ante cujus jacebat altare, fideliter commendavit. Et ecce, prædicatione finitâ, mulier coram omnibus adèò surrexit incolumis, ut nullius in eâ læsionis vestigium appareret. Sed & quod est ampliùs admirandum: cùm per longa tempora usque ad horam illam, dolorem capitis quasi continuum habuisset, plenè fuit ex tunc, ab omni morbi molestiâ liberata, sicut ipsa postmodum testabatur.

Apud Cornetum, cùm in loco fratrum, ad fuscinem campanæ, viri quidam convenissent devoti: puerulus quidam octennis, Bartholomæus nomine, xenium quoddam fratribus laborantibus apportavit. Et ecce subito ventus vehemens, concussâ domo, ostium portæ grave quidem & magnum, super ipsum puerulum ita valido projecit impulsu; ut quem tam ingens pondus oppræsserat, lethali crederetur collisione quassatus. Sic enim totaliter jacebat tumulatus sub pondere, ut nihil exterius appareret. Accurrerunt omnes qui aderant, beati Francisci virtuosam dexteram invocantes. Sed & pater ipsius, qui rigescens membris, se movere non poterat præ dolore,

lore, votis & voce, sancto Francisco filium offerebat. Levatum est denique functum pondus desuper puerum. Et ecce quem credebant mortuum, quasi suscitatus à somno, lætus apparuit; nullam in se prorsus præferens læsionem. Igitur cum quatuordecim esset annorum, factus est frater Minor, vir postea litteratus, & famosus in Ordine prædicator.

Homines de Lentino, lapidem prægrandem absciderunt de monte, qui superponendus erat altari cujusdam Ecclesiæ B. Francisci, in proximo consecrandæ. Cum autem ferè quadraginta homines, lapidem illum superponere vehiculo niterentur: repetitis sæpius viribus, super quendam hominem lapis ille cecidit, & in modum sepulchri obtexit. Sed cum mente confusi, quid facerent ignorarent: major pars hominum desperata discessit. Porro viri decem, qui remanserant, lugubri voce sanctum invocantes Franciscum, ne in suo servitio, sic horrendè mori hominem pateretur: resumpto tandem corde, tantâ facilitate lapidem amoverunt, ut nullus dubitaret virtutem adfuisse Francisci. Surrexit homo incolumis in omnibus membris; insuper & lumen recuperavit limpidum oculorum, quod priùs habuerat obscuratum: ut sic omnibus daretur intelligi, quàm in rebus desperatis, B. Francisci merita, validæ sint virtutis.

Simile quiddam accidit, apud sanctum Severinum in Marchiâ de Anconâ. Dum enim lapis prægrandis de Constantinopoli adportatus, ad basilicam beati Francisci, multorum viribus traheretur, rapido lapsu est super quendam trahentium devolutus. Cumque ille non solum crederetur defunctus, sed etiam totaliter comminutus: affli-

stente sibi beato Francisco, & lapidem sublevante, absque omni læsione sanus & incolumis, lapidis projecto pondere, proslivit.

Bartholomæus Cajetanus civis, cum ad constructionem cujusdam Ecclesiæ B. Francisci, non modicum desudaret: ruente trabe quadam infirmiter positâ, ejusque opprimente cervicem, fuit graviter conquassatus. Ipse verò mortem sibi sentiens imminentem, uti erat vir fidelis & pius, à quodam fratre viaticum postulavit. Quod frater ille tam celeriter asserre non valens, quia mori subitò credebatur, B. Augustini verbum protulit, dicens ei: *Crede ego manducasti*. Sequenti verò nocte, beatus Franciscus cum undecim fratribus illi apparuit: & inter ubera portans agnuculum, ad lectum ejus accessit: vocavitque illum ex nomine, dicens: Bartholomæe, noli timere: quia non prævalebit adversus te inimicus, qui te in meo servitio voluit impedire. Hic est agnus, quem tibi dari petebas, quem & propter bonum desiderium suscepisti, cujus etiam virtute consequeris utriusque hominis sospitatem. Et sic per vulnera manum ducens, ad opus quod cœperat, eum redire præcepit. Qui valde mane confurgens, & iis qui eum seminecem reliquerant, incolumis & lætus apparens, admirationem intulit & stuporem: sed & ipsorum mentes, ad B. Patris reverentiam, & amorem, tam exemplo sui, quàm Sancti miraculo excitavit.

Quidam de castro Ceperani, nomine Nicolaus, in manus inimicorum crudelium incidit die quadam: qui crudelitate ferali, vulneribus eum super vulnera concidentibus usque adeò super miserum sævierunt, donec vel extinctum crederent, vel protinus extinguendum. Clamaverat autem Nicolaus prædictus, cum primos

primos ictus exciperet, altâ voce; Sancte Franciscè adjuva me. Hanc vocem à remotis audierunt quam plurimi, licet auxilium ferre non possent. Deportatus tandem domum, totus suo sanguine volutatus, fiducialiter assererat, se mortem ex illis vulneribus non visurum, nec etiam se tunc sentire dolores: quoniam sanctus Franciscus sibi succurrerat, & ut pœnitentiam ageret à Domino impetravit; quod & sequens confirmavit eventus. Nam lotus à sanguine, continuò contra humanam spem, extitit liberatus.

Filius cujusdam nobilis, in castro sancti Geminiani; valido languore detentus, omnique ulteriùs desperatus salute, ad extremum usque perductus est. Rivus etenim sanguinis, ab oculis ejus emanabat, sicut ex venâ brachii assolet ebullire; ceterisque propinquæ mortis veris indiciiis, in reliquo corpore apparentibus, judicabatur pro mortuo. Sed & præ debilitate spiritûs & virtutis, sensûs & motûs usu privatus, visus est penitus emigrasse. Congregatis autem ex more ad planctum parentibus, & amicis, ac de solâ agentibus sepulturâ, pater ipsius fiduciam habens in Domino, concito gressu ad Ecclesiam cucurrit B. Francisci, quæ in eodem erat castro constructa; & cingulo suspensio ad guttur cum omni humilitate se prostravit in terram; sicque vota vovens, & multiplicans preces, suspiriis & gemitibus meruit apud Christum, sanctum Franciscum habere patronum. Reverfus itaque statim pater ad filium, & sanitati restitutum inveniens, luctum in gaudium commutavit.

Simile quiddam, meritis Sancti, operatus est Dominus, circa puellam quandam in Cathaloniâ, de villâ nomine Ithamarit; & circa aliam de Anconâ: quæ cum essent præ

præ nimietate ægritudinis, in ultimo spiritu constitutæ, beatus Franciscus fideliter à parentibus invocatus, perfectæ continuò restituit sanitati.

Clericus quidam de Vico albo, nomine Matthæus, veneno mortifero bibito, in tantum fuit gravatus, quòd loqui aliquo modo non valens, solùm finalem exitum expectabat. Sacerdos quidam, ut sibi confiteretur, admonuit; & verbum unum ab eo extorquere, non valuit. Ipse vero in corde suo humiliter Christum orabat; ut per beati Francisci merita, à mortis eum faucibus eripere dignaretur. Moxque ut confortatus à Domino, beati Francisci nomen fideli devotione depromsit: testibus qui aderant, veneno evomito, liberatori suo gratias egit.

§. 4. *De liberatis à naufragio.*

In magno maris periculo positi quidam Nautæ; cùm milliaria decem à portu Barulitano distarent, ingravescente nimium tempestate: jam de vitâ dubii anchoras submiserunt. Verùm spiritu procellarum mari ferventiùs tumescente: fractis funibus, & relictis anchoris, incerto & inæquali cursu per æquora vagabantur. Tandem nutu divino mari placato, ad resumendas anchoras, quarum funes superiùs enatabant, toto se conamine paraverunt. Cumque id perficere propriis viribus non valerent, plurimorum sanctorum invocato subsidio, multisque jam sudoribus liquecentes, nec unam per totam diem resumere potuerunt. Aderat autem nauta quidam Perfectus nomine, sed moribus imperfectus: qui cum irrisione quadam dixit ad socios: Ecce sanctorum omnium invocastis auxilium; & (ut videtis) nullus est qui succurrat. Invocemus istum

istum Franciscum, qui novellus est sanctus: si quo modo in mare se mergat, & anchoras perditas reddat. Conferunt ceteri non irrisoriè, sed veraciter suasioni Perfecti: & ipsius objurgantes irrisorium verbum, firmaverunt cum sancto spontaneum votum. Statimque in momento, sine aliquo adminiculo, nataverunt anchoræ super aquas, quasi ferri natura versa foret in ligneam levitatem.

Peregrinus quidam inualidus corpore, propter febris peracutæ symptomata, quam fuerat antè perpeffus: navi quadam subvectus, de ultramarinis partibus veniebat. Ferebatur autem ipse ad beatum Franciscum, præcipuo devotionis affectu, & cum sibi apud cælestem Regem elegerat advocatum. Cum igitur necdum perfectè liber à morbo, sitis angustia retur ardoribus: deficiente jam aquâ, cœpit altâ voce clamare: *Ite fidenter, haurite poculum mihi: quia B. Franciscus vasculum meum aquâ replevit.* Mirum certè! Invenere vas aquâ repletum, quod fuerat antè vacuum derelictum. Alio verò die, cum tempestate subortâ operiretur navis fluctibus, & procellis quateretur pervalidis, ita ut jam naufragium timerent: cœpit idem infirmus subito clamore vociferari per navem: *Surgite omnes, inquit, & B. Francisco venienti occurrere: ecce ad salvandum nos adest.* Sicque cum voce magnâ & lacrymis, in faciem procidens adoravit. Statim ad sancti visionem, omnem sospitatem resumpsit infirmus, & maris fuit tranquillitas subsecuta.

Frater Jacobus Reatinus, cum in naviculâ parvâ, fluvium quendam cum aliis fratribus pertransiret, fociis primò super ripam positis, postremò se ad exitum præparabat. Sed modico illo ligno, per infortunium revoluta, recto-

rectore natante, frater merfus est in profundum. Invocabant fratres extra positi, affectuosis precibus beatum Franciscum: & ut filio succurreret, lacrymosis gemitibus supplicabant. Submersus autem frater, de ventre gurgitis nimis immensi, cum ore non posset, corde clamabat, ut poterat, implorans pii patris subsidium. Et ecce, auxiliante sibi beati Patris presentia, per profundum sicut per aridam ambulabat: & demersam naviculam, capiens, cum eâ pervenit ad litus. Mirabile dictu! Vestimenta ejus madidata non sunt, nec aquæ gutta proximavit ad tunicam.

Frater Bonaventura nomine, cum duobus viris per lacum quendam navigans, contractâ ex parte naviculâ, propter aquæ influentis impetum, demerius est cum navi & Sociis in profundum. Cum autem de lacu miseriæ, misericordem Patrem Franciscum invocarent, cum multâ fiducia: supernatavit subito aquâ plena navicula. Et cum eis, Sancto præbente ducatum, salubriter pervenit ad portum. Sic & quidam frater de Esculo submersus in flumine, S. Francisci meritis extitit liberatus. Sed & in Lacu Reatino, cum quidam viri & mulieres, in consimili essent periculo constituti, ad invocationem nominis S. Francisci, de aquarum multarum periculoso naufragio, salubriter evaserunt.

Quidam nautæ Anconitani, periculosâ tempestate jactati, submersiois periculum jam videbant. Cumque sic desperati de vitâ, S. Franciscum suppliciter invocarent, lumen in mari magnum apparuit: & cum ipso lumine tranquillitas concessa divinitus, ac si beatus vir suâ mirandâ virtute, & ventis imperare posset & mari. Quantis autem miraculorum prodigiis, beatus hic Pater
in mari

in mari claruerit, & clarescat; quoties ibidem opem tulerit desperatis; nullatenus credo possibile per singula enarrare. Nec mirum, si jam regnanti in cælis collatum est imperium super aquas: cui & in hac mortalitate degenti, omnis corporea creatura, ad suam refigurata originem, mirabiliter serviebat.

§. 5. *De liberatis à vinculis & carceribus.*

In Romaniâ, Græcum quendam cujusdam domini; fervientem, contigit de furto fallaciter accusari: quem dominus Terræ in alto carcere mandavit includi, & graviter vinculari. Domina verò domûs miserta servi, quem indubitanter credebatur à culpâ sibi impositâ innocentem; pro liberatione ipsius apud virum precibus insistebat devotis. Verùm non acquiescente viri sui duritiâ obstinatâ: recurrit domina supplex ad S. Franciscum, & ejus pietati voto commendavit infontem. Protinus adfuit miserrum adjutor, & virum in carcere positum misericorditer visitavit. Solvit vincula, carcerem fregit, innocentem manibus apprehensum, foras eduxit, & ait: Ego sum ille, cui domina tua te devotè commisit. Cumque ille timore magno corripereetur, & pro descensu altissimæ rupis voraginem circuiret: subito liberatoris sui virtute inveniens se in plano, rediit ad dominam suam. Relatâque per ordinem miraculi veritate, devotam dominam, ad Christi amorem & reverentiam servi ejus Francisci, ferventiùs inflammavit.

In Mafsâ S. Petri, cuidam militi debebat pecuniæ quantitatem pauperculus quidam. Cumque præ inopiâ facultas non suppetere perfolvendi: captus debitor à milite repente; misereri sibi orabat suppliciter, dilatio-

nem quærens amore beati Francisci . Sprevit superbus miles preces oblatas, & sancti amorem, velut inane quid, inaniter vilipendit . Nam cervicosè respondens : Tali te, ait, loco recludam, & tali retrudam carcere, quod nec Franciscus, nec aliquis te poterit adjuvare : Tentavit quod dixit . Carcerem adinvénit obscurum, in quo hominem vinculatum conjecit . Paulo post adfuit B. Franciscus : fracto carcere, ruptisque compedibus, illæsum hominem reduxit ad propria . Sic fortitudo Francisci, militem est prædata superbum, captivum qui se sibi subjecerat, liberavit à malo : militisque proterviam admirando miraculo, in mansuetudinem commutavit .

Albertus de Aretio, cùm in vinculis atrocissimis teneretur, pro debitis injustè ab eo petitis : suam innocentiam sancto Francisco humiliter commendavit . Ordinem quidem fratrum Minorum plurimùm diligebat : & S. Franciscum inter sanctos speciali venerabatur affectu . Dixit autem creditor suus voce blasphemâ; quod nec Franciscus, nec Deus posset eum, de suis manibus liberare . Factum est itaque in vigiliâ S. Francisci, cùm vinc-tus ille nihil comedisset, sed ob sancti amorem victum suum cuidam tribuisset egeno : nocte veniente, apparuit ei vigilanti S. Franciscus : ad cujus ingressum vincula de pedibus, & catenæ de manibus ceciderunt ; sponte aperta sunt ostia, prosilierunt tabulæ de solario, & liber abscessit homo ad propria rediens . Implevit ex tunc votum, jejunas vigiliam B. Francisci : & cereo, quem annuatim consuevit offerre, in accrescentis devotionis indicium, annuatim unam unciam superaddens .

Residente in Sede B. Petri Domino Gregorio No-no, quidam Petrus nomine, de civitate Alisiâ, de hæ-re-si

resi accusatus , Romæ captus est : & de mandato ejusdem Pontificis , ad custodiendum traditus Episcopo Tyburtino . Quem sub poenâ Episcopatus accipiens , compedibus alligavit , obscuroque ipsum carcere , ne posset effugere , includi fecit ; panem ei præbens in pondere , & poculum in mensurâ . Cœpit autem homo ille , beatum Franciscum ad sui miserendum multis precibus & fletibus invocare : eò quòd audierat sollemnitatis ejus jam adesse vigiliam . Et quoniam fidei puritate , omnem abdicaverat hæreticæ pravitatis errorem totâque cordis devotione , adhæserat fidelissimo Christi servo Francisco : intercedentibus ipsius meritis , à Domino meruit exaudiri . Instante enim jam nocte suæ festivitatis , circa crepusculum beatus Franciscus in carcerem miseratus descendit : & illum suo nomine vocans , ut citò surgeret imperavit . Qui timore perterritus , quisnam esset interrogans ; beatum Franciscum adesse audivit . Cumque virtute præsentis viri Sancti , vincula pedum suorum contracta conspiceret cecidisse ; & tabulas carceris clavis ultrò prosilientibus aperiri ; & apertum iter sibi ad exeundum præberi : solutus tamen , & obstupefactus fugere nesciebat ; sed ad januam clamans custodes omnes perterrituit . Qui cùm eum liberatum à vinculis , Episcopo nunciaissent , post intellectum ordinem rei , ad carcerem Pontifex devotus accessit : & manifestè Dei virtutem cognoscens , Dominum adoravit ibidem . Vincula quoque coram Domino Papa , & Cardinalibus delata fuerunt : qui videntes quod factum fuerat , admirati plurimùm , benedixerunt Deum .

Guidolotus de sancto Geminiano , falsò accusatus fuit , quòd veneno interemerat quendam virum : & quòd eodem genere mortis , filium ejusdem viri , & universam

ejus familiam proposuerat enecare . Captus proinde à Potestate Terræ , gravissimis vinculis aggravatus , in turri quadam reclusus est . Ipse verò fiduciam habens in Domino , prò suâ innocentia , quam sciebat , causam commisit B. Francisci patrocinio defendendam . Excogitante igitur Potestate , qualiter criminis objecti confessionem eliceret per tormenta , qualibusque pœnis confessum faceret interire ; nocte illâ , cùm mane ad cruciatus deberet adduci , S. Francisci præsentiâ extitit visitatus : & immenso luminis fulgore usque mane circumdatus , repletusque gaudio , & fiduciâ multâ securitatem evasionis accepit . Advenerunt mane tortores : &eductum de carcere , eculeo suspenderunt , aggravantes super eum multa pondera ferri . Depositus est pluries , & iterum elevatus : ut pœnâ pœnæ succedente , citius ad confessionem criminis arceretur : sed spiritu innocentia lætabatur in vultu , nullam mœstitiam prætendens in pœnis . Deinde accensus est ignis sub ipso non modicus : nec propterea capillus est læsus , cùm tamen capite pendêret ad terram . Tandem bulliente oleo superfusus , virtute Patroni , cui se commiserat defensandum , hæc omnia superavit : & sic dimissus liber , salvus abscessit .

§. 6. *De liberatis à periculo partûs .*

Quædam Comitissa in Sclavoniâ , sicut nobilitate illustris , sic & æmula probitatis ; erga S. Franciscum devotione flagrabat : erga fratres verò sedulâ pietate . Tempore verò partûs , duos perpeffa dolores , tantâ fuit angustia molestata , ut prolis futurus ortus , præsens videretur matris occasus . Non videbatur infantem eniti posse ad vitam , nisi exspiraret è vitâ : nec tali nisu parere ,
sed

sed perire. Subvenit cordi ejus S. Francisci fama, virtus; & gloria: excitatur fides, inflammatur devotio. Convertit se ad auxilium efficax, ad fidum amicum, ad devotorum solatium, refugium afflictorum. S. Franciscæ, inquit, pietati tuæ supplicant omnia ossa mea: & mente voveo, quod explicare non possum. Mira celeritas pietatis. Finis dicendi, finis fuit dolendi: parturiendi meta, pariendi principium. Statim enim omni cessante pressurâ, partum edidit cum salute. Non fuit immemor voti, non propositi refuga: Ecclesiam quandam pulchram construi fecit, & constructam ad sancti honorem fratribus assignavit.

In partibus Romanis, mulier quædam Beatrix nomine, vicina partui; cum per dies quatuor, foetum in ventre portaret extinctum, multis infelix agitabatur angustiiis, & exitiâlibus doloribus urgebatur. Mortuus foetus, matrem cogebat ad mortem: & nondum in lucem productum abortivum, publicum matris periculum pariebat. Tentabat medicorum auxilium: sed omne humanum remedium laborabat in vanum. Sic de primis maledictionibus copiosius aliquid declinârat in miseram: ut sepulchrum facta conceptûs, sepulchrum pro certo proximum expectaret. Fratribus tandem Minoribus, per internuncios totâ se devotione committens; suppliciter aliquid de S. Francisci reliquiis, fide plenâ poposcit. Contigit nutu divino aliquantulum inveniri de chorda, quâ fuerat sanctus quandoque præcinctus. Mox ut super dolentem posita chorda fuit, omnis facillimè solutus est dolor: mortis causa mortuus foetus emissus, pristina fanitas restituta.

Cujusdam de Narnio nobilis viri uxor, Juliana nomine.

mine, pro filiorum morte annos trahebat lugubres, & continue infelices deplorabat eventus : pro eo quòd omnes, quos cum pressurâ portaverat filios, modico interjecto tempore, cum vehementiori dolore sepulturæ tradiderat. Cùm igitur quatuor mensium conceptum haberet in utero, magisque propter eventus præteritos, de conceptæ prolis sollicitaretur obitu, quàm de ortu : beatum patrem Franciscum pro vitâ nondum nati fœtus, fideliter precabatur. Ecce autem nocte quadam, dormienti sibi mulier quædam apparebat in somnis, formosum puerulum gestans in manibus ; illumque lætissime offerebat eidem. Cùm verò illa recipere recusaret, quem statim formidabat amittere ; mulier illa subjunxit : securè suscipias, quia quem, tuo mœrori compatiens facer mittit Franciscus, vitâ vivet, & sospitate gaudebit. Statim evigilans mulier, intellexit per ostensam sibi cælitus visionem B. Francisci sibi adesse suffragium. Ex tunc abundantiori completa lætitiâ : pro suscipiendâ prole, juxta promissum multiplicavit preces, & vota promisit. Impletum est denique tempus pariendi, & peperit fœmina masculum : qui juvenilis robore florens ætatis, tanquam per B. Francisci merita, fomentum suscipere vitæ, incitamentum parentibus præbuit, ad Christum, & Sanctum ejus, devotioris affectûs. Simile quiddam huic in Tyburis civitate sanctus Pater effecit. Cùm enim mulier quædam filias plurimas peperisset, desiderio prolis fatigata virilis, apud S. Franciscum preces ingeminavit & vota. Concepit igitur ejus meritis mulier illa, & geminos ei parere dedit, qui pro uno fuerat exoratus.

Apud Viterbium partui propinqua mulier, morti propinquior censebatur, visceralibus tormentata doloribus,

ribus, & tota calamitosa infortuniis mulierum. Cumque naturæ succumbente virtute, omnis deficeret artis industria: invocato beati Francisci nomine, liberata confestim mulier, partum salubriter terminavit. Sed assecuta quod voluit, & oblita beneficii quod accepit; honorem sancto non deferens, die natalis ipsius ad opera servilia manus extendit. Et ecce subito dexterum brachium ad laborem extensum, inflexibile remansit & aridum. Quod cum studeret ad se revocare cum altero, ultione consimili & illud exaruit. Timore igitur divino correpta mulier, redintegravit votum: usumque membrorum, quem propter ingratitudinem amiserat & contemptum, per misericordis & humilis Sancti merita, cui se iteratò devovit, recuperare promeruit.

Mulier quædam de partibus Aretinis, cum per septem dies partûs discrimina sustineret, & jam in nigredinem versa, desperata esset ab omnibus: votum fecit B. Francisco, & ejus cœpit moriens auxilium invocare. Emissa autem voto celeriter obdormivit: viditque in somnis, B. Franciscum se dulciter alloquentem ac requirentem; utrum faciem ipsius agnosceret, & an Antiphonam illam Virginis gloriosæ, *Salve Regina misericordiæ*, sciret ad honorem ejusdem Virginis recitare. Quâ respondente, se habere notitiam de utrisque: Incipe, ait Sanctus, antiphonam sacram: & antequam compleas, paries cum salute: Ad hanc vocem evigilavit mulier; & cum timore cœpit dicere, *Salve Regina misericordiæ*. Cumque illos misericordes oculos precaretur, fructumque commemoraret uteri virginalis: continuò cunctis liberata pressuris, infantem speciosum peperit; gratias agens Reginae misericordiæ, quæ per B. Francisci merita, ipsius fuerat dignata misereri.

De

§. 7. *De cæcis illuminatis.*

In conventu fratrum Minorum Neapoli, cùm quidam frater, Robertus nomine, cæcus annis plurimis extitisset: crevit in oculis ejus caro superflua, motum & usum impediens palpebrarum. Cùm igitur fratres forenses, ad diversas mundi partes tendentes, ibidem plurimi convenissent: beatus Pater Franciscus speculum obedientiæ sanctæ, ut eos miraculi novitate hortaretur ad iter; prædictum fratrem, ipsis præsentibus, tali modo curavit. Jacobat nocte quadam, frater Robertus prædictus æger ad mortem; jamque sibi fuerat anima commendata: tum ecce astitit ei beatus Pater cum tribus fratribus omni sanctitate perfectis; videlicet S. Antonio, fratre Augustino, & fratre Jacobo de Assisio: qui sicut eum perfectè fuerant secuti dum viverent; ita & ipsum alacriter comitabantur post mortem. Accipiens cultellum sanctus Franciscus, carnem superfluum refecavit; lumen restituit pristinum; & à mortis eum fauce reduxit: dixitque illi: Fili Roberte, gratia quam tecum feci, signum est fratribus ad remotas nationes euntibus: quòd ego præcedam eos, & ipsoz dirigam gressus. Vadant, inquit, gaudentes; & injunctam obedientiam alacri animo exsequantur.

Apud Thebas in Romaniâ, mulier cæca vigiliam S. Francisci in pane tantùm & aquâ jejunans, ad Ecclesiam fratrum Minorum, summo mane festivitatis, à viro suo perducta est. Quæ dum Missa celebraretur; in elevatione corporis Christi oculos aperuit, clarè vidit, devotissimè adoravit. In ipsâ verò adoratione, voce magnâ proclamans: Gratias, inquit, Deo, & Sancto ejus: quia video corpus Christi. Omnibus qui aderant, in voce exulta-

sultationis conversis : post sacrorum expletionem , rever-
sa est mulier in domum suam , cum gaudio spiritûs , &
lumine oculorum . Exsultabat quidem mulier , non so-
lùm quia lucis corporeæ recuperârat aspectum : verùm
etiam quia sacramentum illud mirificum , quod est
lumen animarum verum & vivum , respectu primario ;
per B. Francisci merita , fidei suffragante virtute , me-
ruerat intueri .

In Campaniâ , puer quidam quatuordecim anno-
rum , de castro Pophis , subitâ vexatus angustia , sini-
strum oculum amisit ex toto . Passionis acerbitas , sic de
loco suo propulit oculum , quòd per octo dies , extrâ ;
nervo relaxato longitudine digiti unius , ad maxillas de-
pendens , penè aridus est effectus . Sed cùm sola superef-
set abscissio , & à medentibus foret penitus desperatus :
pater ejus ad auxilium B. Francisci , totâ se mente con-
vertit . Non defuit ille indefessus miserorum adjutor , pre-
cibus supplicantis . Nam oculum aridum , mirabili vir-
tute , in locum suum , pristinumque vigorem restituit ,
& lucis optatæ radiis illustravit .

In eâdem Provinciâ apud Castrum , magni ponderis
lignum ex alto prorupit , & cujusdam Sacerdotis caput
gravissimè quassans , sinistrum oculum excâcavit . Qui
humide dejectus , cœpit altâ voce sanctum Franciscum lu-
ctuosè clamare , dicens : Succurre , Pater sanctissime : ut
ad festum tuum ire valeam , sicut fratribus tuis ire pro-
misi . Erat enim vigilia Sancti . Qui statim exsurgens ,
peroptimè liberatus , in vocem prorupit laudis & gaudii :
& circumstantes omnes , qui ejus miseriæ condolebant ,
in stuporem convertit & jubilum . Ivit ad festum , nar-
rans omnibus , quam in se expertus fuerat clementiam &
virtutem .

Y

Vir

Vir quidam de monte Gargano, dum in vineâ suâ laborans, lignum quoddam ferro succideret, proprium percussit oculum : & sic divisit per medium, ut quasi media pars ipsius exteriùs pendèret. Cumque in tam desperato periculo, desperaret sibi posse per hominem subveniri : jejunaturum se in festo S. Francisci, si ei succurreret, repromisit. Statim in loco debito, viri oculum Sanctus Dei restituit : sicque divisum rejunxit, & lumine pristino decoravit, ut nullius læsionis vestigia remanerent.

Filius cujusdam nobilis viri à nativitate cæcus, meritis B. Francisci lumen accepit optatum : qui nomen ab eventu fortitus, Illuminatus, vocatus est. Assumpsit postea cùm in ætate esset, Ordinem beati Francisci, accepti beneficii non ingratus : tantumque profecit in lumine gratiæ & virtutis, ut verè lucis filius videretur. Tandem B. Patris promerentibus meritis, sanctum initium sine sanctiore conclusit.

In Zachanto, quod est castrum juxta Anagniam, miles quidam Gerardus nomine, oculorum lumen ex toto perdidit. Accidit autem ut duo fratres Minores ab exteris partibus venientes, ad domum ipsius hospitaturi diverterent. Suscepti itaque devotè, propter reverentiam Sancti Francisci à familiâ totâ, & cum omni benignitate tractati ; gratias agentes Deo & hospiti, ad locum fratrum devenire vicinum. Nocte igitur quadam, beatus Franciscus uni fratrum illorum in somnis apparuit, dicens : Surge, festina cum socio ad domum hospitis nostri, qui Christum & me suscepit in vobis : volo enim beneficia rependere pietatis. Cæcus quidem effectus est, suis promerentibus culpis, quas pœnitentiali non studuit confes-

confessione purgare . Disparente quoque Patre , frater festinus surrexit , ut mandatum cum socio celeriter adimpleret . Venientesque ad hospitis domum , cuncta quæ viderat alter , per ordinem narraverunt eidem . Stupuit vir ille non modicum , & universa quæ dicebantur , vera esse confirmans : compunctus ad lacrymas , confessus est libens . Tandem correctione promissa , interiorque homine taliter renovato , exteriorem continuò recuperavit aspectum . Hujus miraculi fama circumquaque diffusa ; non solum ad reverentiam Sancti : verum etiam ad confessionem humilem peccatorum , & hospitalitatis gratiam plurimos incitavit .

Quidam pro furti calumniâ cæcatus fuit , rigore Justitiæ sæcularis , apud Alisium : Othone milite per ministros publicos , sententiam Octaviani Judicis , de erudendis accusato oculis , exsequente . Qui taliter deformatus , effossis oculis , præcisus nervis opticiis , etiam cum cultello , ductus ad altare B. Francisci , imploratâ ipsius clementiâ , & suâ in prædicti criminis impositione , innocentiam allegatâ : Sancti ipsius merito , infra triduum , novos recepit oculos , minores quidem illis , quibus orbatus fuerat , sed non minus limpidè visûs officium exercentes . Hujus autem stupendi Miraculi , testis fuit prænominatus miles Otho , juramento ad hoc adstrictus , coram Domino Jacobo , Abbate S. Clementis ; auctoritate Domini Jacobi Episcopi Tyburtini , de ipso miraculo inquirente . Testis etiam extitit ejusdem miraculi , Frater Guillelmus Romanus , à fratre Hieronymo Generali Ministro Ordinis Fratrum Minorum , ad veritatem dicendam , quam circa hoc noverat , præcepto , & excommunicationis sententiâ obligatus . Qui taliter adstrictus ,

coram pluribus Ministris Provincialibus ejusdem Ordinis, & aliis magni meriti Fratribus, affirmavit se dudum, adhuc sæcularem existentem, vidisse eum habentem oculos, & postmodum actu exsecutionis injuriam patientem; ac se, excæcati oculos in terram projectos, curiosè eum baculo revolvisse; & postmodum virtute divinâ, eundem, novæ lucis receptis oculis, videntem clarissimè, conspexisse.

§. 8. *De liberatis à variis infirmitatibus:*

Apud Castrum plebis, juvenis quidam mendicus surdus erat, & mutus, à nativitate suâ: qui linguam adeò curtam habebat ac tenuem, quòd multoties exquisita à pluribus, præcisâ penitus videretur. Vir quidam Marcus nomine, ipsum propter Deum suscepit hospitio: qui eum sibi benefacere sentiens, cœpit cum ipso assiduus demorari. Sero quodam cùm prædictus vir cœnaret cum conjugē, astante puero coram eis, dixit uxori: Hoc ego maximum miraculum reputarem; si B. Franciscus huic auditum redderet & loquelam. Et adjecit: Voveo Deo, quòd si hoc Sanctus Franciscus dignabitur operari: propter amorem suum huic puero expensas conferam, donec vivet. Mirum certè! Subitò lingua crevit, & locutus est, dicens: Gloria Deo, & S. Francisco, qui mihi loquelam præbuit & auditum.

Frater Jacobus de Iseo, cùm puerulus esset in domo paternâ, incurrit rupturam corporis valde gravem. Superno verò afflatus spiritu, licèt esset juvenis & infirmus, Ordinem S. Francisci devotus intravit: nulli tamen, quâ urgebatur, infirmitatem detexit. Factum est autem cùm corpus S. Francisci transferretur ad locum, ubi pretiosus sacro-

sacrorum ossium ejus nunc thesaurus est conditus ; adfuit & tunc dictus frater translationis gaudiis : ut glorificati jam Patris corpori, honorem debitum exhiberet . Et appropinquans tumbæ , in quâ ossa sacra fuerant collocata : præ devotione spiritûs , sacrum tumulum complexatus , & cum lacrymis multis orans ; subitò, miro modo ad loca debita partibus revocatis , sanum se sensit : succinctorium deposuit , & ex tunc ab omni dolore præterito liber fuit . Ab infirmitate quoque consimili frater Bartholus de Eugubio , frater Angelus de Tuderto , Nicolaus Sacerdos de Stichano , Joannes de Forâ , vir quidam de Pisis , & alius de castro Cisternæ , Petrus quoque de Siciliâ , & homo quidam de castro Spelli juxta Assisium ; & quamplures alii per Dei misericordiam , & beati Francisci merita extiterunt mirabiliter liberati .

In maritimâ , mulier quædam mentis alienationem per quinquennium passa , visu & auditu privata est . Indumenta dilaniabat dentibus , ignis & aquæ periculum non timebat , & caduci morbi ad summum incurrerat horribilem passionem . Nocte verò quadam , cùm disponeret sibi divina misericordia misereri ; salutaris fulgore lucis superillustrata divinitus , vidit B. Franciscum super solium sedere sublime : ante quem prostrata sanitatem suppliciter exposcebat . Illo verò nondum favente precibus : firmavit mulier votum , promittens pro Dei amore ac Sancti , petentibus , donec haberet , eleemosynam non negare . Illicò sanctus pactum recognovit , quod olim cum Domino fecerat simile : & signans eam Crucis signaculo , integram sibi restituit sanitatem . A consimili passione puellam quandam de Nursiâ , & filium cujusdam nobilis viri , & alios quosdam , relatione veridicâ compertum est , Sanctum Dei Franciscum misericorditer liberasse .

Pe-

Petrus de Fulgineo, ad visitandum limina beati Michaelis, quodam tempore pergens, dum minùs reverenter peregrinationem peregit, fontis cujusdam aquam degustans, à dæmonibus est invasus; & exinde per tres annos obsessus, discerpebatur in corpore, pessima loquens, & horrenda prætendens: habens tamen aliquando lucida intervalla, Beati virtutem, quam efficacem au dierat, ad effugandas aëreas potestates, humiliter requisivit. Et ad sepulchrum pii Patris accedens, mox ut illud contigit manu, à dæmonibus eum crudeliter discerpentibus, mirificè liberatus fuit. Simili etiam modo mulieri cuidam de Narnio, habenti dæmonium misericordia Francisci subvenit; & aliis pluribus, quorum vexationum angustias, & curationum modos, longum esset per singula enarrare.

Vir quidam nomine Bonus, homo de Civitate Fani, paralyticus & leprosus, ad Ecclesiam B. Francisci à parentibus deportatus, utriusque morbi plenam consecutus est sanitatem. Sed & alius juvenis quidam, Acto nomine, de sancto Severino, totus leprosus, voto emissio, & ad sepulchrum Sancti delatus, meritis ipsius à leprâ mundatus est. Habuit quidem Sanctus super hujusmodi morbo curando præcellentem virtutem: pro eo quòd humilitatis & pietatis amore leproforum obsequiis se humiliter deputarat.

Nobilis quædam mulier, Rogata nomine, in Episcopatu Sorano, per xxiii. annos fluxu sanguinis fatigata; sed à quampluribus medicis quamplurima mala perpeffa: præ nimietate quidem languoris, sæpius videbatur exspirare. Sed & si quando fluxus hujusmodi stringebatur, tumescebat corpore toto. Audiens autem quendam puerum, Romano sermone canentem miracula, quæ Deus

per

per beatum Franciscum fuerat operatus , nimio dolore commota , tota prorupit in lacrymas : sicque intra se fide accensâ , dicere cœpit ; O Beate Pater Franciscus , qui tantis coruscas miraculis ; si me dignareris ab hac ægritudine liberare , magna tibi accresceret gloria : quoniam adhuc tantum miraculum non fecisti . Quid plura ? His dictis , sensit se Beati Francisci meritis liberatam . Filium quoque ipsius Marium nomine , qui brachium habebat contractum , S. Franciscus voto ad ipsum emisso , sanavit . Feminam etiam quandam de Siciliâ , per septennium fluxu sanguinis fatigatam , beatus Christi Signifer salvam fecit .

In urbe Româ , Praxedis quædam nomine , religiositate famosâ , quæ à tenellâ ætate , propter æterni sponsi amorem , arto se carcere per xl. jam ferè annos abdiderat , apud beatum Franciscum , gratiam promeruit specialem . Nam cum die quadam , pro rebus opportunis , solarium suæ cellulæ conscendisset , & impulsione phantasticâ corruens , cum fractum haberet pedem cum crure , & humerum à positione debitâ sequestratum : apparuit ei benignissimus Pater , vestimentis gloriæ candidatus ; & dulcibus affatibus alloqui cœpit eandem : Surge , inquit , filia benedicta , surge , ne timeas . Et apprehensâ manu ipsius , allevans eam disparuit . Ipsa verò per cellulam suam huc atque illuc se convertens , putabat se visum videre : usquequo ad clamorem ipsius apportato jam lumine , perfectè se sentiens per servum Dei Franciscum esse sanatam , cuncta quæ acciderant , per ordinem enarravit .

§. 9. *De non observantibus festum, & non honorantibus Sanctum.*

In Piſtaviæ partibus, in villâ, quæ Simo dicitur, Sacerdos quidam Reginaldus nomine, B. Francisco devotus, festum ipsius parochianis suis indixerat sollemniter celebrandum. Unus autem de populo ignorans Sancti virtutem, sui parvipendit Sacerdotis mandatum. Egressus autem foras in agrum, ut ligna succideret; cum se præparasset ad opus, vocem audivit hujusmodi ter dicentem: Festum est, operari non licet. Verùm cum nec imperio Sacerdotis, nec supernæ vocis oraculo, servilis temeritas fignaretur: addidit divina virtus ad gloriam Sancti sui, sine morâ miraculum, & flagellum. Mox enim ut furcam unâ manu jam tenens, alteram cum ferreo instrumento levavit ad opus: sic divinâ virtute, utraque manus utrique instrumento cohæsit, ut ad neutrius dimissionem, digitos aliquatenus relaxare valeret. Ex quo stupefactus nimis, & quid ageret nesciens; ad Ecclesiam, multis undique ad videndum prodigium concurrentibus, properavit. Ubi mente compunctus ante altare, quodam ex assistentibus Sacerdote monente, (plures quippe ad festum vocati convenerant Sacerdotes:) B. Francisco humiliter se devovit; tria, sicut ter vocem audierat, vota vovens: quòd scilicet festum ipsius coleret; quòd ad illam, in quâ tunc erat, Ecclesiam in festo veniret; & quòd sancti corpus personalter visitaret. Mirum certè relatu! Uno emissio voto, unus digitus factus est liber: ad secundi emissionem solutus est alius: sed tertio facto voto, laxatus est tertius; & postmodum tota manus, necnon & altera, subsequenter; populo, qui jam multus advenerat, Sancti

Sancti clementiam devotissimè implorante . Sic homo pristinæ redditus libertati, per seipsum instrumenta deposuit : cunctis laudantibus Deum, virtutemque sancti mirificam, qui tam mirabiliter percutere poterat, & sanare : Ipsa verò instrumenta usque hodie coram altari, ad honorem B. Francisci fabricato, ibidem in memoriam facti dependent. Plura quoque illic, & in locis vicinis patrata miracula, & Sanctum in cælis ostendunt eximium, & festum ipsius in terris venerabiliter excolendum .

In civitate quoque Cenomanensi, dum in solemnitate S. Francisci, mulier quædam manus ad colum extenderet; & digitis apprehenderet fufum : obrigescentibus manibus, cœperunt digiti magnis ardoribus cruciari . Igitur poenâ docente, Sancti recognoscens virtutem; corde compuncta, cucurrit ad Fratres: Cumque pro salute ipsius, devoti filii S. Patris clementiam precarentur, incolumis effecta est statim: nec aliquid læsionis remansit in manibus; nisi ad facti memoriam, solum vestigium combusturæ . Simili etiam modo in Campaniâ majori, mulier quædam; & in villâ Oletti mulier altera; & in castro Pyllei, tertia, dum beati Patris festum celebrare contemnerent, prævaricantes primùm mirabiliter sunt punitæ : sed postmodum poenitentes, per Sancti Francisci merita mirabiliùs liberatæ .

Miles quidam de Burgo in Provinciâ Massæ, Beati Francisci operibus, & miraculorum signis impudentissimè detrahebat; inferebat multa opprobria peregrinis, ad ipsius memoriam venientibus : & contra Fratres publicâ garriebat insaniâ . Cùm autem semel Sancti Dei gloriam impugnaret : addidit super peccata sua blasphemiam detestandam. Si verum est, inquit, quòd Franciscus iste sit sanctus;

Z

gladio

gladio cadat hodie corpus meum; si verò sanctus non est; evadam incolumis. Non distulit ira Dei condignum inferre supplicium; cum jam facta fuisset oratio in peccatum. Morâ enim modicâ interiectâ, dum blasphemus nepoti suo inferret injuriam: accepit ille gladium, & patruï visceribus cruentavit. Eodem die mortuus est sceleratus, inferni mancipium, & filius tenebrarum: ut ceteri discerent miranda Francisci opera, non blasphematoriis verbis impetere, sed devotis laudibus honorare.

Judex quidam nomine Alexander, dum à beati Francisci devotione, quos poterat venenatâ linguâ retraheret: divino judicio linguâ privatus, per sex annos obmutuit. Qui cum in eo, quo peccaverat, torqueretur: altâ pœnitundine revocatus, dolebat se contra Sancti miracula oblatrasse. Itaque non perstitit misericordis indignatio Sancti: sed pœnitentem, ac se humiliter invocantem, restitutâ loquelâ, recepit ad gratiam. Ex tunc linguam blasphemam consecravit laudibus Sancti, devotionem simul & disciplinam recipiens per flagellum.

§. 10. *De quibusdam aliis miraculis diversorum generum.*

In castro Galiani Valvensis dicecesis, mulier quâdam nomine Maria, quæ Christo Jesu & B. Francisco famulatu devoto subjecta, unâ dierum æstivo tempore exiit, ut manibus conquireret propriis necessarium victum. Cum igitur fervente nimium æstu, sitis deficere cœpisset ardoribus: omni privata beneficio poculi, pro eo quod in monte arido sola esset; quasi exanimis humi prostrata, patronum suum S. Franciscum invocabat pio mentis affectu. Dum autem perseveraret mulier in affectuosâ & humili prece:

prece : labore , siti , & æstu fatigata quamplurimum , paululum obdormivit . Et ecce S. Franciscus adveniens , & eam vocans ex nomine : Surge , inquit , & bibe aquam , quæ divino munere tibi ac pluribus exhibetur . Ad hujus vocis auditum surrexit mulier à somno , non modicum confortata ; & accipiens filicem , quæ juxta se erat , radicitus evulsit à terrâ : effodiensque ligno parvulo circumquaque , viventem reperit aquam ; quæ cum primò videretur parvula stilla , subito divinâ virtute crevit in fontem . Bibit itaque mulier , & satiata oculos lavit : quos cum longâ prius haberet ægritudine obumbratos , novâ ex tunc sensit luce perfusos . Festinavit ad domum mulier , tam stupendum miraculum ad gloriam S. Francisci denuncians universis . Concurrerunt undique multi ad miraculi famam , experientiâ magistrâ discentes mirabilem illius aquæ virtutem : dum ad ipsius , contactum confessione præmissâ , à variis morborum cladibus pluriini liberabantur . Perseverat usque hodie fons ibi perspicuus : & in honore B. Francisci ibidem Oratorium est constructum .

In Hispaniâ apud S. Facundum , viri cujusdam cerasum arefactam , ad virorem frondium , florum , & fructuum contra spem mirabiliter revocavit . Incolas quoque terræ apud Vilefios , à vermium peste corroden-
tium vineas circumquaque , miraculoso suffragio liberavit . Sacerdotis cujusdam juxta Palentiam , horreum quoddam , quod vermibus frumentariis repleti quolibet anno solitum erat , sibi fideliter commendatum penitus expurgavit . Terram quoque domini cujusdam de Petrâ malâ in regno Apuliæ , sibi suppliciter commendatam , ab odiosâ peste brutorum penitus servavit indemnem : cum tamen in circuitu omnia essent prædictâ pestilentiâ devorata .

Vir quidam Martinus nomine, cùm longè à castro suo boves minasset ad pascua; crus unius bovis, casu quodam sic fuit desperatè confractum, ut nihil esset sibi de remedio aliquo cogitandum. Dum autem pro decoratione foret sollicitus, & instrumentum, cum quo id faceret, non haberet: domum reversus, B. Francisco bovis curam reliquit, ipsumque fideli Sancti custodiæ fiducialiter commendavit; ne ante suum reditum devoraretur à lupis. Summo itaque mane ad bovem in silvâ relictum, cum excoriatore reversus: pascentem ipsum ita reinvenit incolumem, quòd nequaquam crus fractum ab altero discernebat. Gratias egit bono pastori, qui diligentem de bove suo curam habuit, & medelam donavit. Succurrere novit humilis Sanctus omnibus invocantibus ipsum: nec quantumcunque parvas necessitates hominum dedignatur; Nam viro cuidam de Amiterno, jumentum restituit furto sublatum: Mulieri cuidam de Interduco catinum novum in multas partes casu divisum, integrè reparavit: Viro etiam cuidam de monte Ulmi in Marchiâ, consolidavit vomerem in frustra confractum.

In Sabinensi diœcesi, vetula quædam octogenaria erat; cujus filia moriens, lactentem infantulum dereliquit. Cùm igitur anus paupercula, plena esset inopiâ, & vacua lacte; nullaque esset mulier, quæ sitienti parvulo lactis stillicidium, juxta quod exigebat necessitas, erogaret: quò se verteret vetula penitus ignorabat. Debilitato verò infantulo, nocte quadam omni humano destituta subsidio: ad beati Patris Francisci auxilium implorandum, lacrymarum imbre perfusa, totâ se mente convertit. Adfuit statim innocentis amator atatis: Ego; inquiens, sum Franciscus, ò mulier, quem cum tantis lacrymis

lacrymis invocasti . Pone , ait , mammas tuas in ore puerili : quoniam abundanter tibi lac Dominus dabit . Implevit anus Sancti mandatum : & statim octogenariæ mammæ lactis copiam effuderunt . Innotuit omnibus mirabile sancti donum : multis tam viris , quàm mulieribus accelerantibus ad videndum : Et quia quod testabantur oculi , lingua impugnare non poterat : excitabantur omnes ad laudandum Deum , in Sancti sui virtute mirabili , & amabili pietate .

Apud Spoletum , vir & uxor unicum habentes filium , quotidie illum velut hereditarium opprobrium deplorabant . Brachiis siquidem collo connexis , junctisque genibus pectori , & pedibus natibus alligatis ; non hominis proles , sed monstrum quoddam potius videbatur . vehementiori mulier ex hoc afflicta dolore , crebris gemitibus clamabat ad Christum , S. Francisci auxilium invocando : ut infelici sibi , & in tali opprobrio constitutæ , succurrere dignaretur . Nocte igitur quadam , cùm propter hujusmodi tristitiam , tristis eam somnus arriperet ; apparuit ei S. Franciscus , piis eam assatibus mulcens : insuper & suadens , quòd ad locum propinquum suo nomini dedicatum , deferret puerum ; ut ex aquâ putei loci illius , in nomine Domini superfusus , plenam reciperet fospitatem . Negligente autem illâ Sancti adimplere mandatum , secundò replicavit id ipsum . Tertiò quoque apparens , mulierem cum puero usque ad januam dicti loci , præambulo ducatu perduxit . Supervenientes autem nobiles quædam matronæ devotionis causâ ad prædictum locum , eis à muliere præfatâ diligenter expositâ visione , unâ cum ipsâ puerum fratribus præsentârunt : & haurientes aquam de puteo , earum nobilior propriis manibus lavit

lavit infantem . Statim puer omnibus membris ad sua loca productis , sanus apparuit : & magnitudo miraculi , omnibus admirationem induxit .

Apud Segusiam juvenis quidam de Riparolio ; Ubertinus nomine , Ordinem Fratrum Minorum ingressus ; novitiatus sui tempore , horridi cujusdam perturbatione pavoris incurrit amentiam : totiusque dextræ partis paralysis morbo gravissimo , auditum & linguam cum motu amisit & sensu . Cùm autem sic miserabilis , non sine Fratrum multâ mœstitiâ per plures dies in lectulo decubasset : B. Francisci sollemnitas supervénit . In cujus vigiliâ , concessio sibi aliquo lucido intervallo ; pium Patrem licet voce informi , corde tamen fideli , prout poterat , invocabat . Horâ verò matutinali , fratribus omnibus in Ecclesiâ laudibus divinis intentis ; ecce B. Pater , habitu fratrum indutus , in infirmariæ loco , præfato novitio astitit , lumenque non modicum in habitaculo illo refulsit ; & extensam manum super dextrum illius latus , à capite ad usque pedes suaviter contingendo deducens , digitos in auriculas misit : quodamque in dextro humero impresso charactere : hoc tibi , ait , signum erit , quòd Deus per me , cujus exemplo ductus Religionem intraisti , plenè te restituit sanitati . Chordâque illum succingens , quia sine chordâ jacebat , dixit ad eum : Surgens Ecclesiam intra ; ut laudes Deo debitas , cum fratribus devotus exsolvas . Quibus dictis , cùm puer ipsum manibus vellet contingere , & pedum ejus deosculari vestigia , ut gratias ageret : ab ejus adspèctu B. Pater abscessit ; & juvenis recuperatâ sanitate corporis , cum rationis indultriâ , vivacitate sensuum & loquelâ , Ecclesiam ingressus , cum multâ fratrum & sæcularium admiratione , qui tunc aderant ,

rant, & juvenem paralyticum viderant & amentem, laudibus divinis interfuit; & per ordinem narrato miraculo, multos ad Christi & B. Francisci devotionem accendit.

In castro Chore Ostiensis diœcesis, vir quidam sic crus ex toto perdiderat, ut nullo modo progredi, vel movere se posset. Positus itaque in angustia vehementi, & auxilio desperatus humano: cœpit nocte quadam, ac si præsentem cerneret B. Franciscum, talem coram eo assumere materiam querulandi: Adjuva me, S. Francisce, recolens meum servitium, & devotionem tibi impensam. Nam in asino meo te portavi; sanctos pedes tuos, & sanctas manus tuas osculatus fui; semper tibi devotus, semper benevolus extiti: & ecce morior doloris hujus durissimo truciati. His pulsatus querelis, statim adfuit beneficiorum memor, & devotioni gratus: & vigilanti viro cum uno fratre apparuit. Ad vocationem ejus se venisse dixit, & tulisse remedia sanitatis. Tetigit locum doloris cum baculo parvulo, qui figuram Tau in se habebat: & fracto mox apostemate, perfectam tribuit sanitatem. Et quod mirabilius est, sacrum signum Tau impressum super locum sanati ulceris, ad miraculi memoriam dereliquit. Hoc signo S. Franciscus suas consignabat litteras, quoties charitatis causâ scriptum aliquod dirigebat.

Sed ecce, dum per diversa miracula gloriosi Patris Francisci, mens narrationis varietate distracta decurrit, promerente ipso Crucis glorioso Signifero, in signum salutis Tau, non sine divinâ directione pervenit: ut ex hoc possimus advertere, quod sicut crux militanti post Christum, fuit sublimitas meriti ad salutem; sic & triumphanti

phanti cum Christo, facta est firmitas testimonii ad honorem. Hoc quippe crucis mysterium magnum & mirum, in quo charismata gratiarum, & merita virtutum, & thesauri sapientiæ & scientiæ tam altâ profunditate velantur; ut à mundi sapientibus & prudentibus sit occultum: tam plenè fuit huic Christi parvulo revelatum; ut omnis vita ipseus, non nisi crucis vestigia sequeretur, non nisi crucis dulcedinem saperet, non nisi crucis gloriam prædicaret. Verè namque in suæ conversionis principio dicere cum Apostolo potuit; *Mibi autem absit gloriari, nisi in cruce Domini nostri Jesu Christi*: Non minùs etiam verè in conversationis progressu addere valuit; *Quicumque hanc regulam secuti fuerint, pax super illos, & misericordia*. Verissimè autem in consumatione potuit subinferre; *Stigmata Domini Jesu in corpore meo porto*. Sed & illud nos quotidie desideramus ab ipso audire; *Gratia Domini nostri Jesu Christi, cum spiritu vestro, fratres, Amen*.

GLORIARE igitur jam securè in Crucis gloriâ, Christi Signifer gloriose: quoniam à Cruce incipiens, secundùm Crucis regulam processisti: & tandem in Cruce perficiens, per Crucis testimonium, quantæ gloriæ sis in cælo, cunctis fidelibus innotescit. Securè jam te sequantur, qui excunt ex Ægypto; quia per baculum Crucis Christi, mari diviso, deserta transibunt, in repromissam viventium terram; Jordane mortalitatis transmissi, per ipsius Crucis mirandam potentiam ingressuri. Quò nos introducat verus populi Ductor, & Salvator Jesus Christus crucifixus, per merita servi sui Francisci. Ad laudem & gloriam unius Dei & trini, qui vivit & regnat in sæcula sæculorum. AMEN.

CAN-



CANZONE

DI MONSIGNOR

MAFFEO VENIERO

ARCIVESCOVO DI CORFU.

Sopra il Monte dell'Alvernia, dove S. Francesco
ricevette le sacre Stimate.



ACRATI *Horrori*, ove la folta chioma
De l'aspro monte antico verno imbiàca;
Che da la parte manca
L'Arno rimira, e dopò se nasconde
L'altero Fiume, ch'apre il seno à Roma;
Irrigator de le Latine sponde.
Quì valli ime, e profonde

Vedi, e impenetrabili Caverne,
Rotte pietre, e sospese
Produr gelide, e nude arbori eccelsè:
L'inospito paese
Per habitar con Dio Sant'buomo scelsè.
O pie memorie eterne!
Che gli cederon poi le pietre istesse;
E'l suo Signore in lui se stesso impressè:

Aa

Fati-

*Faticosi sentier, spelonche oscure,
Che Dio si scopre, ove si celsa il Sole,
Erta, e sassosa mole,
Rupi, e ruine, ah! che stupori barrete?
Ecco in mezzo le nevi alme sicure
Arder, e benedir zelanti, e liete.
Quì strade berme, e secrete
Premean quei sacri piè poveri, e scalzi,
Scalzi, e tanto pregiati,
Ch' in essi si degnar l' eterne piante
Stampar segni beati
De le lor piaghe, redentrici, e sante.
Così fedel t' inalzi,
Che ti trasformi al fin co' l' proprio oggetto,
Man con man, piè con piè, petto con petto.*

*Prendi le piaghe sue, felici doglie:
Che pietà le bramò, pietà le diede.
Sanguinosa mercede
Chiedesti, orando, à feritor clemente.
Et egli per temprar l' accese voglie,
T' aperse il petto, e ti beò la mente.
Alma, che duol non sente,
Se non quel duol, che' l' suo dolor sia poco
A l' infinito merto,
Ch' acquistò in terra il Creator del Cielo.
Ma dal Costato aperto
Riceve più mercè, scopre più zelo:
O zelo, o vivo foco!
Spirto di ferma fede, hor godi, or bora
L' amor, che ti ferì, mira, or adora.*

O tu

O tu prode Hannibal , che quì d'intorno
Sol co'l tuo nome impallidir facesti ,
Superbo , hor che diresti ,
Ch'un'buom cinto di fune , inerme , imbelle,
Di te resti più chiaro , e più del giorno ,
E co'l lacero piè calchi le stelle ?
Veder voti , e facelle
A' suoi vil panni , e di color di terra ,
I dator di Corone
In humil maestà chinarsi a' piedi .
Torrenti di persone
Tal'hor vedresti qui ; ma nulla vedi ,
Fabro , e foco di guerra .
Reggono gli altri i tuoi perduti Imperi ;
Ma tu dov'ora sei ? che puoi ? che spera ?

Fosti ben tu forza fatal di Marte ;
Ma il Santo cor , viva virtù d'amore :
Ei pace , e tu rigore ,
Ardir , odii , e rapine al Mondo insegna :
O d'inquetar' altrui mirabil' arte !
Feroce vincitor d'honori indegni ,
Hor v'è , pigliati i Regni ,
Che'l tuo fero valor vinse , e travolse ;
Che quei , ch'andò mendico ,
D'un'ampio Regno è possessor felice :
E tu di te nemico ,
Poco dal tuo furor sperar ti lice .
Morte il tuo ben ti tolse ;
Ed ei , che non curò cosa mortale ,
Hebbe vita al morir , morte al natale .

*Vinse, vinse, e amò gli emuli, e i vinti
Mansueto Guerrier d'arme di luce:
E tu Champion, e Duce
Ben festi un tempo inenarrabil prove;
Ma son gli ardori de' tuoi sdegni estinti;
Tronche l'opere tue stupende, e nove.
Questi, che non si muove,
Fisso pensier da un'incavata pietra,
Di là da i Monti e'l Mare,
Vince genti straniere, anime ignote;
Prede dilette, e care,
In servitù beate, in Dio di vote.
Et hor priega, e impetra,
Sostien, sana, e serena alme, e affina;
Povero habitator di grotta alpina.*

*Di te rimbomba il grido, e tu no'l senti
Morto al piacer de l'immortal tuo nome.
Honor rapido, oh come
La credula speranza alletti, e cbiamo:
E di quanto desii, tanto ti penti;
Che'l cibo d'una voglia a l'altra è fame.
Che tante arvide brame?
Che tanto affaticar speme tradita?
Se di nostra natura
Velocissimo è il corso, incerto il campo;
Che ci lusingha, e fura?
Un'abisso è il voler, la vita un lampo.
E se manca la vita,
Chi ti giova la fama? egri conforti;
La gloria è viva a' vivi, è morta a' morti:*

Ma tu,

*Ma tu, ch' à gran ragion fuggisti il Mondo ;
Vedi, che di là sù si scerne a pena.*

O di patria serena

Humil di Dio, dispregiator d' honori ;

Cb' uscendo di camin cieco, e profondo,

Il Ciel t' aperse in fronte almi splendori ;

Tu temprà i nostri cori

Con gli amatì tuoi guai stanco, e ferito :

Plachi l'onde al desio

De l'altrui vita la tua vita acerba :

Ergi, e affissa in Dio

La speme, fuor di Dio vile, e superba :

Et al mio stile ardito

Perdona : e sien queste palpebre in tanto

Labbra de gli occhi, e le parole il pianto :

Mente, che mai non posa ;

Come ne' suoi desir cresce, e formonta ?

E che farà dogliosa,

S'ogni contento human cade, e tramonta ?

Stolta, peni, e vacilli :

Del bramar, de l'haver t'angi, e contristi :

Poco vuoi, molto perdi, e nulla acquisti.



